



“স্বপ্ন দিয়ে তৈরি সে যে স্থতি দিয়ে ঘেরা ।”

# নারায়ণ

৭ম বর্ষ, ২য় সংখ্যা ]

[ পৌষ, ১৩২৭ ]

## মিলন ।

[ শ্রীনলিনীকান্ত সরকার । ]

( গান )

আমি শুধু তোমায় চাই ।  
লোকের কথা শুনতে গেলে  
দিন যে আমার ফুরিয়ে যায় ।

ডরবো না আর অপবাদে,  
পড়বো না আর অবসাদে,  
ধরার বোঝা বহিবো মাথে  
তা'তে কোন ছুঃখ নাই ।

আসে যদি ঝঞ্জা-বারি  
মহাপ্রলয় ঘিরে,  
( আমি ) শাস্ত সৌম্য গিরির মত  
পেতে নিব শিরে ;

আপন মনে আপনা হ'তে  
বহিবে সে যে স্নুধা-স্রোতে,  
মিশবে স্নুখে স্রোতস্বিনী  
সাগর-বঁধুর নীলিমায় ।

তুমি আমার রাখবে বেঁধে  
তোমার আলিঙ্গনে,  
আমি তোমায় মিশিয়ে নিব  
দেহ, প্রাণ ও মনে ;

তোমার আমার এ সংযোগে,  
মগ্ন রব মহান্ ভোগে,  
এ প্রেম মোরা সবার মাঝে  
বিলিয়ে দিব বসুধায় ।

## চক্রে দেশ বাঁচবে ।

[ শ্রীবারীন্দ্র কুমার ঘোষ । ]

এ সংসারে আমরা সব ভেঙে ভেঙে ভাগ করে নিয়ে ঘর করছি । এই আমার বাড়ী, ঐ তোমার ঘর ; এই আমার গাঁ, ঐ তোমার সহর ; এই আমাদের দেশ আমাদের জাত আমাদের ধারা, ঐ তোমাদের মূলুক তোমাদের আচার বিচার, তোমাদের সভ্যতা । ভাগাভাগি ঘর করা না হলে মানুষের সুবিধা হয় না ; তার কারণ মানুষের বুদ্ধি অল্প, সবটা এক সঙ্গে ধরতে পারে না, ধরতে গেলেও কোনটাই বুকের ধন করে সার্থক প্রেমে ধরা হয় না । আমাদের স্নেহ প্রেম দরদ, মমত্ব একটু খানি ; বোটি ছেলেপুলে কয়টি আর মা বোনকে পেলে সবটা স্নেহময় চলে দিয়ে তাদের আশার ভাও ভরে দিতে পারি, সেবার তাদের মর্শ্বছেঁড়া রকমের আপন করে নিতে পারি । কিন্তু দেশ সূত্র জগৎ সূত্র সবাইকে তেমন পারি না ।

তাজ মহলের কারু—সেই শ্বেত পাথরের গায়ে মতি চূণীর আলপনা জল্পনা শিল্পমাধুরী ধরতে গেলে আমাদের বুদ্ধি সে অসীমকে ভাগ করে করে দেখে ; এখানে একটি খিলান, ওখানে একটি চবুতারা, সেখানে একটুখানি মর্শ্বের মিশি জাল বুনানী—এই করে দেখে দেখে আমরা সব তাজটা বুঝি । আনন্দে—নিখর স্নেহে জুড়িয়ে যাই সবটাকে বুকে ও আশ্বাদ করে বটে, কিন্তু এই অসীমকে বুঝি

রকমটা হলো টুকরো টুকরা ধরে অল্পে অল্পে চোখ বুলিয়ে বুলিয়ে । ভগবান নিজেকে এ লীলার মাঝে দেখাচ্ছেন এমনি করে লীলার ফুলঝুরি তুলে, ফিন্‌কির মাঝ দিয়ে, একটু আধটু পথ ভোলা মাধুরীর অলখ জাগিয়ে । এই হ'লো জীবনের ধারা ।

আমাদের দেখ চোখ নাক কাণ আঙ্গুল জিব এই রকম বোঝবার জানবার দেখবার আশ্বাদ নেবার সব ইন্দ্রিয় গুলিই এক এক চুমুকে একটু খানি পায় । জিব দিয়ে রসগোল্লা পানতোয়া খাই, এক একটা করে, তা' আবার ভেঙে ভেঙে চিবিয়ে চিবিয়ে জিবের ওপর উন্টে পাণ্টে ; একটু একটু খাই আর আনন্দের ধারা চলে । চোখ মেলে আগে আমি দেখি রূপসীর চাঁপালী নবনীত রূপের স্বপ্ন, তার পর দৃষ্টি তুলে চেয়ে দেখি চেউয়ে চেউয়ে অঙ্গঢাকা কালো চুল, তারপর চোখের আয়ত লাজমহর কালো তল, বিশ্ব অধরের ধনুধক্ষিম রেখা আর কাঁপা সরসতা, শেষে চোখ তুলে নামিয়ে ঘুরে ফিরে বরাঙ্গের স্তম্ভ ভঙ্গী কত করেই না দেখি, তবে তো আমার এ চিরসুন্দরের মাঝে জাগা সমাধি শেষ হয় ।

সংসারে আমাদের জীবনে এইরূপে এককে পাই ভেদে আর ভেদকে পাই একে । এখানে সসীমে অসীমে জড়াজড়ি, পশুতে দেবতায় মাথামাথি,—ভেদ ফোটাচ্ছে অভেদকে, অভেদ ধরে আছে ভেদকে । যে এই জুটোকে বোঝে সেই বোঝার মত বোঝে, জানার মত জানে, দেখার মত দেখে । যখনই আমরা একটাকে আত্যন্তিক করে ধরি, তখনই জীবন বেঙ্গুরো বাজে, তাল কেটে যায় । শ্রীধর্মমঙ্গলে আছে ইন্দ্রের সভায় নাচতে নাচতে অম্বুবতী নটীর তাল কেটে গেছিল, সেই দোষে তাকে রজাবতী হয়ে মর্ত্যে জন্ম নিতে হ'লো । আমাদেরও জীবনের সমাজের বা জাতীয় ধারার তাল কেটে গেলে স্বর্গচ্যুতি ঘটে, সে মানুষ সমাজ বা সে জাতি সেই দিন থেকে তিল তিল করে মরতে থাকে ।

\* কিছুকাল থেকে ইউরোপ আর এশিয়ার এমনি করে জীবন নৃত্যে তাল কেটে গেছিল । ইউরোপ জীবনকে ধরেছিল মাতালের মত আঁকড়ে ; সুখ বিলাস জ্ঞান কাজ ছুটাছুটি ছটোপাটি ছাড়া আর কিছু সে জানতো না, ঐটেকেই সাত কাহন ভাবতো । তার ফলে ছনিয়া ভরে অভিশাপ উঠেছে, মড়ার মাথায় মাথায় পাহাড় হয়ে গেছে পরের ঘরে ডাকাতি রাহাজানী করে করে এখন যত্ববংশ ধ্বংস হবার যোগাড় । মানুষ নিজের গর্ভে যে নিজে পড়ে, পাপের করাত যে আসতে যেতে কাটে, তার দৃষ্টান্ত আজ ভোগপাগল ইউরোপের ঘরে দেখে নিও ।

এশিয়া অল্পরকে ধরেছিল ঠিক এমনি চোবের পুঁটলীর মত জড়িয়ে, তাই

এসিয়ার এতদিনকার ছবি হ'লো ধ্যানে মগ্ন মৌনী যতি আর তার মাথায় এক জোড়া বিদেশী নাগরা। আমরা ছুনিয়া-ছাড়া কি এক উদ্ভুট আত্মাকে খুঁজতে গিয়ে ইতোদ্রষ্ট-স্ততো নষ্ট হয়েছি, অরূপকে ধরতে গিয়ে রূপ অরূপের পরম ধনকে হারিয়েছি। যার বসবার ঠাই নেই, সে ধ্যান করবে কোথায়? এপারে পাটনীর নৌকার ঠাণ্ডাঘাট যার নেই, সে ওপারে যাত্রা করবে কোন ঘাটে তার পণ্য তরঙ্গী সাজিয়ে? এ দিন-ছুনিয়ার লীলারাজের দেবসভায় এসিয়া ও ইউরোপ—দুই নর্তকীরই নাচের তাল কেটে গেছে, তাই বৈকুণ্ঠ আর ধরার যাতায়াতের পথ আজ বন্ধ, তাই বিশ্ব মানবের আজ এ স্বর্গচ্যুতি। তাই আজ ইউরোপ ভক্ক আর এসিয়া ভক্ক্য,—একজন বাব আর একজন হরিণ;—দুই-ই পশু।

এই সঙ্কটের দিনে হা-ভাতের যুগে জীবনের তাল লয় ছন্দ ফিরিয়ে আনতে হবে, বাঁশীর সাতটা রক্কে আঙ্গুল দিয়ে সুরসপ্তকে ভরা রাগিণী বাজাতে হবে। আমরা খেতে পাচ্ছি, সূতরাং মার মার মার, কেড়ে খা' কেড়ে খা'—এ হলো পুরোণো স্বার্থবাদী ইউরোপের পশুর কথা। কেড়ে নেওয়ার ছ'টো দিক আছে, কাড়া-কাড়ি; মারবার গুছ'টো দিক আছে, মারা-মারি; এক হাতে তালি বাজে না, খুন করতে গেলে খুনোখুনী হয়ে যায়। ইউরোপে এসে আমাদের দেশ কেড়ে নিয়ে ঐ পশুর যুক্তি আমাদের চূড়ান্ত করে বুলিয়ে দিয়েছে, ঐখানে ঐ বোঝার মাঝে আমরা সত্যি সত্যিই হেরে গেছি—পরাধীন হয়েছি। যে জাতির ভাব-দেহ ঘুচে আত্মঘাত ঘটেছে সেই পরাধীন। আমরা ভাবছিলাম ছুনিয়ার ভেঙ্কি কাটিয়ে উঠে মনের পারে নির্ঝাণের সূখ-কোয়ারা পাব, তাই ভগবান জুতিয়ে ধ্যান ভাঙিয়ে দিলেন। সেই ত ছিল একটা মস্ত বিরাট ভুল। এখন আবার যদি ইউরোপের দেখাদেখি ভোগের কসাইখানায় ঢুকি, মেরে লুটে পুটে জীবনের হাতে গুণ্ডাবাজী করে মানুষ হতে চাই, তা' হ'লে ত আবার যুগযুগান্ত ধরে ওদের ভুলই মক্কো করতে হ'বে, অন্ন নিয়ে কাড়াকাড়ির অবিরাম হররাণীতে অন্ন পেটে দেওয়া আর হয়ে উঠবে না।

তোমার সামনে তোমার বুক থেকে ছেলেটাকে কেড়ে নিয়ে যদি কেউ কেটে ফেলে, সে পশুরুক্তি কি করণ আর বীভৎস হয়ে বাজে। আর ঠিক ঐ কাজ একটা নয় অগুস্তি হাজার ঐ খুন দেশের নামে করে যখন বীর জয়ী হয়ে ফেরে, তখন সে পরদেশদ্রোহীর নগরে নগরে আনন্দ উৎসব পড়ে যায়। মানুষ যে কি সঙ তা' এইখানে বেশ বোঝা যায়। ন্যাশনালিটিও মাত্রা হারালে অতিবড় জঘন্য পাপে গিয়ে দাঁড়ায়; তখন সে ন্যাশনালিটি বা দেশপ্রেমের নাম হয়

ইম্পিরিয়ালিজম্ বা রাষ্ট্রগৌরবের নেশা। এই নাশনালিজম্ বা জাতীয়তার গুণ্ডাগিরিতে সমস্ত জগৎ আজ খুনে লালে লাল, কত শত হৃদয়টি ফুকেফুকে অশিবারূপ শ্মশান-নৃত্যে নাচছে। ইহসর্কষ আর ইহ বিমুখ এই দুই তাল-কাটা সভ্যতায় আজ জগতের অর্ধেক মানুষ নবাব আর অর্ধেক গোলাম; গোলামী করতে করতে মানুষ যেমন পশুর অধম হয়, প্রভু হয়ে গোলাম চরাতে চরাতেও মানব-দ্রোহের পাপে বিজেতারও তেমনি ইহ জন্মেই রাক্ষস-গণ প্রাপ্তি হয়।

আজ এই নতুন যুগের যুগ-উষায় ইহবিমুখ ভারত বুঝেছে যে নর ও নারায়ণ এক, দেউল বিনা দেবতা সাজে না, জগতের শ্রীঅঙ্কনে রূপে রসে গন্ধে স্পর্শে শব্দে অরূপ নিরঞ্জনের সইজ পূজা দিবানিশিই চলছে। ভোগকে ছাড়লে ত্যাগের দেবতাকে প্রতিমাহারা করা হয়, নর-নারায়ণের সেবাই আনন্দধনের পথ। ব্যক্তিবাদী (Individualistic) ইউরোপও আজ সজ্বজীবন সার করেছে, তারাও বুঝেছে সোণার খাঁচা নিয়ে কাড়াকাড়িই এতদিন সার হয়েছে। খাঁচার পাখী—সেই অরূপের ধন কখন যে সোণার খাঁচা ছেড়ে নীল আকাশে হারিয়ে গেছে তা' টের পাওয়া যায় নি। ফলে সহর নগর জনপদ ভরে ইমারত উঠেছে, আলোর মালায় ভোগের শোভাযাত্রা সে নগরপথে নিতাই বাদ্য কলরবে চলছে; কিন্তু নগরে নগর-লক্ষ্মীর আবির্ভাব নেই, এ যেন সূখের দুঃস্বপ্ন, শুধু দেহের দোকানদারী।

এতদিন ইউরোপে ব্যক্তিবাদ প্রবল ছিল, স্বামী তার দাবী কড়ায় গণ্ডায় বুঝে নিচ্ছিল; স্ত্রী তার পুটলী অলাদা বেঁধে নিজের ঘরে তুলছিল; প্রজা তার সখ দলীল অধিকার নিয়ে রাজার সঙ্গে হাঁক ডাক ঠেলাঠেলি করছিল। তারপর এলো ধনীদেব আলাদা পঞ্চায়ত, ব্যবসায়ী দোকানদারের আলাদা পঞ্চায়ত, মজুরের আলাদা পঞ্চায়ত, নারীর আলাদা পঞ্চায়ত, কয়লার খনির কুলি, জাহাজের খালসী, মোট বাহী, রেলের চাকর সবারই পঞ্চায়তে পঞ্চায়তে ধূল পরিমাণ। ঐখানে ব্যক্তি গিয়ে সজ্বজীবনের সুর হল; কিন্তু তলিয়ে দেখো তখনও তার মধ্যে ব্যক্তির দাবী রয়েছে; তবে একা একা লড়া যায় না বলে জাতে জাতে পেয়ায় পেয়ায় থাকে থাকে সব আলাদা হয়ে দল বেঁধে নিজের নিজের পাওনা গণ্ডা আদায় করার জন্তেই এই সজ্ব। তাই সেখানে ধনের সজ্বের সঙ্গে মজুরীর লড়াই, কয়লার ধর্মঘট ব্যবসাদারের সজ্ব ভেঙ্গে দেয়। এখনও দেখো ইউরোপে ঠিক পঞ্চায়ত গড়ে নি, কারণ পঞ্চায়ত মানেই যে পাঁচজনের স্বার্থ

দেখে ও পাঁচের হিতে কাজ করে। সজ্ব যদি শুধু যত গাড়োয়ান আছে তাদের স্বার্থ দেখলো, তা' হলে ত এক জনেরই স্বার্থ দেখা হলো, শুধু কামার বা শুধু ছুতারের স্বার্থ নিয়ে মারপিট করলে যে নাপিত ধোপা চাষা পুরোহিত প্রভৃতি কত জনার স্বার্থ অবহেলা করা হলো। জীবনটা যদি শুধু কামারের হাপর নিয়ে চলতো তা' হলে ত ভাবনা ছিল না; কিন্তু কামারকে যে ছ'সন্ধ্যা ভাতের গ্রাস মুখে তুলতে হয়, জোলার কাপড় না নিলে তার লজ্জা নিবারণ করে কে? জাতির জীবন মানের তাই, সেই জীবনের শতমুখী স্বার্থ যে পঞ্চায়তে বজায় রাখে, তারই নাম পঞ্চায়ত বা সজ্ব বা চক্র। এই চক্রের চক্রেরই রাজা বা দেশপতি। এই চক্র দিয়ে অনন্ত জীবনকে ভেঙে ভেঙে ভেঙের মধ্যে আশ্বাদ করা যায়।

এই চক্র বিরাট বিশাল-জিনিস, এর আদি অন্ত আছে কিনা সন্দেহ। দেখছো না মাল্লের ক্ষুধা তৃষ্ণা হর-রঙা কামনা বাসনার হিসেব কিতাব নেই, মাল্ল যে—“মুছল কাম তরঙ্গ-মোহন নীলাস্থি”।

এই কামনা বা প্রেরণার চেউ-দোলা সাগর—মাল্লের জীবন এই পৃথিবী ধরে ধরে ভুমায় গিয়ে ঠেকেছে—তারই নাম সংসার-বট, এই জীবন-তরুর কথাতেই গীতা বলেছেন—“উর্দ্ধমূলমধঃশাখম্”।

গাছটা উল্টো, গোড়া এর ওপর দিকে আর ডাল পালা নীচে। তা' তো হবেই,—গোড়া যে ভগবানে, বৈকুণ্ঠে; আর ডাল পালা—শতমুখী সকল প্রকাশটা তার ছুনিয়া-জোড়া। তা' হ'লেই দেখ সেই সজ্ব সেই চক্র ঠিক, যা' এই জীবন-বটের ডালে ডালে পাতায় পাতায় রস আলো সার মাং জোগায়। দেশ জুড়ে চক্র গড়, সে চক্রে মুদি মাল্লা কুমোর ছুতোর যোগী ভোগী রাজা প্রজা সব যেন যে যার আঙিনায় স্থখে থাকে আর এই চক্র-দেবতার নাটমন্দিরে সবাই সবাইকে খুঁজে পায়। সেখানে মাংসের ভার কাঁধে কসাই শঙ্করাচার্যাকে সোহং তব্ব শেখায়, সেই চক্রেই ত রুহিদাস জুতো বানায়, নানক দোকান করে, চণ্ডীদাস রজকীর পায়ে বিশ্ব মাতাকে জগৎ-রাধাকে কুড়িয়ে পায়। চক্র গড়, চক্র গড়, দেশময় চক্র গড়, পরম বাঁধনে মনের ডোরে প্রেমের রাসে এক হও, নইলে দুর্ভিক্ষ মহাহারী ভয় লজ্জা তোমরা একা একা ঘুচাতে পারবে না।

## ঋষির সাধ

[ শ্রীরামদর্শনে দণ্ডকারণ্যবাসী ঋষির উক্তি ]

( শ্রী প্রফুল্লময়ী দেবী )

( আমরা ) চাইগো তোমারে চাই ;

সাধ মিটাইয়ে সারা দেহ দিয়ে  
লুটিতে তোমারে চাই !

শতবাধা শত বিপদ, বিবাদ,  
ভূষণ করিয়ে গুরু পরিবাদ,  
চির সাথী করে' বিরহ বিষাদ,  
যেন, মিলনের মধু খাই,

সারা দেহ, সারা পরাণটা দিয়ে  
তোমারেই যেন পাই ।

চিদ আনন্দ — ঘন রূপে, রসে,  
সাধ নাই, সাধ নাই !

যেন, আমার আমার বলিয়া তোমারে  
কামনার (ই) জয় গাই !

সংশয়ে বন কণ্টক বনে  
তুমি হেসে যেও নিতি নিজ মনে,  
ক্ষুধিত ত্রাষত কাতর পরাণে  
মোরা র'ব পথ চাই,'

মনসিজমোহ, মধুর মুরতি,  
কখন দেখিতে পাই !

যেন, দিগন্ত ঘেরা অক্ষকারের  
সকল রক্ষু ছেয়ে,

তব সঙ্কেত নিঃস্বন উঠে  
আহ্বান গান গেয়ে !



বি, এ, টা ভাল করিয়া পাশ করিতে হইবে—তাই পিতা তাহাকে ছেলে পড়াইতে নিষেধ করিয়া ছিলেন। কাল ফিএর টাকা চাই—বিশ্ববিদ্যালয়ের ফি ক্রমশই বাড়িয়া চলিয়াছে—এক সঙ্গে পঞ্চাশ টাকা কোথায় পাওয়া যায়! পিতা পুত্রে এই ভাবনাতেই বিষণ্ণ হইয়া আছেন।

( ৪ )

বেলা ১০ টা বাজিয়া গিয়াছে—টাকা কোথাও যোগাড় হইল না। অতুল আসিয়া বিজয়কে বলিলেন “বাবা, টাকা তো পাওয়া গেল না, ভগবান আমাকে সব দিক দিয়েই মেরেছেন। তোমার মা স্বর্গে গিয়ে বেঁচেছেন। ঘরে চাল কম পড়িলে তার মাথা ধরত, না হয় তো পেটের অসুখ হত এই ক’রে সে নিজের গ্রাস তোদের দিয়ে তোদের মাহুষ করে গিয়েছে; অসুখের উপর হাড় ভাঙা খাটুনি খেটে ম্যালেরিয়ার ভুগে ভুগে সে তোদের সেবা ক’রে গিয়েছে; সেই সতীলক্ষ্মী অনাহারে অনিদ্রায় অত্যাচারে তিলে তিলে মারা গিয়েছে। তার দেওয়া শেষ স্মৃতি একটা আঙুটি আছে, সেইটা বেচে যদি টাকা আনতে পারি, দেখি।”

( ৫ )

বিজয় বলিল—“বাবা! তা কিছুতেই হবে না, আমার পরীক্ষা দেওয়া না হোক সেও ভাল, কিন্তু মায়ের সেই স্মৃতিটা গেলে বড় কষ্ট হবে, ঘটি বাটি বাড়ী ঘর সবই তো গিয়েছে—এখন ভালবাসার স্মৃতিটুকু বিক্রী ক’রে সব ঘুচাতে চাই না। আমি ঠিক করেছি—বিলাসপুরের মঠে গিয়ে মিশনে যোগ দিয়ে সন্ন্যাসী হব—বাবা, আপনি অহুমতি দিন।”

( ৬ )

অতুলচন্দ্র ছেলের কথায় স্মুথও পাইলেন, হুঃখিতও হইলেন। কি করিবেন, ভাবিয়া ঠিক করিতে না পারিয়া বলিলেন—“তাই যা বাবা, গৃহী হ’য়ে য়ে. স্মুথ তোদের দিতে পেরেছি, তাতে আর কাকেও গৃহী হতে বলিনে। যা সেখানে গেলে, ছুবেলা দুটো ভাল করেই খেতে পাবি, ভাতকাপড়ের অভাব কোনোদিনই হবে না। লোকে “মহারাজ” বলে সম্মান করবে, পায়ের ধুলো রাজাতেও মাখাও নেবে, তবে বাবা বি, এ, টা পাশ ক’রে সেখানে গেলে বোধ হয় তারাও তোকে বেশী খাতির করতো, লোকেও বেশী মানতো। চাই কি পরে তোর আমেরিকা বা বিলাত যাওয়াও ঘটতে পারতো। নাঃ—ঐ আঙুটিই বেচে তোর টাকা আমি এনে দিচ্ছি।”

( ৭ )

সাকরার দোকানে গিয়ে সেই আঙুটিটা দর করিতে করিতে অতুলের চোখ দিয়া এক ফোঁটা জল পড়িল। নীলু স্বর্ণকার অতুলের বালাবন্ধু এবং প্রতিবেশী। সে এই আঙুটির কথা জানিত। অতুলের চোখের জল তাহার চোখ এড়াইল না। সে বলিল—আমি তোমায় পঞ্চাশ টাকা ধার দিচ্ছি,—তুমি ভাই আঙুটি ফেরৎ নিয়ে যাও, ছেলে পাশ ক’রে রোজগার করলে শোধ দিও।” অতুলের চোখ দিয়া ঝর ঝর করিয়া জল পড়িতে লাগিল—সে বলিল, ভাই নীলু, তুমিই আমার বন্ধুর কাজ করলে, আঙুটিটা তোমার কাছেই থাক, স্বখন টাকা দেবো ফেরৎ দিও—জান তো আমাদের অভাবের সংসার। যাই ভাই, বেলা হ’য়ে গিয়েছে, আপিস যেতে দেরী হ’য়ে যাবে, সাহেব না মেরে বসে। বুড়ীর শেষ দিনে এক ঘণ্টা আগে ছুটি চেয়েছিলাম, ভাই ‘মিথ্যাবাদী বলে গাল দিয়ে বেটা মারতে এসেছিল।”

( ৮ )

বিজয় বি, এ, পাশ করিয়াছে। গেরুয়া-রঙের সোণার চশমা, গিরিমাটিতে ছোপানো সোয়েটার, মশারি, পাঞ্জাবী ও মোজা, ছুবেলা রাজভোগ সদৃশ খাবার ও চা-বিস্কুট,—মোটর চড়া, ভাকিয়া এবং গড়গড়ার স্বপ্নের মধ্যে সে অণুবীক্ষণের দ্বারাও ত্যাগ আবিষ্কার করিতে না পারিয়া হতাশ মনে সন্ন্যাসী-ঘৃণিত সংসারীর জীবনই শ্রেয় মনে করিল। তিলে তিলে মরিয়া সারাজীবন ধরিয়া যাহারা তাহাকে গড়িয়া তুলিয়াছে—সেই মাতা, পিতা ও ভগিনীর হৃদয়ের রক্তে রঞ্জিত গেরুয়ায় আজ তাহার সন্ন্যাসের দীক্ষা সম্পন্ন হইয়াছে।

## ঋণ-শোধ ।

[ শ্রীস্বরেশচন্দ্র চক্রবর্তী ]

দিনের শেষে রাঙা মুখে

সূর্য যে এই ডোবে

ওগো নদীর যে ওই তীরে—

নীল আকাশে ছড়িয়ে পাখা

বিহগ কলরবে

ওগো ছুটে নিজের নীড়ে :—

তাদের আমি সূধাই-ওগো

এই সারাটা দিন

কাহার দেওয়া শোধ করেছ

অসময়ের ঋণ ?

গুণ্ডুনিয়ে ভ্রমর যে ওই

ফোটা ফুলের পাশে

ওগো কতই গাহে গান

শীতল উষার বিভোল হাওয়ার

ওই যে কুসুম হাসে

( ওগো ) কতই যে তার ভ্রাণ ;—

তাদের আমি সূধাই ধীরে—

এই যে নিমেষ পল

কাহার দেওয়া ঋণটা ওগো

শুধু ছ' অবিরল ?

ফাগুন মাসে নিঝুম রাতে

জোছনা-রাণী দেখি

( ওগো ) পিক্ ফুকারি ওঠে,

কালো রাতের অন্ধকারে

কোন গুহাতে থাকি

( ঘন ) বি'বি'র আওয়াজ ছোটে—

তাদের আমি সূধাই—ওগো

কাহার ঋণের ভার

গান গাতিয়া শোধ করিছ

আজকে অনিবার ?

গভীর যখন নিঝুম রাতি

সূধাই তখন ধীরে

( ওগো ) হৃদয় দেবতা

ঋণ কি আমার আছে কিছুর

শুধতে হবে কিরে

ওগো কওসে বারতা ?

জীবনের ঋণ—কয় কে হাসি—

আনন্দটা দিয়া

শুধতে হবে এই ভুবনে

ওরে অবোধ হিয়া ।

## সমাজের কথা ।

[ শ্রীনলিনীকান্ত গুপ্ত ]

প্রত্যেক ব্যক্তি যদি আপন আপন অন্তরাত্মার, আপন আপন নিগূঢ় সত্তার চেতনায়ও প্রেরণায় চলে তবে সমাজে আর দ্বন্দ্ব সংঘর্ষ থাকে না, সমাজে হয়, আনন্দেরই সম্মিলিত বহুল বিচিত্র সমৃদ্ধ সৃষ্টি । কিন্তু এই যে আদর্শ ইহা কি এতই পৃহনীয় ? দ্বন্দ্বের উপর প্রতিষ্ঠা না করিয়া সমাজকে সাম্যের মৈত্রীর আকাঙ্ক্ষার উপর প্রতিষ্ঠা করা সম্ভব হইলেও তাহা করা কি উচিত কথাটি আরও তলাইয়া দেখা দরকার । প্রথমত অন্তরাত্মাকে, নিজের নিজের আসল সত্তা ও ধর্মকে— নিজস্বকে ধরিতে হইবে। তাহা পারা যায় কিরূপে ? দ্বন্দ্বকে সংঘর্ষকে উঠাইয়া দিতে চাই—কিন্তু দ্বন্দ্ব সংঘর্ষ কি বে লই আমাদিগকে বাহিরের দিকে টানিয়া লয়,

তাহা কি কেবল পরের পথের পরের ধর্মের উপর আমাদের লোভ বা আক্রমণ চেষ্টার ফল? বরং ইহাই কি বলা যায় না যে, দ্বন্দ্ব সংঘর্ষই হইতেছে আত্মচেতনার নিজস্ব উদ্বোধনের উপায়? পরের দ্বারা প্রতিহত হইয়া, পদে পদে বাধা পাইয়াই ক্রমে আমরা ভিতরে প্রবেশ করিতে শিখি, নিজের পথ নিজের ধর্ম খুঁজিয়া পাতিয়া লইতে বাধ্য হই। আমাদের প্রাণ আমাদের মন, আমাদের প্রয়োজনের তাড়া বা বাধ্যবাধকতার টান আমাদের দিকে বাহিরের দিকে পরধর্মের দিকে আকৃষ্ট করে, স্বীকার করিলাম; ফলে দ্বন্দ্ব সংঘর্ষ উপস্থিত হয় তাহাও স্বীকার করিলাম। কিন্তু এই দ্বন্দ্ব সংঘর্ষই অব্যাহত ফিরাইয়া আমাদের গরক ঘরমুখী করিতেছে না কি? অপরের সাথে যুদ্ধ করিতে করিতে, বাধা বিপত্তিকে ঠেলিয়া ভাঙ্গিয়া চলিতে চলিতেই মানুষ আপন আপন শক্তির সামর্থ্যের পরিচয় পায়, অন্তরাত্মাকে প্রবুদ্ধ বিকশিত করিয়া তোলে। যেখানে বাধা বিপত্তি নাই, সকলেই যেখানে স্বেচ্ছামত চলিতে পূর্ণ অবকাশ পাইয়াছে সেখানে ত ভিতরের সত্তা ও শক্তি জোর বাধিতে পায় না, প্রতিভা খোলে না—তাহা চলে স্তিমিত-প্রবাহে, বিমাইয়া বিমাইয়া চলিয়া চলিয়া। সত্যযুগ ধর্মরাজ্য শাস্তিকে সামঞ্জস্যকে পাইতে পারে, কিন্তু মানুষের অন্তরাত্মা নূতন নূতন সম্বন্ধে ভরাট হইয়া উঠিতে পায় না। স্বথ ও স্বস্তিই আদর্শ নয় আদর্শ পূর্ণতর ঋদ্ধতর জীবন। দ্বন্দ্ব সংঘর্ষ বাধা বিপত্তিই ত জীবনের লুক্কায়িত বৈভব ফুটাইয়া ধরে। দ্বন্দ্বের মধ্য দিয়াই মানুষ নিজেকে পাইতে পাইতে চলিয়াছে, নিজেকে সমর্থ করিয়া তুলিতেছে, নিত্য নূতন জ্ঞানে গরিমায় ঐশ্বর্যশালী হইয়া উঠিতেছে। এই দ্বন্দ্ব যেখানে নাই সেখানে প্রত্যেকে নিজেকে পাইলে পায় ছোট স্কেলে, অল্পমাত্রায়, অন্তরাত্মায় সেখানে পূর্ণ বিস্তারের টান পড়ে না।

তারপর দ্বন্দ্বের সাথে সাথে আছে বৈষম্য; কিন্তু বৈষম্যকে দূর করিয়া সব একাকার করিবার চেষ্টায় লাভ কি? বৈষম্যেরই জগৎ জগতে আছে বৈচিত্র্য বৈদীপ্যবৈষম্যের কুফল মানুষকে ভোগ করিতে হয়, সন্দেহ নাই; কিন্তু তাহার সুফলের অধিকারী ত মানুষই, এ কথা ভুলিলে চলিবে কেন? বৈষম্যের ফলে একদিকে যেমন পাই দীন দরিদ্র অজ্ঞানী অক্ষয়, ঠিক অপর দিকেই তেমনি পাই শ্রীমান বিভূতিমান জ্ঞানী সক্ষম; একদিকে যেমন আছে অতল গম্বব, অপর দিকে তেমনি আছে উত্তম শৃঙ্গ। কেহ কাহারও সমান নয় অর্থাৎ প্রত্যেকেই আপন আপন সত্তা ও শক্তির উপর দাঁড়াইয়া আছে, আপন আপন প্রতিভাকে খাটাইয়া জীবনে যতখানি তা যতটুকু পারিতেছে সফলতা লাভ করিতেছে। এই

ব্যবহার প্রসাদেই যে পারিতেছে উপরে উঠিয়া যাইতেছে, আর যে পারিতেছে না সে নীচে থাকিতেছে বা আরও নামিয়া যাইতেছে। যে যেমন অধিকারী তাহার তেমনি কর্মফল।—যোগ্যতমের উর্দ্ধতন। যুদ্ধে যাহারা হারিয়া যায় তাহাদের জগৎ হুঃখ করিয়া লাভ কি, তাহারা হারিবার উপযুক্তই—বিজয়ী যাহারা তাহাদের দিকে ফিরিয়া দেখ, বৈষম্যের ও সার্থকতা বুঝিবে। শান্তি সাম্য চায় কাহার? যাহারা অশান্ত, যাহাদের নিজের পায়ের উপর নিজে দাঁড়াইবার ক্ষমতা নাই আপন যোগ্যতায় যাহাদের বিশ্বাস ও শ্রদ্ধা নাই—পথের দুর্গমতা যাহাদিগকে চঞ্চল করিয়া তোলে, যাহারা চায় কেবল সুযোগ সুবিধা সহজ স্কর কিছু। সাম্যবাদের ফলে নীচে যাহারা পতিত তাহাদের লাভ কিছু হইতে পারে, তাহারা যৎকিঞ্চিৎ উপরে উঠিয়া যাইতে পারে, কিন্তু উপরে যাহারা, শ্রেষ্ঠ যাহারা, তাহাদিগকে নীচে নামিয়া আসিতে হয়, তাহাদিগকে খর্ব করিতে হয় তাহাদের উদাত্ত সামর্থ্য। সাম্যবাদ সমর্থ অপেক্ষা অসমর্থকেই বেশী মূল্য বেশী মর্যাদা দেয়; কিন্তু ইহাতে হৃদয়বত্তা থাকিলেও, মোট জগতকে কি ক্ষতিগ্রস্তই হইতে হয় না? জগতে বৈষম্য যেখানে যত বেশী, সেখানে নিম্নতম স্তর যেমন পাই, উচ্চতম স্তরও তেমনি পাই। নিম্নতমকে না রাখিতে চাও, উচ্চতমকেও তবে রাখিতে পাইবে না। যে সমাজে সকলে সমানভাবে মাঝারি ধরণের তাহাই ভাল, না যে সমাজে একদিক খুব ছোটও যেমন আছে আবার খুব বড়ও তেমনি আছে তাহাই ভাল?

সংঘর্ষ ও বৈষম্য না থাকিলে, মানুষের অন্তরাত্মা পূর্ণতা পায় না, সমাজে স্বাভাব্য বৈশিষ্ট্য বৈচিত্র্য বলিয়া কিছু থাকে না। কিন্তু বাস্তবিক তাহাই কি? মানুষে মানুষে সংঘর্ষ মানুষের একটা ব্যক্তিত্ব বোধকে জানাইয়া তোলে বটে, কিন্তু সে ব্যক্তিত্ব তাহার আসল ব্যক্তিত্ব নয়, তাহার অন্তরাত্মা নয়, সেটি হইতেছে অহংকার বোধ। আর এই অহংকার ত হইতেছে তামসিক অহংকার, প্রাণের অন্ধ আবেগের ক্রিয়া। ফলতঃ, দ্বন্দ্ব সংঘর্ষ যে তামসিক অহংকারকে জাগাইয়া ধরে, তাহা মানুষকে আপন সত্য অহং—অন্তরাত্মা হইতে দূরেই লইয়া ফেলে, অন্তরাত্মার দূরে বাহিরে প্রয়োজনের বা সংস্কারের একটা খণ্ডিত বিচ্ছিন্ন ঘূর্ণি-মধ্যে মানুষকে সবদ্ধ করিয়া রাখে। তাই আমরা বলিতেছি, অন্তরাত্মার পরি-স্ফুরণের জগৎ দ্বন্দ্বসংঘর্ষ দরকার নাই, দরকার ভিতরে একটা তপঃপ্রয়োগ, ঠাসাঠাসি রেশারেশি দরকার নাই, দরকার একটা মুক্ত বিস্তীর্ণ অবকাশ।

আর বৈষম্য না থাকিলে যে বৈশিষ্ট্য থাকিবে না, এমনও কোন কথা নাই।



মানুষে মানুষে বৈষম্য আছে ও থাকিবে; কিন্তু সে বৈষম্য অর্থ এমন নয় যে, কাহাকেও নীচে আর কাহাকেও উপরে থাকিতে হইবে, উপরে যে থাকিবে সে নীচেকে চাপিয়া থাকিবে! জগতে যে বৈষম্যের খেলা আমরা নিত্য দেখি, সেটি হইতেছে অহংকারের বুভুক্ষার তারতম্য আর কৃত্রিম একটা অবস্থা ও ব্যবস্থা সেই বুভুক্ষার যে স্বেযোগ ও স্বেবিধা অথবা যে বাধা ও বিপত্তি আনিয়া দিতেছে কাহারই ফল। অন্তরাঙ্গায় যে বৈষম্য আছে, তাহা শক্তির বিভিন্ন ভাবমাত্র, ছোট বড় শক্তির রেশারেশি নহে। বাহিরে ব্যক্তিতে ব্যক্তিতে যে ঈর্ষা ও প্রতিযোগিতা দেখিতে পাই, তাহা সত্যকার বস্তু নয়, সেটি ব্যতিরেকী বা অভাবাত্মক (negative) জিনিস; ভিতরের অন্তরাঙ্গার বস্তু হইতেছে স্বভাব ও স্বধর্মের প্রবাহ। প্রত্যেকের অন্তরাঙ্গা এক এক ধরণের শক্তির বিভূতি, নিজস্ব শক্তিকে নিজস্ব ধরণে ফুটাইয়া ফলাইয়া ধরিয়াই মানুষ প্রকৃত বৈশিষ্ট্যকে বৈচিত্র্যকে সৃষ্টি করিতে পারে। অন্তরাঙ্গায় সকলই এক স্তরে দাঁড়াইয়া, তাই সকলেই সমান; তাহার অর্থ নয় যে সব একাকার। আপন আপন অন্তরাঙ্গার প্রতিভাকে সকলে বিকশিত করিয়া তুলিতেছে, প্রত্যেকের ক্ষেত্র পৃথক পৃথক—কাহার শক্তি বড় কাহার ছোট, কে উপরে কে নীচে এ প্রশ্ন সেখানে আদৌ উঠে না, তুলনা সেখানে চলে না, কারণ সকলেই অন্তরাঙ্গাকেই পাইয়াছে ও সৃষ্টি করিতেছে। অন্তরাঙ্গায় পুরুষে বড় ছোট নাই, উপর নীচ নাই, আছে শুধু নানা ভঙ্গী, বিভিন্ন ধরণ, বিভিন্ন রঙ।

দ্বন্দ্ব সংঘর্ষ বৈষম্যের ভিতর দিয়া ছাড়া মানুষ কখন অন্তরাঙ্গার উদ্বোধন করিতে পারে না, অন্তরাঙ্গার পূর্ণ শক্তি লাভ করিতে পারে না—এ কথাই অর্থ এই যে, মানুষকে জোর করিয়া না চালাইলে সে চলিতে চাহিবে না। মানুষের কর্ম মানুষের সৃষ্টি হইতেছে কেবল বাহিরের চাপের জোরজবরদস্তির ফল—আনন্দের কর্ম আনন্দের সৃষ্টি বলিয়া তাহার কিছু নাই। কিন্তু বেত্রাঘাত করিয়াই শিশুকে শিক্ষা দেওয়া চলে, এ ধারণা যেমন শিক্ষার ক্ষেত্রে বর্তমানযুগে আর কাহারও নাই, সেই রকম জীবনের ক্ষেত্রেও সংঘর্ষ বা জোরজবরদস্তি করিয়াই যে কেবল মানুষের মনুষ্যত্ব উদ্বোধন হয়, এ কথাও শ্রায়তঃ আর আমরা বিশ্বাস করিতে পারি না। মানুষের সহজ ধর্ম, তাহার নৈসর্গিক প্রেরণাই হইতেছে অন্তরাঙ্গাকে জাগাইয়া ফুটাইয়া তোলা, তাহার ভিতরের সারবস্তুকে বাহিরে ছড়াইয়া ফলাইয়া ধরা। মানুষের অন্তরতম সত্ত্বার মধ্যেই আছে একটা টান যাহার ফলে সেই সত্ত্বা আপনা হইতেই আপনাকে বিকশিত করিয়া চলিতে

চায়। অন্তরাঙ্গার পরিষ্করণ প্রয়াস স্বয়ংসিদ্ধ, অন্তরাঙ্গার আনন্দই এই পরিষ্করণে। জোর জবরদস্তির দ্বন্দ্বের সংঘর্ষের প্রয়োজন যে হইবেই, এমন কোন কথা নাই। এই দ্বন্দ্বের সংঘর্ষের সফল যে আমরা সময়ে সময়ে দেখিয়া থাকি, তাহার কারণ অগ্র পথ আমাদের চোখে পড়ে নাই, অগ্র পথ আছে কি না তাহা জানিয়া একবার পরীক্ষা করিয়া দেখিবার চেষ্টা বা কৌতুহলও আমাদের তেমন হয় নাই। তাহা যদি হইত তবে বৃত্তিতাম, দ্বন্দ্ব সংঘর্ষ খুব ভাল হিসাবে ধরিলেও হইতেছে বড় জোর মন্দের ভাল (second best thing); আসলে কিন্তু দ্বন্দ্ব সংঘর্ষ কিছুদূর উঠাইয়া ধরিলেও একেবারে চরমে, অন্তরাঙ্গার মধ্যে আমাদের কখন পৌঁছাইয়া দিতে পারে না—প্রথমে সহায় হইলেও পরে তাহা বাধাই হইয়া দাঁড়ায়, অন্তরাঙ্গার সম্মুখে একটা যবনিকাই সে খাড়া করিয়া দেয়।

মানুষ যদি কেবল পশুই হইত তবেই বোধ হয় সংঘর্ষের লগুড়াঘাতে সে উপকার পাইত। কিন্তু মানুষের মধ্যে স্পষ্টই দেখিতে পাই, জাগিয়াছে একটা আত্মসংবিৎ—এই আত্ম-সংবিৎ নিজের শক্তিতেই শক্তিমান, নিজের আনন্দের জোরেই নিজের পূর্ণ সার্থকতার দিকে চলিতে পারে ও চলিতে চাহে। দ্বন্দ্ব বা সংঘর্ষ এই আনন্দকে দীর্ণ করিয়া দেয়, ঐ শক্তিকে ছিন্ন করিয়া ফেলে। মানুষের অন্তরাঙ্গা নিজের সামর্থ্যই সমর্থ—রাস্তা যদি পরিষ্কার থাকে, ক্ষেত্র যদি উদার বিস্তৃত হয়, তবে নিজের বেগেই সে নিজেকে চলিতে পারে, আপন প্রতিভাতেই আপনার চরম সৃষ্টি করিতে পারে।

জিজ্ঞাসা করা যাইতে পারে, মানুষ যদি এতখানি স্বয়ংসিদ্ধ, তাহার অন্তরাঙ্গা যদি এত সমর্থ, তাহার আনন্দ যদি এত বলীয়ান তবে বাহিরের সংঘর্ষে কি আসে যায়? সংঘর্ষ বা সাম্যমাত্রা দুই-ই তাহার কাছে অকিঞ্চিৎকর, উভয়েরই অতীত সে। ফলতঃ দেখি না কি, শক্তিমান যে, প্রতিভাশালী যে, সর্কাবস্থায় সে আপনার পথ করিয়া লইয়াছে—স্বেযোগ বা স্বর্যোগ, অহুকূল বা প্রতিকূল কিছুই সে তোয়াক্কা রাখে না, শান্তি বা সমর দুই-ই তাহার প্রতিভাকে উপচিতই করিয়া চলিয়াছে? বরং এই কথাই কি বলা যায় না যে, দ্বন্দ্বসংঘর্ষ-প্রতিকূল অবস্থাই হইতেছে অন্তরাঙ্গার শক্তির বা আনন্দের কষ্টপাথর? সকল বিরুদ্ধ শক্তিকে জয় করিয়া অতিক্রম করিয়া টিকিয়া আছে যে সেই শক্তি সেই আনন্দই খাঁটি, তাহারই বর্ত্তিয়া থাকিবার অধিকার আছে? দ্বন্দ্বসংঘর্ষ সহায় না হউক, বাধা হিসাবেও ইহাদের সার্থকতা আছে, কারণ বাধা দিয়া ইহার অন্তরাঙ্গার শক্তির সামর্থ্যের আনন্দের মূল্য যাচাই করিয়া দিতেছে।

এ কথা সত্য, আপাততঃ আমরা স্বীকার করিয়া লইলাম। মানুষ যতদিন অন্তরাঙ্গার স্বাতন্ত্র্যে প্রতিষ্ঠিত না হইতেছে, ততদিন না হয় সংঘর্ষের বৈষম্যের একটা প্রয়োজনীয়তা থাকিল, কারণ ততদিন মানুষ পশুভাব হইতে একান্ত মুক্ত হইতে পারে নাই। কিন্তু তাই বলিয়া সংঘর্ষ ও বৈষম্যকে যদি চিরন্তন করিয়া রাখিতে চাই তবে উহাদের যে প্রয়োজন ঠিক তাহাই ব্যর্থ হইবে। সংঘর্ষ ও বৈষম্যের লক্ষ্য বাহাতে হয় সংঘর্ষ ও বৈষম্যকে ছাড়াইয়া সম্মিলন ও সাম্যের মধ্যে পৌঁছিতে, বাহিরের প্রতিযোগিতা বাহাতে আমাদের লইয়া চলে অন্তরাঙ্গার সামঞ্জস্যপূর্ণ স্বাতন্ত্র্য, পশুভাব পশুত্বকে অতিক্রম করিয়া বাহাতে পরিবর্তিত হইতে পারে একটা দেবভাবে, সে রকম মনের অবস্থা ও সমাজের ব্যবস্থা যদি না তৈয়ার হইতে থাকে তবে ঐ সব উপায়ের আশ্রয়ের পূর্ণ সার্থকতা নাই।

কিন্তু তাহা কি কখন হয়? সংঘর্ষ কি কখন আপনা আপনি সম্মিলনে, প্রতিযোগিতা একাত্মায়, পশুভাব দেবতায় পরিণত হইতে পারে? এ যেন যুদ্ধ করিয়া যুদ্ধ নিরসন করিবার প্রয়াস (The war that will end war) কিন্তু আজ কি অস্পষ্ট দেখিতে পাইতেছি না, এসব আমাদের কত অমূলক—যুদ্ধ কেবল যে যুদ্ধেরই বীজ বপন করে? ভোগের দ্বারা ভোগ উপশম হয় না, বরং তাহা বাড়িয়াই চলে। সংঘর্ষ বা প্রতিযোগিতা মানুষের মধ্যে যে শক্তিকে উৎসাহ করে, সেটা হইতেছে পশুর শক্তি, বড়জোর আত্মরিক শক্তি। জোর জ্বরদস্তিতে যে শক্তি বল পায়, পাকা হয় তাহা আত্মার বল নয় সেটা হইতেছে মনের প্রাণের মধ্যে জড়াইয়া আছে যে অহংকারের মাংসর্ষা, দান্তিকতা। সংঘর্ষ প্রতিযোগিতা জোরজ্বরদস্তি অহংকারেরই খোরাক জোগায়, অহংকারকেই সম্ভাবিত জীবন্ত শক্তিমান করিয়া তোলে। আবার অহংকারকেও কেবল অহংকারেরই উপর ভর করাইয়া অন্তরাঙ্গায় পৌঁছান যায় না, দ্বন্দ্ব সংঘর্ষের ভিত্তর দিয়া অহংকারকে অন্তরাঙ্গার চেতনায় রূপান্তরিত করা যায় না।

তারপর প্রতিভাবানদের কথা। আমরা দেখিতে পাই কোন দ্বন্দ্বের মধ্যে সংঘর্ষের মধ্যে—তাহা বাহিরের হউক, আর এমন কি ভিতরেরই হউক—যে প্রতিভা লালিত পালিত পরিপুষ্ট তাহার সৃষ্টিতে, তাহার ধর্ম্মে কর্ম্মে লাগিয়া আছে সেই দ্বন্দ্বের সংঘর্ষেরই একটা ছায়া, তাহাতে অন্তরাঙ্গার পূর্ণতা ধরা দিতে পারে নাই, সেখানে মিশিয়া আছে নীচের স্তরে অহংকারেরই একটা রেশ। নীচের মধ্যে দেখিতে পাই যে একটা অতৃপ্তি একটা চাঞ্চল্য একটা দুঃখ, তাহার কারণ কতকটা বটে জগতের মানুষের বাস্তব অবস্থা আর তাহার আদর্শোচিত জগৎ

মানুষ এই দুইএর মধ্যে বিপুল পার্থক্যের অনুভূতি—কিন্তু আসল কারণ তাহার ভিতরে সেই আদর্শেরই মধ্যে। নীচের অন্তরাঙ্গায় ছিল একটা আদর্শ একটা উপলক্ষ কিন্তু তাহার মনের প্রাণের উপলক্ষ আদর্শ সেই অন্তরাঙ্গার উপলক্ষ আদর্শকে সম্যক প্রকাশিত হইতে দেয় নাই, তাহাকে বিকৃত করিয়া ধরিয়াছে; তাই সেই অন্তরাঙ্গার অতৃপ্তিই শতভাবে ভঙ্গিমায় মনে প্রাণেও ছুটিয়া ছুটিয়া বাহির হইয়াছে। নেপোলিয়নের অন্তরাঙ্গাও নেপোলিয়নের কর্ম্মে পূর্ণ তৃপ্ত হইতে পারে নাই (প্রমাণ তাহার নিজেরই অনেক কথা, বিশেষতঃ তাহার বন্দী-অবস্থার জীবন কাহিনী); নেপোলিয়নের জীবন—অন্ততঃ নেপোলিয়নের দিক হইতে—যে একটা ট্রাজেডি, তাহার কারণ আমরা বলিব এই যে তিনি সজ্ঞানে পূর্ণভাবে অন্তরাঙ্গার স্তরে উঠিয়া দাঁড়াইতে পারেন নাই, অন্তরাঙ্গার মুক্ত জাগ্রত প্রেরণার কর্ম্ম করেন নাই, তিনি দ্বন্দ্বের সংঘর্ষের উপরে উঠিয়া দ্বন্দ্বকে সংঘর্ষকে চালান নাই, তিনি অন্তরাঙ্গাকে মনের প্রাণের মধ্যে নামাইয়া দিয়া, দ্বন্দ্ব সংঘর্ষের মধ্যে থাকিয়া তবে দ্বন্দ্ব সংঘর্ষ করিয়াছেন, কর্ম্ম করিয়াছেন)। বায়রণ অথবা গেটে অপেক্ষাও ওয়ার্ডসওয়ার্থের মধ্যে যে পাই একটা উচ্চতর উদারতর নিবিড়তর কবিদৃষ্টি, তাহার কারণ দ্বন্দ্ব সংঘর্ষের মধ্যে থাকিয়া বাধাকে বিপত্তিকে সম্মুখে রাখিয়া যুদ্ধ করিতে করিতে তিনি তাহার প্রতিভায় জগৎকে সৃষ্টি করেন নাই, তিনি সৃষ্টি করিয়াছেন অন্তরাঙ্গায় উঠিয়া গিয়া অন্তরাঙ্গার স্বতঃসিদ্ধ সহজ প্রেরণার বলে; আর বায়রণ বা গেটে নেপোলিয়নেরই মত দ্বন্দ্ব সংঘর্ষের স্তরেই অন্তরাঙ্গাকে একটা পর্দার আড়ালে—সে পর্দা যতই সূক্ষ্ম বা পাতলা হউক না কেন, পর্দার আড়ালেই ফেলিয়া রাখিয়াছেন—গেটের মধ্যে ছিল চিন্তা-জগতের দ্বন্দ্ব সংঘর্ষ, বায়রণের ছিল প্রাণ-জগতের দ্বন্দ্ব সংঘর্ষ। বাস্তবিক পক্ষে, দ্বন্দ্ব সংঘর্ষ যে প্রতিভাবানদের প্রতিভাকে ইন্ধন যোগাইয়া প্রজ্জ্বলিত করিয়া রাখিয়াছে তাহা নয় অথবা বাধা দিয়া তাহার দাম কমিয়া দিতেছে এমনও নয়। প্রতিভাবানদের প্রতিভার ইন্ধন প্রতিভারই ভিতরে, প্রতিভার কষ্টিপাথরে প্রতিভা স্বয়ং।

দ্বন্দ্ব সংঘর্ষ হইতেছে মনের প্রাণের শরীরের ক্ষেত্রে—কিন্তু প্রতিভার উৎস যেখানে সেই অন্তরাঙ্গার ক্ষেত্রে দ্বন্দ্ব সংঘর্ষ নাই। অন্তরাঙ্গায় যতদিন উঠিতে পারিতেছি না, ততদিন অন্তরাঙ্গার যে স্বতঃ স্ফুর্ত স্বয়ংসিদ্ধ প্রেরণা তাহাই মনে প্রাণে শরীরে প্রতিযোগিতার প্রতিবন্ধিতার চাপের ভিতর দিয়া প্রকাশ হইতেছে। এই চাপ দূরীভূত হইলে ভিতরের প্রেরণাও যে সেই সঙ্গে বন্ধ হইয়া যাইবে তাহা নয়, বরং সেই প্রেরণা মুক্তপথে স্বরূপে স্বভাবে ফুটিয়া উঠিবে, মনে প্রাণে দেহে

সঞ্চারিত হইবে। বিরুদ্ধ শক্তির উপর ভর করিয়া দাঁড়ায় অহংকারের শক্তি, অহংকারই চায় আপন প্রতিষ্ঠার জন্ত বিরুদ্ধ শক্তি; কিন্তু অন্তরাশ্মার তাহা প্রয়োজন হয় না, অন্তরাশ্মার শক্তি হইতেছে নিজের আনন্দের তপঃসৃষ্টি। অহংকার লুপ্ত হইলে অন্তরাশ্মার বৈশিষ্ট্য লুপ্ত হয় না, বরং আপন প্রকৃত বৈশিষ্ট্য, উদার স্বাভাব্যেই ভরাট হইয়া অন্তরাশ্মার প্রতিভা তখন প্রবাহিত হইতে পারে।

দ্বন্দ্বের সংবর্ধের উপর—প্রতিযোগিতার উপর সমাজ যে প্রতিষ্ঠিত হইয়াছে, মনে রাখিতে হইবে, সেটি একটি অবস্থানুযায়ী ব্যবস্থামাত্র, বিবর্তনের একটা বিশেষ স্তরের সত্য। কেবল অন্তরাশ্মার কোন ইঙ্গিত যতদিন মানুষের মধ্যে স্পষ্ট দেখা দেয় নাই, মানুষ যতদিন শুধুই মনের বাদ বিচার, প্রাণের অন্ধ আবেগ আর শরীরের আশু-প্রয়োজনের তাড়নায় চলিতেছে ফিরিতেছে, মানুষের 'আমি'র সীমা যতদিন এই ভোগায়তনের পরিসর টুকু অর্থাৎ মানুষ যতদিন পশু হইতে খুব বেশী বিভিন্ন নয়, ততদিন সমাজের মাংশু ছায় ব্যবস্থার প্রয়োজন ও সার্থকতা আছে। মানুষ যাহাতে জড় মৃত না হইয়া পড়ে, যাহাতে তাহার মধ্যে থাকে একটা প্রাণের স্পন্দন, জীবনের আবেগ সেই জন্ত দরকার একটা বুভুক্ষা, একটা আত্মাভিমান। আত্মার বা অন্তরাশ্মার জ্ঞান ও অনুভূতি মানুষের যখন নাই, তখন অহং এর এই ছোট আত্মাটি ভাল করিয়া চিনিতে হইবে বুঝিতে হইবে—তাহার শক্তির ও আশক্তির সকল দিক সকল সীমা দেখিয়া গুনিয়া লইতে হইবে। এই রকমেই অবিচারকে যে ঘনীভূত করিয়া লইতেছে, সকল ছড়ান লুকান আঁধারকে একত্রিত কেন্দ্রগত করিয়া ধরিতেছে, কিন্তু পরবর্তী মুহূর্তে পরবর্তী পদবিচারে বিচার মধ্যে আলোকের মধ্যেই প্রতিষ্ঠিত হইবার জন্ত—উপর দিকে রাত্রি যত অগ্রসর হইতেছে ততই না দেশের অন্ধকার নিবিড়তর হইয়া উঠিতেছে?

কিন্তু অন্তরাশ্মা যখন জাগিয়াছে, মানুষ অহংকারের উপরে, মন প্রাণ দেহের উদ্ভেদে তাহার গভীরতম সত্তার সন্ধান পাইয়াছে—উষার প্রথম রশ্মিটুকু যখন দেখা দিয়াছে—তখনও যদি সেই পূর্বব্যবস্থা অনুসারেই সে চলিতে থাকে, তবে সেটা হইবে তাহার অধর্ম, অভ্যাসের সংস্কারের জের মাত্র; তখন তাহার ধর্ম গর্তানুগতিকের কাঠামকে ভাঙ্গিয়া ফেলিয়া, নূতন প্রাণবন্ত ব্যবস্থার সংস্থাপন—সবিতা যখন উদ্ভিত তখন সবিতারই ধর্ম আমাদের কর্মকে গড়িয়া সাজাইয়া উঠাইতে হইবে।

যদি জিজ্ঞাসা কর, অন্তরাশ্মা জাগিয়া থাকিলে অন্তরাশ্মাই ত আপন ইচ্ছামত আবশ্যকমত সব সৃষ্টি করিয়া লইবে, তবে আমাদের এ সব চেষ্টার প্রয়োজন কি

মূল্য কি, আমাদের এ সব ঔচিত্যানৌচিত্য বিচার কর্তব্যাকর্তব্য নির্ধারণ পশুশ্রম মাত্র কি নয়? এ কথার উত্তরে আমরা এখানে শুধু এই টুকু বলিয়াই নিশ্চিত হইব যে আমাদের এই সব চেষ্টা এই সব শ্রম অন্তরাশ্মারই প্রেরণার বিভিন্নরূপ, অন্তরাশ্মারই আপন কর্মের প্রণালীর অন্তর্গত।

মানবজাতির অন্তরাশ্মা জাগিয়াছে কি না, মানুষ প্রাচীন পরিচিত অভ্যস্ত সমাজব্যবস্থাকে অতিক্রম করিয়া চলিয়া যাইবার মত প্রস্তুত হইয়াছে কি না, অধ্যাত্ম প্রতিষ্ঠানের অধিবাসী হইবার অধিকারী সে হইয়াছে কি না—এ প্রশ্নের মীমাংসা বিচারে সন্তব নয়, ইহার মীমাংসা একমাত্র—ফলেন পরিচীয়ে। সুতরাং এ উদ্দেশ্যে বৃথা প্রমাণ সাজাইবার যত্ন হইতে আমরা বিরত হইলাম।

## তদাত ।

[ শ্রীকালিদাস রায় ]

সখি—তোমার পায়ের পরশ পেতে

মোহন চূড়া হলে থাকে

ঘুরে—বদন কমল-মধুর আশে

নয়ন-ভ্রমর ফাঁকে ফাঁকে ।

তোমার তনু আলিঙ্গিতে

নেচে নেচে চুমা নিতে

নীলাম্বিত হলো তনু

ত্রিভঙ্গ ভঙ্গিম বঁাকে ।

লুলিত এ বাহু দুটা

লতিয়ে পড়িছে লুটা

কটি তোমার কণ্ঠ তোমার

জড়াইতে পাকে পাকে ॥

গতি বিধি জানাতে সুই

পায়ে নুপুর পরে লো রই

তোমার লাগি বাজাই বাঁশী

বাঁশী বাধাধাই ডাকে ॥

## নারীর সমানাধিকার।

[ শ্রীসত্যাবালা দেবী ]

সম্ভবে কিনা বর্তমান যুগেও এখনও সমস্যা! সমানে সমানে সম অধিকার। সে সামঞ্জস্যের প্রকৃত স্বরূপ সন্ধানে বাঙ্গালীর শতাব্দীর পর শতাব্দীর চেষ্টা ব্যর্থ হইয়াছে,—বস্তুটা এখনও ফুটিয়া উঠে নাই। কিন্তু এই ব্যর্থতা পশুশ্রমের শূন্য দীর্ঘস্থাসে বায়ুমণ্ডল উত্তপ্ত করে নাই,—রাখিয়া গিয়াছে সভ্যতার ভাঙারে দিবার অমূল্য সম্পদ। বৈষ্ণব সাহিত্যের সৌন্দর্য্য পিপাসা,—সেই কবিদিগের রমণী-কটাক্ষের শত প্রকারের বিশ্লেষণ শ্রেণীবিভাস, হাস্যের অধরকুণ্ডলের রেখার পর রেখাটীকে ধরিয়া নব নব ভাবের প্রতীক রচনা;—প্রতিপদক্ষেপে পদনথ হইতে নিতম্ব পর্য্যন্ত—দেহের ভঙ্গিমার বিভিন্ন অর্থনির্দেশ,—এ সমস্ত কেবলি যে জড়-দেহের উপর নির্নিমেষ নয়ন পাতে ফল তাহা নহে,—ইহারই উপর প্রতিফলিত অন্তর্লোকের আর একটা রহস্যময় প্রকাশ, এই ভাষা এই উপমা উৎপ্রেক্ষাবলীর মধ্যে ওতপ্রোত ভাবে বিজড়িত দেখিতে পাই। বেশ বুদ্ধিতে পারা যায় তাঁহাদের সে রূপতৃষ্ণা সূক্ষ্ম রূপের জন্যই নহে, রূপের মধ্য দিয়া প্রেমের—অরূপের তৃষ্ণাই সেখানে প্রবল।—এই দিক দিয়া তাঁহাদের বিচার করিলে বলিতে হয়, তাঁহাদের কাছে নারীত্ব হেয় হয় নাই, একটা মর্যাদাই পাইয়াছে। কিন্তু আজ,—এই বিংশ শতাব্দীতে অবিকল সেই শ্রেণীর মর্যাদাতে আমরা পরিভূষ্ট হইব না! এ মর্যাদা সেই নারীকে দেওয়া হইয়াছে যে নারীর পদবী হইতে আজ আমরা উঠিতে চাহিতেছি।—এ মর্যাদা আমাদের কাছে বৈদেশিক মর্যাদা। আমরা সে জানলাভ করিয়াছি যে ইহার দ্বারা নারীত্বের আংশিক তৃষ্ণা হয় মাত্র,—পরিণতি আদৌ হয় না।

এই ভাবপ্রবণ প্রেমিকের দল আমাদের বুদ্ধিতে আসিয়া আমাদের মধ্যে আপনাদের হারাইয়াও ফেলিয়াছেন, আর তাহার ফলে এমন অমৃত উঠিয়াছে যাহার আশ্বাদ বাংলা আজও ভুলিতে পারে নাই,—কোনও দিন পারিবেও না। সেটাকে স্বীকার করিয়া লইয়াই আমি চাহিতেছি যে ইহাকেও অতিক্রম করিয়া উঠিতে হইবে। এখানে তোমরা মাত্র একটা উপায়ের সন্ধান পাইয়াছ তোমাদের নিজেদের বৃন্দ করিয়া রাখিয়া অনন্তের স্বাদটুকু পাইবার। জানিও ইহা প্রতিফলিত পদার্থ। চতুর্দিক খিতাইয়া উঠিলে যে যোগৈশ্বর্য্য ফুটিয়া উঠিলে

অনেক সম্ভরণে একটা দিক খিতাইয়া লইয়া সেখানে ও তো তাহারই একটু প্রতিবিম্ব দেখা মাত্র। পথের মাঝে একটা বৃক্ষতল পাইলে সেখানে অনন্তকাল বসিয়া বিশ্রাম চলে না। গন্তব্য আবাসের কথা মনে থাকে চাই।

শুধু বৈষ্ণব নহে, তান্ত্রিক সাধকের মধ্যেও দেখিতে পাই,—এই নারীকে প্রাত্যহিক প্রাকৃত স্তম্ভময় জীবনের অবজ্ঞা হইতে উদ্ধে তুলিবার চেষ্টা। এ সাধনার পুরুষ প্রেমে নারী হয় নাই, পুরুষ থাকিয়াই,—রক্তমাংসের আশ্বাদের মধ্য দিয়া নর নারীর ব্যবধানের মধ্যে মানুষে মানুষে যে উগ্রতা হিংস্রতা ফুটিয়া উঠে, সেটাকে শক্তিপ্রয়োগে শ্রদ্ধার সঞ্চায় করিয়া,—সরসতা ও সজীবতার রূপান্তরিত করিয়া তুলিতে অমানুষী চেষ্টা পাইয়াছে। ভারতের ছর্ভাগ্য, জড়ত্বের প্রভাবে এখানের বায়ুমণ্ডল আর্দ্রবাপে সমাচ্ছন্ন; সঙ্কল্পের প্রাণময়ী বিদ্যা-শিখা সহজেই স্তিমিতপ্রভ হইল,—সে প্রেরণা অহুষ্ঠানের ঘূর্ণাবর্তে পড়িয়া কতকগুলি উপধর্মের প্রসূতি মাত্র হইয়াছে। হায়রে! এতখানি মঙ্গলেচ্ছার এমন পরিণাম!

ইহাই হয়। গতানুগতিক নৃতনে সন্ধি চলে না। মঙ্গল সঙ্কল্পটাকে সে দিন কেহ স্পষ্ট করিয়া ব্যক্ত করে নাই। সহজে কাজ সারিতে গিয়া ধর্মের নামে একটা কৃৎসন সৃষ্টির চেষ্টা চলিয়াছিল। মঙ্গল সঙ্কল্প ঘুলাইয়া উঠিলে বিচিত্র কি?—আর যাহাকে তুলিবার চেষ্টা তাহাকে তাহার আশ্বাদময় সর্বাগ্রে বুঝাইতে হয়। নাবালক রাখিয়া কাহাকেও মানুষ করা চলে না। এ সব কথা সে দিন চাপা পড়িয়া গিয়াছিল।

এ সমস্ত সত্ত্বেও আমি ইহাদের কাহাকেও পরিত্যাগ করিব না।—ইহারও যে সোপানের এক একটা ধাপ। যতটা হইয়া গিয়াছে আমি তাহারই পরিণতি চাই। যে প্রেরণা পরকীয়া প্রেম উপধর্মের উপলক্ষ্য, যে প্রেরণা পঞ্চমকার চক্রের উপলক্ষ্য, আর গতানুগতিকের যে সতর্ক সন্দিক্ত শক্তিময় দৃঢ়তা ইহাদের বিরোধী, আমি সকলেরই অনুবর্তন করি। এই সমস্ত নব নব মতের উত্থান সংগ্রাম পতন, তারপর উপধর্ম রূপান্তরিত হইয়া গতানুগতিকের কুক্ষিতলে আশ্রয় লাভ, সমস্তকে শ্রদ্ধাপূত দৃষ্টি দিয়া অন্তরে অন্তরে চিনিয়া লইয়াই আমি সেই অভিজ্ঞতার উপর অতীত অসম্পূর্ণতাকে সম্পূর্ণতা দিবার প্রয়াস পাইব। আমি জানি, আজ নয়, বাংলায় বহু বহু শতাব্দী ধরিয়াই আমাদের তুলিবার চেষ্টা চলিতেছে। নারীর উন্নতির আন্দোলন নাম আমি এই সমস্তকেই দিব। ইয়োর্বোপের দৃষ্টান্ত ইহার পথ প্রদর্শক নহে। ব্রাহ্ম ধর্মের আন্দোলন ইহার

স্বপ্নপাত নহে। ইহার স্মরণপ্রবাহিত একটা ধারার তরঙ্গ (Episode) ইহাই বলিতে পারি।

এ কথা কে বুঝিবে না যে আমাদের সম্বন্ধে হৃদয় বৃত্তির স্পষ্টতা, সত্যের উপলব্ধি, ভারতের আধ্যাত্মিকতারই অঙ্গবিশেষ। জগতের সহিত আপনার সম্বন্ধ নির্ণয়ই ত আধ্যাত্মিক দৃষ্টির সর্বপ্রধান লক্ষ্য। আমাদের নারী ও নরের পরস্পর পার্থক্যের উপরই ত জগৎপ্রপঞ্চের ভিত্তি, স্মরণ্য এটার মধ্যে স্তর রহস্য আছে সমস্তের মীমাংসা না করিলে জগৎপ্রপঞ্চ চক্ষু হইতে মুছিতে কেমন করিয়া?

\* অনন্ত চেষ্টার ব্যর্থতা শুধু শুধু জমিয়া নিরেট প্রস্তরাকারে বাঙ্গালীর মনে প্রভাব বিস্তার করিয়া একটা নিরাশার অন্তঃপুর রচনা করিয়াছে। ইহারই চলিত নাম গোড়ামী। এই পুরপ্রাচীর ভেদ করিয়া সেখানে তুলিতে হইবে চেতনার, আত্মার, তড়িৎ স্পন্দন। এবার বার বার আত্মপরীক্ষার পর তবে যেন আমরা কর্মক্ষেত্রে নামি। যে অশুদ্ধতা বার বার দূষিত তড়াগের শৈবাল দামের মত সরিয়া আবার আসিয়া মুক্ত স্থান জুড়িয়া বসিয়াছে এবার যেন অব্যর্থ হস্তে তাহাকে সমূলে উৎপাটিত করিয়া পুতিপক্ষ সহ চিরতরে বিনষ্ট করিতে পারি। এবারের কার্যে সত্যকার সাফল্য আনিতে হইবে। প্রত্যেক বারের পদ্ধতিতে যে ভ্রম প্রমাদ ছিল সে সমস্তই আমার ভগবান চক্ষের উপর দেখাইয়া দিতেছেন। যে হৃৎকলতা ছিল তাহার উপরে উঠিবার জন্ত আমার ভগবান আকর্ষণ করিতেছেন। আজ সেই স্পর্শে প্রজ্বলিত অগ্নির মত তপ্তশাসী অন্তরাগ্নি বলিতেছে তপঃ, তপঃ, তপঃ!

নারীর উন্নতিতে শুধু নারীরই উন্নতি হইবে না,—হইবে জাতির উন্নতি। নারীর আত্মার উদ্বোধন একা তাহার জন্ত নহে, ইহার উপর সমগ্র মনুষ্য স্বভাবের আমূল পরিবর্তন নির্ভর করিতেছে। এত বড় পরিণাম এত বড় জয় ষাংহাদের তপস্তার লক্ষ্য তাহারা আশ্রয় হও। তপস্তা আরম্ভ হইয়াছে। উত্তরসাধক স্বয়ং ভগবান। এস উদ্বুদ্ধ আত্মা সর্বজড়তা নামাইয়া রাখ, সংশয় সন্দেহ তর্ক বিতর্ক কিছুই নহে। আপনাকে এই প্রবাহের মুখে সঁপিয়া দিলেই বুঝিতে পারিবে তোমার চিৎপ্রকাশ কেমন প্রথর কিরণে অলিয়া উঠিয়াছে।

গোড়ার ভাব ধরিয়াই আমি অগ্রসর হইব। আমি হিন্দু। আমি জানি আমার হিন্দুত্ব আচারে নহে অভিমতে নহে অনুষ্ঠানে নহে আমার হিন্দুত্ব আমার সত্যে। আমার নিগূঢ় সিদ্ধ স্বভাবে। আমার স্বাভাবিক প্রেরণায় বহুর মধ্যে

একত্বের অমুভব চেষ্টায়। জানি ভারতের সমগ্র ইতিহাসের মধ্য দিয়া বহু বহু সংঘর্ষে এই অমুভবের পূর্ণতার উপরেই হিন্দুর হিন্দুত্ব আপনার বিরাট মূর্ত্তি পরিগ্রহ করিতেছে। জানি হিন্দুর জাতীয়তা বিকাশে এখনও পূর্ণচ্ছেদ পড়ে নাই। এখনও অনন্ত সম্ভাবনা। তাই আমার প্রেরণার স্বরূপ, আমার মধ্য দিয়া যাহা প্রকাশিত হইবে তাহা কি সমস্তই আমি বুঝিতেছি!

নর নারীর বিভিন্ন প্রকৃতির মধ্যে পার্থক্যটাকে সত্য করিয়া দেখাটা ধর্ম নহে। ধর্ম একত্ব। ধর্ম প্রকৃতিকে অতিক্রম করিয়া আত্মার মধ্যে পরস্পরের সাক্ষাৎকার। এই দিক দিয়াই আমি নরনারীর সমানত্বের উপর সমানাধিকার প্রতিষ্ঠিত করিব। জানি অপর কোনও উপায়েই তাহা হইবে না। কোনও ফাঁকি নাই কোনও ইঙ্গিত নাই। পথ এই একমাত্র, যে পথে চলিলে অমোঘ ভাগবত বিধানে আপনিই সমস্ত সম্পন্ন হইবে।

বৈষ্ণব প্রেমের মধ্য দিয়া নারীকে তুলিতে গিয়া নারীত্বের কাছে আপনি প্রতিহত হইল। নারীর দিক দিয়াই সমস্তের পতন হইল। শাক্ত আপনাকে বড় করিয়া নারীত্বকে উঁচাইয়া যাইবার সাধনা করিয়া ছিল পুরুষের দিক দিয়াই সমস্তের পতন হইয়াছে। অতিপৌরুষ কিংবা অপৌরুষ কোনওটায় নারীত্বকে উঁচাইতে পারিবে না। নারীত্বের খোলস হইতে নারীকে বাহির করিতে হইলে স্বতন্ত্র একটা তৃতীয় পন্থা চাই। পথ সমতার উপর প্রতিষ্ঠিত। জ্ঞান হইবে অস্ত্র। শক্তি প্রেম আধার হইতে অজস্র ধারেই ঝরিবে কিন্তু সে আধার ভগবানের চরণে উৎসর্গীকৃত। তাহাতে আর “আমি” বলিয়া কিছু নাই। আছে ইচ্ছা, যে ইচ্ছা ভাগবত ভাব হইতে উদ্ভূত; আর চেষ্টা, যে চেষ্টার জাতিভেদ নাই, সে আধিকারিক পুরুষের আপনার জীবন যজ্ঞ, কেবল সমস্তের কথাই তাহার গ্রাহ।—এই পথের শেষেই একত্ব আসিবে।

ভাবটা পরিপাক করা বড় কঠিন, বুঝিয়া উঠাই অনেকের পক্ষে দুঃসাধ্য হইতেছে তাহা জানি। জীবন ছাড়িয়া উর্দ্ধে ব্রহ্মানন্দে বিভোর থাকিয়া একত্ব মধ্যে পার্থক্যকে ডুবাইয়া দেওয়া চলে,—অন্যত্র সম্ভবে না—বিশেষ আবার নরনারীর মধ্যে। আর এ পার্থক্যেরও ত একটা দিক আছে সেটা অনাদি অনন্ত সৃষ্টির চিরন্তন সামগ্রী। নর এবং নারী, এ ত মানুষের কল্পিত পার্থক্য নহে, এ ত স্রষ্টার সৃষ্টি বিশ্ববিধানের অঙ্গ। ইহাদের মিশাইয়া এক করিবে কি করিয়া? একি কখনও সম্ভব?

সম্ভব বৈকি, তবে সম্ভাবনার স্বাভাবিক দিকটা দেখিবার চক্ষু যে আমাদের

পিয়াছে। যে ভাবে সমস্ত ঘুরাইয়া দেখা আমাদের অভ্যাস তাহাতে এই সরল সত্য বুদ্ধিগোচর হইতে বহুদিন লাগিবে জানি।

আমি ত বহুপূর্বেই বলিয়াছি কোনও কিছুকেই আমি অস্বীকার করি না। আমি সমস্তেরই সার্থকতা স্বীকার করি। আমার এ একত্ব পার্থক্যকে ঘুচাইয়া নহে ত, -সমস্ত পার্থক্যকে সামঞ্জস্যে শৃঙ্খলিত করিয়া,—তাহাদের খণ্ডের ধর্ম-গুলিকে উপচিয়া দিয়া সেই প্লাবিত অগাধ অতলতার উপর।

যে ভাবে বিশ্ব বিধান অব্যাহত যে ভাবে প্রকৃতির সৃজন শক্তি অক্ষুন্ন, সেই ভাবের অনুপ্রেরণা উদ্দীপ্ত হইয়া নর নারী পরস্পর পার্থক্যের মধ্যে যে মাধুর্য যে রস তাহা স্বীকার করিবে কিন্তু লক্ষ্য থাকিবে তাহারই দিকে যে উদ্দেশ্য এই পার্থক্যের উৎসমূল। এই যৌন ও ভাগবত জীবনের একত্র সম্মিলন, একই ক্ষেত্রে জীবন ও সত্যের আনন্দ এ সত্যই অপূর্ব। সত্যই এখনও অনাবিষ্কৃত। কিন্তু ইহারই মধ্যে নর নারীর পূর্ণতা। তাহাদের পার্থক্যের সফলতা ও পরিণতি। আর ইহাই হিন্দুত্বের ভবিষ্যৎ বিকাশ। বহুদিন হইতে এমনি একটা মীমাংসার জন্ত বাঙ্গালী বারেকারে বিচিত্র ভ্রমের অনুষ্ঠান করিয়াছে।

নর নারী উভয়েই যখন এই একত্বের সাধনায় পরস্পরের মূলউৎস বুঝিতে পারিবে, সমগ্র জীবন যে একের ইচ্ছিতেই পরিচালিত তাহা বুঝিবে, তখন বহুর মধ্যেও একের মূর্ত্তিই পরিলক্ষিত হইতে থাকিবে। একত্বই থাকিবে লক্ষ্য, বহুত্ব হইবে উপায় মাত্র।—এইরূপে আমরা আধ্যাত্ম সাধনায় অন্তরে সমান হইব। বাহিরের সমান অধিকার সে ত তখন তাহারই অনিবার্য ফল।

## সহজ দান।

[ শ্রীসুবোধচন্দ্র রায় । ]

তোমার অন্তর হ'তে যা' দেবার আছে,  
তোমার মর্মের মাঝে যে বাণী বিরাজে,  
নির্ভয়ে সহজে তুমি তাহা দিয়া যাও,  
সে বাণী অকুণ্ঠকণ্ঠে জগতে শুনাও।

ভিক্ষাবুলি স্কন্ধে ল'য়ে ফিরি' দ্বারে দ্বারে,  
বাড়ায়োনা নিতি আর নিজ দৈন্ত-ভারে ;  
বাহিরের রত্ন—সে যে অন্তরের ছাই,  
বাড়ে তাহে' কমেনা তো প্রাণের বাংলাই।  
তার চেয়ে দিয়া যাও হুমুঠি ভরিয়া  
তোমার প্রাণের গাথা নিঃশেষিয়া হিয়া ;  
হউক সে ক্ষুদ্র আজ সকলের কাছে,  
সত্যের অমর বীজ তাহে রহিয়াছে।  
এক দিন মুকুলিত হ'বে তার আশা,  
ধ্বনিবে সহস্র কণ্ঠে তা'র মৌন ভাষা;  
জাগিয়া উঠিবে সুপ্ত স্তম্ভিত ধরণী  
একদা শুনিয়া তা'র মহাপ্রতিধ্বনি।

## নির্বাসিতের আত্মকথা ।

[ শ্রীউপেন্দ্রনাথ বন্দ্যোপাধ্যায় । ]

দ্বিতীয় পরিচ্ছেদ।

মাণিকতলার বাগানে যখন আশ্রমের সূত্রপাত হইল তখন সেখানে চার পাঁচ জনের অধিক ছেলে ছিল না। হাতে একটিও পয়সা নাই, ছেলেরা সকলেই বাড়ী ঘর ছাড়িয়া আসিয়াছে, স্ত্রীরাং তাহাদের মা বাপদের কাছ থেকেও কিছু পাইবার সম্ভাবনা নাই। অথচ ছেলেরদের আর কিছু জুটুক আর নাই জুটুক হুবেলা হু'মুঠা ভাত ত চাই। হু একজন বন্ধু মাসিক কিছু কিছু সাহায্য করিতে প্রতিশ্রুত হইলেন আর স্থির হইল যে বাগানে শাক সজীর ক্ষেত করিয়া বাকি খন্নচটা উঠাইয়া লওয়া হইবে। বাগানে আম, জাম, কাঁটালের গাছও যথেষ্ট ছিল। সেগুলো জমা দিয়াও কোন্ না হু দশ টাকা পাওয়া যাইবে? আর আমাদের খাইতেও বেশী খরচ নয়—ভাতের উপর ডাল আর একটা তরকারী। অধিকাংশ দিনই আবার ডালের মধ্যেই হুই চারিটা আলু ফেলিয়া দিয়া তরকারীর অভাব পূরাইয়া লওয়া হইত। সময়ভাব হইলে খিচুড়ীর ব্যবস্থা। একটা মস্ত

সুবিধা হইল এই যে বারীন তখন ঘোরতর ব্রহ্মচারী । মাছের আঁশটা পর্যন্ত বাগানে ঢুকিবার হুকুম নাই ; তেল, লক্ষা একেবারেই নিষিদ্ধ ।

উপার্জনের আরও একটা পথ বারীন্দ্র আবিষ্কার করিয়া ফেলিল—হাঁস ও মুরগি রাখা । কতকগুলো হাঁস ও মুরগি কেনাও হইয়াছিল ; কিন্তু শেষে দেখা গেল যে তাহাদের ডিম ত পাওয়াই যায় না ; অধিকন্তু তাহাদের সংখ্যা দিন দিন কমিতেছে । কতক শেষালে খায় কতক বা লোকে চুরি করে । অধিকন্তু আমাদের পাড়া পড়শীদের আমাদের বাগানে মুরগি রাখা সম্বন্ধে বিষম আপত্তি । একদিন একজন হাড়ি তাড়ী খাইয়া আসিয়া হিন্দুধর্মের পক্ষ হইতে দুই বণ্টা বক্তৃতা দিয়া মুরগি পালনের যে রকম ভীষণ প্রতিবাদ করিয়া গেল তাহাতে তাড়াতাড়ি মুরগি কয়টাকে বেচিয়া ফেলা ছাড়া আর আমাদের উপায়ান্তর রহিল না । হাড়ি বাবুটির নাম ভুলিয়া গিয়াছি । তা' না হইলে ব্রাহ্মণসভায় লিখিয়া তাঁহাকে একটা উপাধি জোগাড় করিয়া দিতাম ।

আমাদের বাজে খরচের মধ্যে ছিল—চা । ওটা না থাকিলে সংসার নিতান্তই ফিকে ফিকে, অনিত্য বলিয়া মনে হইত । বিশেষতঃ বারীন চা বানাইতে সিদ্ধহস্ত । তাহার হাতের গোলাপী চা, ভাঙ্গা নারিকেলের মালায় ঢালিয়া চক্কু বুজিয়া তারিফ করিতে করিতে খাইবার সময় মনে হইত যে ভারত উদ্ধারের যে কয়টা দিন বাকি আছে সে কয়টা দিন চা খাইয়াই কাটাইয়া দিতে পারা যায় ।

প্রথম দিনেই বারীন আইন জাহির করিয়া দিল যে নিজে রাঁধিয়া খাইতে হইবে । তা ত বটেই ; বাগানের ভিতর ত আর বাহিরের লোককে ঢুকিতে দেওয়া যায় না—বিশেষতঃ পয়সার অভাব । কিন্তু চিরদিন বাড়ীতে মায়ের হাতের আর মেসে ঠাকুরের হাতের রান্না খাইয়া আসিয়াছি । আজ এ আবার কি বিপদ ! পালা করিয়া প্রত্যহ দুই দুই জনের উপর রান্নার ভার পড়িল । স্ততরাং আমাকেও মাঝে মাঝে রন্ধন বিষয় নিগূঢ় রহস্য লইয়া নাড়াচাড়া করিতে হইত । কিন্তু ব্রাহ্মণের ছেলে হইলেও বিদ্যাটা কখনও বড় বেশী আয়ত্ত করিয়া উঠিতে পারি নাই ।

খালা, ঘটী, বাটীর নাম গন্ধ বাগানে বড় বেশী ছিল না । প্রত্যেকের এক একটা নারিকেল মালা আর একখানা করিয়া মাটির সানকি ছিল ; তাহাই আহারাদির পর ধুইয়া মুছিয়া রাখিয়া দিতে হইত । কাপড় সকলেই নিজের হাতে সাবান দিয়া কাচিয়া লইত ; যাহারা একটু বেশী বুদ্ধিমান, তাহারা পয়সার কাচা কাপড় পরিয়াই কাজ চালাইয়া দিত ।

ক্রমে ক্রমে বাংলাদেশের নানা জেলা হইতে প্রায় ২০জন ছেলে আসিয়া জুটিল । তাহাদের মধ্যে ৫১৭ জন অধিকাংশ সময় কাজকর্ম লইয়া থাকিত ; আর যাহারা বয়সে একটু ছোট তাহারা প্রধানতঃ পড়াশুনা করিত । পড়াশুনার মধ্যে ধর্মশাস্ত্র, রাজনীতি ও ইতিহাস চর্চা, আর কর্মের মধ্যে বিপ্লবের আয়োজন । অনেক রকম ছেলে আসিয়া আমাদের কাছে জুটিয়াছিল । কলেজী বিদ্যার হিসাবে কেহ বা পণ্ডিত, কেহ বা মূর্খ, কিন্তু এখন মনে হয় যে অনন্তসাধারণ একটা কিছু সকলেরই মধ্যে ফুটিয়া উঠিয়াছিল । ইস্কুলের মাষ্টার মহাশয়দের কাছে যে সব ছেলে পড়া মুখস্থ করিতে না পারিয়া লক্ষ্মীছাড়া বলিয়া গণ্য, অনেক সময় দেখিয়াছি তাহারা মনুষ্য হিসাবে “ভাল ছেলেদের” চেয়ে চের বেশী ভাল । ইংরাজীতে যাহাকে adventurous বলে, আমাদের বর্তমান জাতীয় জীবনে সে রকম ছেলের স্থান নাই ! ঘ্যান ঘ্যান করিয়া পড়া মুখস্থ করা তাহাদের পোষায় না ; কাজে কাজেই তাহারা বিশ্ববিদ্যালয়ের ত্যজ্যপুত্র । কিন্তু যেখানে জীবন মরণ লইয়া খেলা, যেখানে আমাদের ভাবী ডেপুটী-মার্কা ছেলেরা এক পা আগাইয়া গিয়া দশ পা পিছাইয়া আসে, সেখানে ঐ “দস্তি” “বয়াটে” “লক্ষ্মীছাড়া” ছেলেগুলোই হাসিতে হাসিতে কাজ হাসিল করে ।

বাগানে ছেলেদের বারীনের কাছে রাখিয়া দেবব্রত ও আমি আর একবার আশ্রমের উপযুক্ত স্থান খুঁজিতে বাহির হইলাম । দেবব্রতর তখন বাগানের কাজকর্মের সহিত ঘনিষ্ঠ সম্বন্ধ কিছু ছিল না ; কিন্তু তাহার মনটা তীর্থস্থানে সাধু দেখিবার জন্ত ব্যস্ত হইয়া পড়িয়াছিল ; কাজ কর্ম তাহার আর ভাল লাগিতেছিল না ।

প্রথমেই গিয়া আলাহাবাদে একটা প্রকাণ্ড ধর্মশালার দুই চারিদিন পড়িয়া রহিলাম । বাজারের পুরি কিনিয়া খাই, আর লম্বা হইয়া পড়িয়া থাকি । মাঝে মাঝে এক একবার উঠিয়া এ সাধু ও সাধুর কাছে তু মারিয়া বেড়াই । মাঝে একজন স্থানীয় বন্ধু জুটিয়া আমাদের ‘বুসি’ দেখাইতে লইয়া গেলেন । সেখানে দেখিলাম গঙ্গার ধারে শিয়ালের মত গর্ভ খুঁড়িয়া দুই চারিজন সাধু সেই গর্ভের মধ্যে বাস করিতেছেন । এক জায়গায় দেখিলাম একটা সিন্দুর মাখান রাম মূর্তি ; সম্মুখে ভক্ত প্রদত্ত চার পাঁচটা পয়সা, আর পাশেই একটা ছাইমাথা সাধু হাঁপানিতে ধুকিতেছেন । শুনিলাম মাটির নীচে সাধুদের সাধন ভজনের জন্ত অনেকগুলি ঘর আছে ; কিন্তু আমাদের বন্ধুটির নিকট সাধনের যে রকম বীভৎস বর্ণনা শুনিলাম তাহাতে দেবব্রতরও সাধু দর্শনের আগ্রহ অনেকটা কমিয়া গেল ।

প্রয়াগ হইতে বিক্ষাচলে আসিয়া এক ধর্মশালায় কিছুদিন পড়িয়া রহিলাম। মাঠের মাঝখানে একখানি ছোট কুঁড়েঘর বাঁধিয়া এক জটাজুটধারী বাঙ্গালী সাধু সেখানে থাকেন। প্রশ্নাম করিয়া তাঁহার কাছে বসিবামাত্র তাঁহার মুখ হইতে অনর্গল তত্ত্বকথা ও থুথু সমান বেগে ছুটিতে লাগিল। বাবাজী আহাঙ্গারদির কোনও চেষ্টা করেন না; তবে তাঁহার কাছে ভক্তেরা যা প্রশ্নামী দিয়া যায়, তাঁহার একজন গোয়াল ভক্ত তাহা কুড়াইয়া লইয়া গিয়া তাহার পরিবর্তে সাধুকে দুধসাপ্ত তৈয়ার করিয়া দেয়। ঐ দুধসাপ্ত খাইয়াই তিনি জীবনধারণ করেন। থুথু ও তত্ত্বকথা সংগ্রহ করিয়া ধর্মশালায় ফিরিয়া আসিয়া দেখি এক গেরুয়া পরিহিতা, ত্রিশূলধারিণী ভৈরবী আমাদের কঞ্চল দখল করিয়া বসিয়া আছেন। দেবব্রত ব্রহ্মচারী মানুষ, স্ত্রীলোকের সহিত একাসনে বসে না; সে ত ভৈরবীকে দেখিয়া প্রমাদ গণিল। এই সন্ধ্যার সময় তাহার পর্বত প্রমাণ বিপুল দেহ-ভার লইয়া বেচারী কঞ্চল ছাড়িয়া যায়ই বা কোথায়? ভৈরবীর আপাদ মস্তক দেখিয়া দেবব্রত জিজ্ঞাসা করিল—“আপনি কি চান?”

ভৈরবী—“আমি সাধুসঙ্গ করতে চাই।”

দেবব্রত—“সাধুসঙ্গ করতে চান, ত আমাদের কাছে কেন? দেখছেন না আমরা বাবুলোক; আমাদের পরণে ধূতি, চোখে সোণার চশমা?”

ভৈরবী—“তা হোক, আমি জানি আপনারা ছন্নবেশী সাধু।”

ভৈরবী ঠাকুর সোথান হইতে নড়িবার কোনই লক্ষণ দেখাইলেন না। শেষে অনেকক্ষণ তর্কবিতর্কের পর দেবব্রতই রণে ভঙ্গ দিয়া সে রাত্রি এক গাছ-তলায় পড়িয়া কাটাইয়া দিল।

কিন্তু ভৈরবী হইলে কি হয়, বাঙ্গালীর মেয়ে ত বটে! সকাল বেলা ঘুরিয়া আসিয়া দেখি, কোথা হইতে চাল ডাল জোগাড় করিয়া ভৈরবী রান্না চড়াইয়া দিয়াছেন। বেলা ১০টা না বাজিতে বাজিতে আমাদের জন্য খিচুড়ী প্রস্তুত। কামিনী-কাঞ্চনে ব্রহ্মচর্যের ব্যাঘাত ঘটাইতে পারে, কিন্তু কামিনীর রান্না খিচুড়ী সম্বন্ধে শাস্ত্রের ত কোন নিষেধ নাই; স্ত্রীরাম আমরা নির্বিবাদে সেই গরম গরম খিচুড়ী গলাধঃকরণ করিয়া ফেলিলাম। আমাদের খাওয়া দাওয়া শেষ হইলে তবে ভৈরবী আহাঙ্গার করিতে বসিলেন। দেখিলাম বাঙ্গালীর মেয়ের দেহ-ক্ষুধাতুর প্রাণটুকু গৈরিকের ভিতর দিয়াও ফুটিয়া বাহির হইতেছে।

বিক্ষাচল হইতে চিত্রকুটে আসিলাম। ষ্টেসনে নামিতে না নামিতে ছোট বড় মাঝারি অনেক রকমের পাণ্ডা আমাদের উপর আক্রমণ করিল। আমরা

যে তীর্থ দর্শন করিয়া পূণ্য-সঞ্চয়ের বুদ্ধি হইতে চিত্রকুটে আসি নাই, এ কথা ভাদ্রা ভাদ্রা হিন্দাতে অনেকক্ষণ বক্তৃতা দিয়া তাহাদের বুঝাইলাম। কিন্তু তাহারা ছিনেজোকের মত আমাদের সঙ্গে লাগিয়াই রহিল। তাহাদের হাত হইতে নিষ্কৃতি পাইবার আশায় আমরা পাণ্ডাদের আস্তানা ছাড়িয়া নদীর ধারে একটা পোড়ো ঠাকুরবাড়ীতে আসিয়া আড্ডা গাড়িলাম। কিন্তু পাণ্ডাদের অদ্ভুত অধ্যবসায়! পাঁচ সাতজন আমাদের ঘিরিয়া বসিয়া রহিল। তীর্থে আসিয়া ঠাকুর দর্শন করে না—এ আবার কেমন তীর্থযাত্রী! তিন চার ঘণ্টা বসিয়া থাকিবার পর গালি দিতে দিতে একে একে সকলেই পৃষ্ঠ প্রদর্শন করিল—কেবল একটা ১০১২ বছরের ছোট ছেলে নাছোড়বান্দা। সে তখনও বক্তৃতা চালাইতে লাগিল। একখানি হাত আপনার পেটের উপর রাখিয়া আর একখানি হাত দেবব্রতের মুখের কাছে ঘুরাইয়া বলিল—“দেখ, বাবু—যে জীবাশ্মা, সেই পরমাশ্মা। আমাকে খাওয়ালেই তোমার পরমাশ্মার সেবা করা হবে।” পেটের আলার সঙ্গে পরমার্থের একরূপ ঘনিষ্ঠ সম্বন্ধের কথা শুনিয়া দেবব্রত হাসিয়া ফেলিল। বলিল—“দেখ, তোর কথাটার দাম লাখ টাকা। তবে আমার কাছে এখন অত টাকা নেই বলে তোকে এ বাত্মা একটা পয়সা নিয়েই বিদায় হতে হবে।”

যে ঠাকুর বাড়ীতে আমরা পড়িয়া রহিলাম, তাহার চারিদিকে গাছে গাছে বানর ছাড়া আর কোন জীবের দেখা সাক্ষাৎ পাওয়া বাইত না। সেখান হইতে প্রায় এক মাইল দূরে রেওয়ার রাজা বৈষ্ণব সাধুদের জগু একটা মঠ তৈয়ারি করিয়া দিয়াছেন। সেখানে “আচারী” ও “বৈরাগী” প্রধানতঃ এই দুই সম্প্রদায়ের বৈষ্ণব সাধুরা থাকেন। তাঁহাদের দুই একজনের সঙ্গে মাঝে মাঝে দেখা সাক্ষাৎ হইত।

একদিন সকাল বেলা বসিয়া আছি এমন সময় সেখানে একজন সন্ন্যাসী আসিয়া উপস্থিত। তিনি যুবা পুরুষ; বয়স আন্দাজ ৩২৩৩; পরিচয়ে জানিলাম তাঁহার জন্মস্থান গুজরাত; তাঁহার গুরুর আদেশ অনুযায়ী এই অঞ্চলে ঘুরিয়া বেড়ান। আমাদের যে রাজনীতির সহিত কোনও সম্পর্ক আছে তাহা তিনি কি করিয়া টের পাইলেন, ভগবানই জানেন। দুই একটা কথা পরই তিনি আমাদের বলিলেন—“দেখ, তোমরা যে মনে কর, এ অঞ্চলের লোক দেশের অবস্থা বুঝেনা—সেটা মিথ্যা। সময় আসিলে দেখিবে ইহারাও ভিতরে ভিতরে প্রস্তুত হইয়া আছে।” আমরা কথাটা চূপ করিয়া শুনিলাম—



দেখি শ্রদ্ধা কোন্ দিকে গড়ায়। তিনি বলিতে লাগিলেন—“দেখ, তোমাদের একটা কথা বলিয়া রাখি। বিশ্বাস কর ত কথাটা খুবই বড়, আর না কর ত বাজে কথা বলিয়া ফেলিয়া দিও। জগতে ধর্মরাজ্যস্থাপনের জন্ত ভগবান আবার অবতীর্ণ হইয়াছেন; তবে এখনও প্রকট হন নাই। তাঁহাকে নরদেহে টানিয়া আনিবার জন্তই যোগীদের সাধনা; সে সাধনা এবার সিদ্ধ হইবে। ভারতের ছুখ তখনই ঘুটিবে।”

আমরা জিজ্ঞাসা করিলাম—“আপনি এ সংবাদ জানিলেন কিরূপে?”

সন্ন্যাসী বলিলেন—“আমি সন্ন্যাস লইবার পূর্বে হনুমানজীর সাধন করিতাম। অনেক সাধন করিয়া কোন ফল না পাওয়ায় একবার নিরাশ হইয়া দেহত্যাগ করিতে যাই। সেই সময় হনুমানজী আমার নিকট প্রকাশিত হইয়া এই আশার সংবাদ আমাকে দিয়া জান।” ব্যাপারটা সন্ন্যাসীর মাথার খেয়াল, কি ইহার মূলে কোন সত্য আছে তাহা ভগবানই বলিতে পারেন।

সন্ন্যাসীর নিকট হইতে বিদায় হইয়া আমরা একবার অমরকণ্টক যাইব স্থির করিলাম। বিদ্যা পর্বতের যেখান হইতে নর্মদার উৎপত্তি, অমরকণ্টক সেইখানে। কোন্ ষ্টেশনে নামিয়া কোথা কোথা দিয়া যে সেখানে গিয়াছিলাম এই দীর্ঘকাল পরে তাহার সবই ভুলিয়া গিয়াছি। শুধু মনে আছে যে রাস্তায় একজন আসানী ভদ্রলোকের বাড়ী অতিথি হইয়া দিন দুই বেশ চব্যচোষ্য আহার করিয়াছিলাম। বিদ্যা পর্বতটা কিন্তু আমাদের ভাল লাগিল না। পাহাড়টা কেমন নেড়া নেড়া মনে হইতে লাগিল। শৃঙ্গসম্বলিত হিমালয়ের কেমন একটা প্রাণকাড়া সৌন্দর্য্য আছে; বিদ্যাচলের তাহার নামগন্ধও নাই। তিন চার দিন চড়াই উৎরাই এস পর যখন অমরকণ্টকে পৌঁছিলাম, তখন দেখিলাম উহা আশ্রমের উপযুক্ত স্থান একেবারেই নয়। চারিদিকে শুধু বনজঙ্গল আর মাঝখানে একটা ভাঙ্গা ধর্মশালায় জনকয়েক রামায়ণ সাধু বসিয়া গাঁজা খাইতেছে। যেখানে পাহাড় হইতে বৃদ্ধ বৃদ্ধ করিয়া নর্মদার ধারা বাহির হইতেছে সেখানে নর্মদা দেবীর একটা ছোট মন্দির আছে; তাহাও সংস্কারাভাবে নিতান্তই জীর্ণ। অমরকণ্টক এক কালে যে বৌদ্ধদিগের তীর্থ ছিল তাহার নিদর্শন এখনও সেখানে বর্তমান। ব্রহ্মদেশীর পাগোদার মত অনেকগুলি কাঠের মন্দির সেখানে রহিয়াছে। কোন কোনটার মধ্যে বুদ্ধমূর্তি এখনও প্রতিষ্ঠিত, কোথাও না অণু সম্প্রদায়ের সাধুরা বুদ্ধমূর্তি সরাইয়া দিয়া রাম বা কৃষ্ণ মূর্তি স্থাপিত করিয়াছেন। চারিদিকে শালবন, সেখানে বাঘের দৌরাঙ্গ্যও যথেষ্ট। আশপাশের গ্রাম হইতে গরু ছাগল প্রায়ই

বাঘে লইয়া যায়। যখন দুই চারজন মানুষকে লইয়া বাঘে টানাটানি করে তখন রেওয়া রাজ্যের সিপাহীরা এক শ' বৎসর আগেকার মুঙ্গেরী বন্দুক লইয়া গোটা দুই ফাঁকা আওয়াজ করিয়া কর্তব্য পালন করে। সাধারণ লোকদের ও বাঘের হাতে মরা সহিয়া গিয়াছে। জঙ্গলে ঢুকিবার আগে তাহারা বাঘের দেবতার পূজা দেয়, তাহার পরেও যদি বাঘে ধরে, ত সেটাকে পূর্বজন্মের কর্মফলের উপর বরাত দিয়া নিশ্চিত হয়। সাধুদেরও সেই অবস্থা; তবে তাঁহারা নর্মদা পরিক্রম করিতে বাহির হইবার সময় প্রায়ই দল বাঁধিয়া বাহির হন। এই নর্মদা-পরিক্রম আমার বড়ই অভূত ব্যাপার বলিয়া মনে হইল। অমরকণ্টক হইতে আরম্ভ করিয়া পদব্রজে নর্মদার ধারে ধারে গুজরাত পর্যন্ত যাইতে ও গুজরাত হইতে পুনরায় নর্মদার অপর পার ধরিয়া অমরকণ্টকে ফিরিয়া আসিতে চার পাঁচ বৎসর লাগে। কোন কোন জীলোককে গণ্ডি খাটিতে খাটিতে নর্মদা পরিক্রম করিতে দেখিয়াছি।

অমরকণ্টকের চারিদিকে ১০১২ ক্রোশ পর্যন্ত বনে জঙ্গলে ঘুরিলাম, কিন্তু আমাদের আশ্রমের উপযোগী স্থান কোথাও মিলিল না। পাহাড় হইতে অগত্যা নামিতে হইল। নামিয়াই দেখিলাম—বারীনের চিঠি বলিতেছে “শীঘ্র ফিরিয়া এস।”

## ব্রাহ্মণ।

( শ্রীসতীনাথ বন্দ্যোপাধ্যায় )

বিশ্বের ছয়ারে আজি হে নিঃস্ব ব্রাহ্মণ!  
বৃথা কেন শোক কর ব'সে,  
ভেবে দেখ নিঃস্ব তুমি কিসে!  
অনন্ত জ্ঞানের খনি হৃদয় তোমার,  
অনন্ত ত্যাগের ফল প্রাণ,  
সেই তুমি—ত্যাগাদর্শ জগতের,  
চাহ কার দান ?

শূন্যের অনন্ত পথে হে পুণ্য-ব্রাহ্মণ !  
 উঠেছিল আশ্বাসের গান,  
 তুমি—তুমি—তুমি তার প্রাণ ।  
 লক্ষ্যভ্রষ্ট ছুটেছিল ব্যাকুলা ধরণী,  
 বেঁধে দিলে হৃদয় প্রেম ডোরে,  
 সেই তুমি—প্রেমাদর্শ জগতের,  
 ভাস আঁধি লোরে !

বনানী বাছিয়া নিলে হে জানী ব্রাহ্মণ,  
 শম-দম-তপঃ শৌচ কমা—  
 তুমি মাত্র তোমার উপমা ।

কক্ষে প্রদানিলে তুমি সসাগরা ধরা,  
 ভিক্ষাবৃত্তি জীবিকা তোমার,  
 সেই তুমি—জ্ঞানাদর্শ জগতের,  
 কেন মোহ-ভার !

ধর্মের আসনে বসি' হে কস্মী-ব্রাহ্মণ,  
 জগতের শিক্ষা দিলে দান,  
 কেঁবা আছে তোমার সমান ?  
 তোমার কর্মের ফল বৈশ্য সমর্পিয়া,  
 ধর্মমাত্র আশ্রয় তোমার,  
 যেই তুমি—ধর্মাদর্শ জগতের,  
 কি অভাব তার !

শক্তির ভাণ্ডার তুমি হে মুক্ত ব্রাহ্মণ,  
 শক্তি নিজে শক্তি শিক্ষা করে,  
 বসে আছ কাহার দুয়ারে !  
 সেবাত্রত প্রচারিলে শক্তির সন্ধান,  
 শূদ্র তার ফল মধুময়,  
 সেই তুমি—সেবাদর্শ জগতের,  
 কর কার ভয় !

হে কস্মী, হে জানী ত্যাগী, হে মুক্ত ব্রাহ্মণ !  
 বারেক উঠিয়া দেখ চেয়ে,  
 তোমারি সাধনা ফলে জেগেছে ধরণী,  
 তুমিই উজানে গেছ বেয়ে !

## প্রতিবাদ ।

( শ্রীঅতুলচন্দ্র দত্ত । )

A Seeker after truth and Helper of his comrades  
 'Thy charity extend, if not thy ear, friend—'

আধিনের 'ভারতবর্ষে' প্রদ্বৈয় শ্রীযুৎ জগদানন্দ রায় মহাশয়ের নাম স্বাক্ষরিত 'ভৌতিককাণ্ড'-শীর্ষক প্রবন্ধ দেখে পরম উৎসাহে পড়তে আরম্ভ করলাম— এই আশায় যে প্রেতত্ত্ব যখন পাশ্চাত্যদেশের মনীষী বৈজ্ঞানিকদের দ্বারা বহুকাল যাবৎ বৈজ্ঞানিক উপায়ে আলোচিত হচ্ছে, তখন আমাদের দেশের একজন জনপ্রিয় বৈজ্ঞানিক প্রবন্ধ-লেখক নিশ্চয়ই কিছু নূতন তত্ত্বের সন্ধান দেবেন। কিন্তু প্রবন্ধটি পড়া শেষ করে বুঝলাম, রায় মহাশয়ের উদ্দেশ্য নয়, কোনো নূতন তত্ত্বের খবর দেওয়া; উদ্দেশ্য হচ্ছে এ জাতীয় আলোচনাকে মামুলি-মুক্তিতে বিক্রপ করে, হেসে উড়িয়ে দেওয়া। কাজেই খুব নিরাশ হলাম; শুধু নিরাশ বলে মন কথা খোলসা করে বলা হয় না; খুবই ব্যথিত হলাম; এবং রায় মহাশয়ের হাসিঠাট্টার স্বর দেখে একটু রাগলামও বটে— যদিচ সে রাগে তাঁর কিছু এসে যাবে না, আমারই ঘরের ভাতের ধ্বংস হবে!

দুঃখ হল মনীষি বৈজ্ঞানিক সার অলিভারের প্রাণপণ সত্যসাধনাকে লক্ষ্য করে তিনি ব্যক্তিগত বিক্রপ করেছেন! এবং তাঁর জীবনব্যাপী আলোচনা গবেষণাকে তুচ্ছজ্ঞান করে তাঁর বিশ্বাস বা মতকে ব্যক্তিগত অরাদৌর্কল্যের লক্ষণ বলে সিদ্ধান্ত করেছেন। জগদানন্দ বাবু যে ইচ্ছা করে এই প্রবীণ সত্যসাধককে ঠাট্টা করেছেন তা মনে হয় না; এ তাঁর অজ্ঞতা ও নিজ বিশ্বাসের প্রতি অতি-শ্রদ্ধার ফল। একটা বিরুদ্ধ মতকে ঠাণ্ডামেজাজে শিষ্ট-গাঠিনে আলোচনা করবার মত মনের উদারতা ও ধৈর্যের অভাব অনেক গুণী জ্ঞানীরই কাজে ও কথায় দেখা যায়; রায় মহাশয়কেও আমরা এই শ্রেণীর সমালোচক

ভাবে দেখবো সে আশা করিনি বলে তাঁর প্রবন্ধের ধরণে আরো ক্ষয় হয়েছি। আমি অন্ততঃ এইটুকু তাঁর কাছে আশা করেছিলাম যে, সাধারণ দরের লোকের চেয়ে গুণী-জ্ঞানী সত্যকামী ধরাপূজ্য পণ্ডিতদের মত বিশ্বাস সম্বন্ধে লিখিত পরিচয় দিতে গেলে তিনি একটু সাবধানে ভেবে চিন্তে কথা বলবেন। কিন্তু তিনি তা করেন নি। আমরা নির্দোষভাবে অনেক সময় মহাজ্ঞানদের কাজ-কর্ম নিয়ে হাশ্বরহস্য করতে গিয়ে তাঁদের প্রতি বড় অবিচার করে বসি, এবং সত্যপ্রচারের পক্ষেও বড় ক্ষতি করে বসি। প্রেততত্ত্ব সম্বন্ধে হয়তো রায় মহাশয়ের একটা স্বভাব বা সংস্কারগত বিরাগ আছে; তা থাকতে পারে, অনেকেরই আছে ও ছিল; কিন্তু নিজের জন্মগত সংস্কারের খাতিরে একটা আধুনিক আলোচ্য তত্ত্বকে হেসে উড়িয়ে দিতে গিয়ে জ্ঞানবন্ধু সত্যপিপাসু পণ্ডিতকে বিক্রপ করাটা খুব রুচিসংগত কাজ বলে মনে হয় না।—রায়মহাশয় প্রবন্ধ শেষে মত প্রকাশ করেছেন—পুত্রশোকাতুর জরা জীর্ণ বৃদ্ধা লজের মতিগতি এখন সাঙ্ঘন্যের আশায় ভূতের আশ্রয় লইতেছে।

কিরূপ মানসিক তর্কপ্রণালী অবলম্বন করে যে রায়মহাশয়—সার অলি-ভাষের প্রেতবাদে বিশ্বাস নিয়ে এ রকম সিদ্ধান্ত প্রকাশ করেছেন তা বোঝা খুব শক্ত নয়। তর্কপ্রণালীটা হচ্ছে এই যথা—‘ভূতে প্রেতে বিশ্বাসটা অজ্ঞানী কুসংস্কারী ধর্ম, সভ্য শিক্ষিত, উন্নত লোকের শোভা পায় না, বিশেষতঃ ঊনবিংশ শতাব্দীর বৈজ্ঞানিকের পক্ষে; পাশ্চাত্য বিজ্ঞান পড়ে ভূতপ্রেতে অতিপ্রাকৃতে বিশ্বাস খুবই লজ্জার কথা; মানসিক অপভ্রংশ, বা বুদ্ধিবিকার না হলে এমন মতিগতি হয় না; তা যদি হয় তবে লজ্জা একজন বৈজ্ঞানিক হয়ে ভূতে বিশ্বাস করলেন কেন? ঘোর সমস্তা বটে! লজ্জা যে একজন বড়দরের বৈজ্ঞানিক তার ভুল নেই; আবার ভূতে বিশ্বাসবান, তারও ভুল নেই; এখন এমন কেন হল? লজ্জা যে বিজ্ঞানের ও বৈজ্ঞানিক জগতের মুখে কালি দিয়ে বসলেন! কি করে বিজ্ঞানের Prestige বাঁচানো যায়—এই হল রায়মহাশয়ের মনোগত সমস্তা! বিজ্ঞানের মুখ রক্ষা করতে গেলে বলতে হয়—‘হয় লজ্জা বৈজ্ঞানিক নয়’ না হয় তাঁর Senile decayর বা পুত্রশোকের ধাক্কা মতিগতি বিকল হয়েছে। কিন্তু লজ্জা বড় বৈজ্ঞানিক অস্বীকার করা যায় না, ergo প্রতিপন্ন হচ্ছে বৃদ্ধবয়সে পুত্রশোকে তাঁর এমন দুর্গতি ঘটেছে।’

সার অলিভারের মনস্তত্ত্ব বিশ্লেষণ করে রায় মহাশয় যে সিদ্ধান্ত করেছেন সে গুট তত্ত্বটা আমিও রায়মহাশয়ের মনস্তত্ত্ব বিশ্লেষণ করেই পেয়েছি। কারণ

একজনের কাজের কারণ নির্ণয় দূর হতে আর একজনকে করতে হলে তাঁর মনস্তত্ত্ব-সাগরে ডুব দিতে হবেই।

আর রায়মহাশয়ের উদ্দেশ্যই যে বিজ্ঞানের মুখরক্ষা তা বোঝা যায় এই হতে যে তিনি লজ্জা সাহেবকেই বাঁচাতে ব্যস্ত। সার কনান ডয়েলের প্রেতবিশ্বাস নিয়ে মাথা ঘামান নাই; কারণ সম্ভবতঃ এই, যে ইনিতো কল্লনা-কুশল গল্প লেখক, স্বভাবে খেয়ালী; তাঁর বিশ্বাস অবিশ্বাসে বিজ্ঞানের লাভ ক্ষতি নাই।

সে যাক। লজ্জা সাহেবের মনস্তত্ত্ব বিশ্লেষণ করতে গিয়ে তিনি যে দায়িত্ব-হীন উক্তি করেছেন, সেরূপ দায়িত্বহীন উক্তি অন্ততঃ নির্দোষ রহস্যচ্ছলে করা হলেও অনেক সময় বড় অপ্রিয় ফলের ও তর্কের অবতারণা হয়। আমার মনে হয় এই কথা কটাতে রায়মহাশয় খুব সম্ভব না জেনে ছুটি অপরাধ করেছেন; প্রথম সার অলিভারের মত প্রবীণ নিঃস্বার্থ বিজ্ঞানবন্ধুকে একটা ব্যক্তিগত স্বার্থের বশীভূত হওয়ার দোষে ছুঁতে করেছেন। দ্বিতীয় একটা নূতন সত্য বা তত্ত্বের রহস্যভেদের বিজ্ঞানসম্মত চেষ্টাকে হেয় জ্ঞান করেছেন—আমি যদি এই অল্পমান ভুলভাবে করে থাকি তাহলে রায়মহাশয় আমায় মাফ করবেন। তবে কেন যে আমি এই দুই সিদ্ধান্ত করলাম তার কারণ দেখাচ্ছি।

আমার প্রথম সিদ্ধান্ত রায় মহাশয়ের নিজ উক্তির উপর নির্ভর করেই হয়েছে। সরল ভাষার সিদ্ধান্ত অর্ধ ধরে মানে করলে তাঁর লিখিত উক্তি হতে অন্য কোনো সিদ্ধান্ত হয় না। যে কেউ এটা পড়েছেন তিনিই এমনি বুঝেছেন। দ্বিতীয় সিদ্ধান্ত আমার প্রথমেরই করোলারী। কোনো এক নিরপেক্ষ তত্ত্ব-অল্পসঙ্কীর্ণকে হীন স্বার্থ দ্বারা গবেষণায় নিযুক্ত বলে দোষারোপ করলে প্রকারান্তরে সেই তত্ত্ব উদ্ঘাটনের পথে বাধা দেওয়া হয়। যারা সত্যই এই ব্যাপারটা বুঝতে চান তাঁরা যদি আমার প্ররোচনায় বিশ্বাস করেন যে আমি অন্ধ সংস্কারের বশবর্তী বা স্বার্থের লোভে, স্বর্থের লোভে এই তত্ত্ব আলোচনা করছি, তা হলে উৎসুক ব্যক্তির স্বতঃই এই তত্ত্ব শ্রদ্ধাহীন হবেন। কাজেই যেখানে একজনের জীবনব্যাপী চেষ্টার ফলে একটা অজ্ঞাত জ্ঞান রাজ্যের রহস্য প্রকাশ হবার নিঃস্বার্থ চেষ্টা হচ্ছে এবং চেষ্টা সফল হলে মানুষের জ্ঞান বাড়বে, সেখানে সেই লোক বা তাঁর চেষ্টা সম্বন্ধে আমাদের পারতপক্ষে খুব সাবধানী ও শ্রদ্ধায়ুক্ত হওয়াই উচিত।

রায় মহাশয় স্বমুখেই স্বীকার করেছেন যে যে বিষয়ে লজ্জ, ক্রুকস্ ওয়ালেস্, জেমস্, সেজউইক প্রভৃতি বিজ্ঞানধুরন্ধরেরা তদগত ভ্রম হয় উঠে পড়ে লেগেছেন, সে বিষয় হেসে উড়িয়ে দেবার মত জিনিস নয়; আর হেসে উড়িয়ে দেওয়ার দিনও নেই। রায় মহাশয় নিশ্চয়ই খপর রাখেন যে, পাশ্চাত্য দেশের যাবতীয় পণ্ডিতরাই হেসে উড়িয়ে না দিয়ে স্বচেষ্টায় একটা বৈজ্ঞানিক সভা করে আজ ৩০-বৎসর যাবৎ এই তত্ত্ব আলোচনা করেছেন। আর আলোচনা সভার কাজ লোক চক্ষুর বা জ্ঞানের অন্তরালেও হচ্ছেনা, প্রকাশ্য ভাবেই হচ্ছে!—এবং observation ও experiment এই দুই বিজ্ঞান সঙ্গত উপায়েই আলোচনা গবেষণা হচ্ছে—ফাঁকি জুয়োচুরী বা লোক ঠকানোর উদ্দেশ্যে নয়। এবং রায় মহাশয় এও জানেন যে ঐ দুই উপায়ে (Obs. & Exp) প্রাপ্ত fact সত্য বলে সিদ্ধান্ত হলে বৈজ্ঞানিকরা তাদের কারণ নির্ণয় জন্ত একটা Hypothesis করেন, এবং যে Hypothesis দিয়া বেশী ভাগ সত্য ঘটনা প্রাকৃতিক নিয়মে সহজ ভাবে ব্যাখ্যাত হয় তাকেই working hypothesis বলে গণ্য করা হয়। পরে নূতন facts আবিষ্কৃত হলে এবং উক্ত মতে ব্যাখ্যাত না হলে সেটাকে অগ্রাহ্য করা হয়। তিনি বিজ্ঞানার্চাধ্য, তাঁকে এসব কথা শোনানো আমার ধৃষ্টতা মাত্র, তবে নিজের কথা পরিষ্কার করে বলতে হচ্ছে বলে এসব কথা। অলৌকিক এই সব ঘটনা চাক্ষুষ প্রত্যক্ষ করে গবেষণা কারী পণ্ডিতেরা দুটা Hypothesis খাড়া করেছেন। প্রথম:—Telepathy অতীন্দ্রিয় উপায়ে ভাব চালনা। দ্বিতীয়—প্রেতমটিত (Spirit Hypothesis)। সাইকিক্যাল রিসার্চকারীরা উপস্থিত দুইদলে বিভক্ত। একদল (অল্প সংখ্যক) Telepathy মতের সমর্থক। দ্বিতীয় দল প্রেতবাদী, ইহারা সংখ্যায় বহু। সার অলিভার এই দ্বিতীয় দলভুক্ত। উপরন্তু আজ ৩০ বৎসরেরও অধিক কাল হতে তিনি এই মতের সমর্থক। তিনি তখন মাত্র ৪০ কি ৩৫ বৎসর বয়স্ক। তখন তিনি পুত্র শোকাতুর হন নাই।

১৯১১ সালে প্রকাশিত তাহার Survival of Man নামক গ্রন্থে তিনি লিখেছেন—“The first thing we learn, perhaps the only thing we clearly learn in the first instance is Continuity, etc. page 339। তাঁহার পুত্র রেমণ্ড ১৯১৫ সালে বর্তমানযুগে মারা যান।

রায় মহাশয় একটু কষ্ট স্বীকার করে যদি অলিভার লজ্জের রচিত গ্রন্থ গুলি বা প্রেততত্ত্ব সভার বিবরণী গুলি অপাঠ্য বলে অগ্রাহ্য না করে পড়েন তা হলে বুঝবেন প্রেততত্ত্ব বিশ্বাস পুত্রশোকাতুর বুড়া লজ্জের ভীমরতি নয়, পক্ষান্তরে বহু বর্ষব্যাপী ধীর গবেষণার ফল।

কোনো একটা নূতন মত আমার বুদ্ধির ধারণাতীত বলে বা হাল-ফ্যাশান অস্থায়ী নয় বলে যদি না মানি তাহলে আমি আমার প্রকৃষ্ট বুদ্ধির নিজে তারিফ করতে পারি, অথ সত্যপ্রিয় বিবেচকরা তা করবেন না।

আর এক কথা বুড়া লজ্জের ভীমরতি বা বুদ্ধিবিকার হলেও আর যত উক্ত মতাবলম্বী পণ্ডিতাগ্রগণ্য আছেন তাঁরাও কি ঐ রকম সব একটা স্বার্থের আশ্বাসে বা বিকৃত বুদ্ধিফলে এই মত মেনেছেন? আবার কেমন সব পণ্ডিত? যারা জড় বিজ্ঞান শাস্ত্রের এক রকম জন্মদাতা বলেই হয়! রাসেল, ওয়ালেস, উইলিয়ম ক্রুকস, লম্বসো, রিসেট, লর্ড র্যালো সব বিজ্ঞান ধুরন্ধর! দার্শনিক-রাজ হাঁরি বারস, সেজ উইক, উইলিয়ম জেমস্ এঁরাও কি বিকৃতবুদ্ধি? আমরা নকল ভাষায় ঘাঁদের বই পড়ে বিশ্ব বিদ্যালয়ের শুধু তকমা পেয়েছি এ-হেন আমরা যখন ও-হেন পণ্ডিতদের মতামত নিয়ে রহস্য বিক্রপ করবো তখন আমাদের উচিত একটু ভেবে চিন্তে মত প্রকাশ করবো! জোর আমি বলতে পারি, “সার লজ্জ বা অমকের সিদ্ধান্তটা তেমন মনে ঠেকছেন। আমি সমস্ত সাক্ষ্য প্রমাণ ভাল করে ওজন করে এ সিদ্ধান্তে আসতে পারছি না।” এর বাইরে আমি যদি যাই বা কিছু বলি এবং অবহেলা করে বলি তা হলে লোকে আমার বুদ্ধির বা রুচির বাহবা দেবে না নিশ্চই।

আবার কেমন ধরণে গ্রাহ্য এই সব Evidence? Times পত্রিকার এক লেখক বলছেন “The standard of evidence required by Psychical Researchers is about five times stricter than that required to hang a man for murder. Mr. Podmores' standard is several degrees stricter than that!” Dr. Haldar, Psy. Re. Page 6.

এমনি ভাবে ওজন করা হাজার হাজার evidence এই সভা সংগ্রহ করেছেন। এই সব evidence লক্ষ fact কোনো যথার্থ বৈজ্ঞানিক পণ্ডিত অগ্রাহ্য করতে পারেন না। এমনি ভাবে পরীক্ষিত সব সত্য ঘটনাকে কারণ দিয়ে ব্যাখ্যা করতে গিয়ে জন্ম-সন্দেহবাদী দিগ্গজ পণ্ডিতেরা বিদেহ-আত্মার অস্তিত্ব স্বীকার করতে বাধ্য হয়েছেন! অতঃপর আমি সে সব মানিনি

বলে প্রকারান্তরে দুটা কথা বলা হয়; প্রথম আমি অস্বাস্ত সর্কজ—দ্বিতীয় আমি ছাড়া আর সব পণ্ডিত হয় বোকা, অজ্ঞ, কুসংস্কারাচ্ছন্ন না হয় ইচ্ছাকরে মিথ্যাবাদী প্রবঞ্চক। যদি আমার সর্কজ-আমি অস্বাস্ত হন তা হলে অবশ্য অপর যে সব 'তুমি' 'তিনি' তাঁরা মিথ্যাবাদী বা ভুলবাদী। এখন পাঠকদের ওপর ভার এইটীর সত্য নির্ণয় করা যে সারাজীবন ধরে হাতে কলমে যে সব পণ্ডিত পরীক্ষা করছেন তাঁরা ভুল করছেন, কি উদাসীন আনাড়ী আমি ভুল করছি।

কেহ যদি আশ্রয় সমর্থনের জন্ত বলেন এই সভার সংগৃহীত ঘটনাগুলি বা সাক্ষ্যপ্রমাণ গুলি যে সঠিকভাবে লিপিবদ্ধ তার প্রমাণ কি? উত্তরে এই বক্তব্য যে এই সভায় এমন সব নামজাদা সভ্য আছেন যারা প্রেতবাদ আদৌ মানেন না, যাদের attitude ঘোর সন্দেহ বা অবিধাসের—এমন সব লোকের চোখে ধূলা দিয়ে কাজ করবার সাহস প্রবৃত্তি বা শক্তি কারো হতে পারেনা—বিশেষ যখন গণ্যমান্য সত্যপিপাসু পণ্ডিতদের নিয়ে এই সভা।

রায় মহাশয় কি বলতে চান জানিনা। তাঁর যদি মনোগত ভাবটা এই হয় যে লজ্জ বা কনান ডয়েল প্রভৃতির credulity অতিমাত্রায়; কেবল বিশ্বাস করবার বোঁকেই বিশ্বাস করেন, তা হলে তিনি সমস্ত তত্ত্ব না জেনে এদের উপর অবিচার করেছেন।

তিনি নিজে বিজ্ঞানের অধ্যাপক, অন্ততঃ বৈজ্ঞানিক তর্কে প্রেতবাদটা যে মিথ্যা বা শ্রাস্যসঙ্গত নয় প্রমাণ করতে গেলে তাঁকে এর বিরুদ্ধে বিশ্বাস্য সাক্ষ্য প্রমাণ হাজির করতে হত; পুত্রশোকাতুর বৃদ্ধের অন্ধ আশ্বাস বিশ্বাস বলে বিক্রম করে ওড়ালে তাঁকে কেউ বাহাদুরী দেবে না। সে ক্ষমতা বা তদুপ-যোগী পড়া শুনা বা সময় যদি তাঁর না থাকে তা হলে তাঁর সম্বন্ধে সন্দেহ বলা উচিত ছিল,—“বিষয় আমি জানিনি শুনি নি কিছু, বা আলোচনা করিনি; অন্ততঃ না জেনে শুনে পণ্ডিতদের জীবনব্যাপী গবেষনার নিতান্ত বিরুদ্ধে কিছু বলতে যাইনি”। বিবেচক লেখকের পক্ষে এই ভাবটাই সমীচীন নয় কি? লজ্জ সাহেব যেন বৃদ্ধ ও পুত্র শোক বিরক্ত; কুক্স ওয়ালেস্, জেমস্, লস্‌সো, সার কনান ডয়েল এঁরাও কি তাই?

পণ্ডিতপ্রবর কুক্স উক্ত S. P. R. এর সভাপতি হয়ে ১৮৯৮ খৃষ্টাব্দে যে অভিভাষণ করেন তা হতে একটু তুলে দি, রায় মহাশয় ধৈর্য্য ধরে একটু শুনবেন কি?—“Thirty years have passed since I published an account of experiments tending to show that outside our scientific

knowledge there exists a force exercised by *intelligence differing from the ordinary intelligence* common to mortals • • • To ignore the subject would be an act of cowardice, an act I feel no temptation to commit—To stop short in any research that bids fair to widen the gates of knowledge, to recoil from fear or adverse criticism is to bring reproach on science. There is nothing for the investigator to do but to go straight on to explore up and down, inch by inch with the taper of reason, to follow the light wherever it may lead, even should it at times resemble a will-o-wisp. I have nothing to retract.” সন্দেহ সন্দেহ বৈজ্ঞানিকপ্রবর Huxleyর জ্ঞানগর্ভ কথাগুলো ভুলবেন না—Sit down before fact as a little child, be prepared to give up every preconceived notion, follow humbly wherever and to whatever abysses Nature leads.”

যথার্থ বৈজ্ঞানিকের এই মনোভাব, আর কার্যধারা। এবং প্রবীণ বিজ্ঞানচার্য্য সার অলিভার এই ভাব ও এই ধারা মনে রেখে ৩০ বৎসরব্যাপী সাবধান গবেষণার পর বলছেন—“Every kind of alternative explanation including the almost equally unorthodox one of *telepathy from living people* have been tried and these attempts have been perfectly legitimate. If they had succeeded, well and good, but in as much as in my judgment there are phenomena which they cannot explain and in as much as some form of spirit hypothesis given some postulates explains practically all I have found myself driven back on what I may call the commonsense explanation” Raymond page 369.

পাঠক দেখিবেন—সার লজ্জ কেবল জ্ঞানের খাতিরে বিশ্বরহস্য ভেদ চেষ্টিয়া ব্যস্ত; পুত্রশোকাতুর হৃদয়ে আশ্বাস পাবার জন্তে ভুতের আশ্রয় নেন নি, অথচ তাঁর উপর এই মিথ্যা উদ্দেশ্য আরোপ করে রায় মহাশয় একজন নিষ্কাম সত্যসেবীর মর্যাদা লাভ করেছেন মাত্র! আর লজ্জ নিজে পুত্রশোকাতুর বৃদ্ধ হলেও ওয়ালেস্ কুক্স, জেমস্, ব্যারেট, মায়াস প্রভৃতি মনীষীরা সে বৃদ্ধ কোনো শোকের বাতিকে প্রেততত্ত্বের আশ্রয় নেন নি!

রায় মহাশয় বৈজ্ঞানিক লেখক এবং আচার্য্য, কাজেই তাঁকে আর ছুটা ধার করা চোখা কথা না শুনিতে থাকতে পারলাম না—কথা আমার নয় ঐ বুদ্ধ বাতিকগ্রস্ত লজ্জ মহাশয়ের,—“Strange facts do really happen even tho' unprovided for in our sciences. Amid their orthodox relations they may be regarded as a nuisance. \* \* To avoid such alien incursion a laboratory can be locked, but the universe can not.”

কোনো একটা অজ্ঞেয় তত্ত্ব হঠাৎ জ্ঞানগোচর হলে এবং তার কার্যপদ্ধতি আমাদের rule-and-thumb line-এর দ্বারা ব্যাখ্যাত না হলে আমরা ভারি উত্যক্ত বিরক্ত হয়ে উঠি। এবং নিজেদের ‘সর্বজ্ঞ অশ্রান্ত আমি’র উপর আমরা এমনি বেশী বিশ্বাসবান যে প্রমাণসত্ত্বেও তাদের সত্যতা মানতেই চাইনে; অপর কেউ বিশ্বাস করবার কারণ পেলে তাকে নিজেদের তুলনায় বোকা এবং বিদ্বন্ধুটে মনে করি! ফরাসী জ্যোতির্বিৎ পণ্ডিত C. Flamman'on তাঁর “The Unknown” পুস্তকে একটা ভারি মজার গল্প বলেছেন, রায় মহাশয়কে সেইটি শোনাতে চাই। গল্পটা খুব বড় বলে, তার সার সংক্ষেপ দিচ্ছি। আসল পুস্তকের ৩—৪ পৃষ্ঠায় দ্রষ্টব্য। আমি (Famman'on) ফরাসী বিজ্ঞান সভার এক অধিবেশনে উপস্থিত ছিলাম। Dr. Moncil সেদিন Edisonএর Phonograph পণ্ডিত সভায় প্রথম নিয়ে এসে পরীক্ষা করে দেখান। হঠাৎ আমাদের সভার এক সভ্য জনৈক নামজাদা পণ্ডিত—Dr. Moncilএর কাছে গিয়ে রেগে চোখ লাল করে বেচারী Moncilএর গলা ধরে চীৎকার করে বলে উঠলো Wretch, we are not to be made dupes by a ventriloquist”। পণ্ডিত প্রবর হচ্ছেন M. Bouilland। ঘটনার তারিখ ১১ই মার্চ ১৮৭৮ সাল। উক্ত পণ্ডিত তারপর ছ-মাস ধরে নিজে যন্ত্রটা পরীক্ষা করে মত প্রকাশ করেন “nothing in the invention but ventriloquism—it was imposible to admit that vile metal could perform work of human phonation!”

হায়রে মানুষ!—“this puny philosopher not six feet high”। বিশ্বের রহস্য সমুদ্রে আমাদের lead-line যে তলা পায় না তা মানবো না—মানবো কি? না অকূল রহস্য সমুদ্রটা আমার এই দড়িরই মাপেরই গভীর!

কিন্তু খোলা-মন উদার-দৃষ্টি বিজ্ঞানজ্ঞানাভিমাত্রী ঠিক attitude হচ্ছে বিশ্বাস করা যে “even floating weeds of novel genera may fore-show a land unknown,” এবং জ্যোতির্বিৎ হর্শেলের কথায় এরূপ বৈজ্ঞানিকের উচিত “to believe that all things are not improbable and hope all things not impossible.” সার অলিভার এই জাতীয় সত্যসন্ধানকারী বৈজ্ঞানিক!

আচার্য্য Barrett ঠিকই বলেছেন যে, “The splendid and startling discoveries made by Sir W. Crookes in physical science were universally received with respect and belief but his equally careful investigation of psychical phenomena were dismissed by most scientific men as unworthy of serious attention!”

আচার্য্য লজ্জ যখন তাঁর ‘Lodge-coherer’ বা গঠনতত্ত্ব সঙ্কে কথা বললেন তখন সকলে বিশ্বাসে স্তব্ধ; সেই লজ্জ যখন বললেন, যে প্রমাণ পাওয়া যাচ্ছে মানুষের আত্মা দেহান্তে সজ্ঞানে থেকে কাজ করছে, ধপধপ আদান প্রদান করে তখন তাঁর মাথা পুত্রশোকের ধাক্কায় বেকল হয়ে বসলো!

মোট কথা দেখা যাচ্ছে যে সাধারণ অজ্ঞ মানুষও যেমন অবিশ্বাস-অতি-বিশ্বাসের দাস, শিক্ষিত সংস্কৃতবুদ্ধি পণ্ডিতও তেমনি অবিশ্বাস অতিবিশ্বাসের মোহে কাণ্ডজ্ঞান হারান!

নাস্তিক হিউম বলতেন—“আমি Miracle মানি না, কেন না এ সব ঘটনা মানুষ জ্ঞাতের পূর্ব-পরিচিত অভিজ্ঞতার সঙ্গে মেলে না!” তা যদি বৈজ্ঞানিকের মস্ত হয় তা হলে Arago যা বলেছেন তা ঠিক—“where should we be if we set ourselves to deny everything we do not know how to explain?” আমাদের পূর্ব অভিজ্ঞতার সঙ্গে তো Radium এর কাণ্ড খাপ খায় না—তবে Radium তত্ত্ব কি মায়া? রজ্জুতে সর্পভ্রম?

এ যুগে জন্মে এই কথাটা আমরা যেন ভুলিনে যে পাগলা হামলেট একটা বড় মস্ত সত্য কথা বলেছিল; There are more things in heaven and earth Horatio than are dreamt of in your proud science—আর চিরপোষিত আমাদের মত গুলার মাথায় উদ্ভট প্রেতবাদ যে লাঠি মেরেছে তার চেয়ে গুরুতর লাঠি মেরে বসেছেন আপনাদের Einstein!

যাক্ । বৃদ্ধ প্রবীণ সত্যবন্ধু জ্ঞানসাধক সার অলিতার সহক্রে রায় মহাশয়ের যে উদ্ভট অবিচারপূর্ণ ধারণা তারই প্রতিবাদ করতে গিয়ে 'অজ্ঞানাৎ যদি বা মোহাৎ' শ্লোকে রায় মহাশয়ের যশঃ-স্বপ্নকর দু'একটা কথা বলে থাকি তা সে একটা সাহিত্যিক দ্বন্দ্ব-যুদ্ধের অঙ্গ মনে করে তিনি যেন আমাকে মাফ করেন ।

## জীবন তরী ।

( শ্রীবিজয়লাল চট্টোপাধ্যায় )

পশ্চিমের ঐ নীল আঙিনায় তারার দীপটা জ্বালি  
 বিশ্বরাজের পূজার বেদীমূলে  
 অন্ধকারের ঘোমটা টানি নীরব সন্ধ্যারাণী  
 নামূল গলে তারার মালা ছলে ।  
 কি যেন এক মৌন ব্যথায় স্তব্ধ বসুন্ধরা  
 মনটা শুধু কাঁদছে অকারণে  
 দিগন্তের ঐ ধূসর তটে চেউয়ের মত আজি  
 চিত্ত আমার লুটায় ক্ষণে ক্ষণে ।  
 তরঙ্গী এক মরাল সম শান্ত নদীর বুকে  
 চলছে কোথা নীরব অন্ধকারে  
 স্বন্ধে বহি গুণের বোঝা তিনটী মানুষ ধীরে  
 আগিয়ে চলে জলের ধারে ধারে ।  
 শান্ত ক্ষত চরণ তাদের ক্লান্ত দেহের ভার  
 বইতে যেন চাহিছে না গোঁ আঁর  
 হৃদয় তাদের শান্তি লাগি ব্যাকুল অনিবার  
 শিশু যেমন চায়রে বক্ষ মার ।  
 থামা তোদের প্রাণের কাঁদন ওরে মাঝির দল  
 ঐ যে শান্তি ঐ যে আসে পিছে ;  
 ঐ যে তোদের ফিরিয়ে নিতে দুইটী বাহুর বল  
 আনছে তরী কাগা কেন মিছে ?

সকাল বেলায় প্রথম ঝাঁহার কোমল কঠিন কর  
 ঠেলে তোদের দিলেন কাঁজের মাঝে  
 ভাবিস কি তাঁর তোদের তরে ভাবনা কিছুই নাই  
 ভুলে তোদের রবেন তিনি সাঁঝে ?  
 উপলময় এ কঠিন পথের যত দারুণ ব্যথা  
 যত নিষ্ঠুর কাঁটার আঘাত পায়  
 যত প্রাণের শোণিত দিয়ে আঁকা ছথের কথা  
 সব যে বুকে বেজেছে তাঁর হায় !  
 এমনি করে প্রতি উষায় পাঠান তিনি কাজে  
 আবার সাঁজে বক্ষে তুলে লন  
 জীবন যখন শ্রান্ত হয়ে ঘুমের লাগি কাঁদে  
 মরণ রূপে আসে প্রাণের ধন ।  
 তরঙ্গী তাঁর এমনি করে চলেছে কোন পুরে  
 কোথায় কবে পথের হবে শেষ ?  
 জীবন মরণ এমনি করে নাচছে ঘুরে ঘুরে  
 হায়রে কোথা সেই অচিনের দেশ ।

## সিনফিনের জন্মকথা ।

( শ্রীউপেন্দ্রনাথ বন্দ্যোপাধ্যায় । )

১৮৪৮ ও ১৮৬৭ সালের বিদ্রোহ চেষ্টা নিফল হইবার পর আয়ারলণ্ডে সকলেই একরূপ বুলিলেন যে বাহুবলে স্বাধীনতা ফিরিয়া পাইবার চেষ্টা করা এখন বিড়ম্বনা মাত্র । এ দিকে পার্লামেন্টে একশত বৎসর ধরিয়া বিধিসঙ্কত আন্দোলনের ফল দেখিয়া হতাশ হওয়া ভিন্ন উপায়ান্তর নাই । দয়া ধর্ম, হুবিচার, গায়সম্মত অধিকার--এক কথায় দুর্বল সবলের নিকট যে সমস্ত বুলি আওড়াইয়া রূপা ভিক্ষা করে--সে গুলি পার্লামেন্টের কাণে সময়ে অসময়ে ধ্বনিত করিতে আইরিসেরা ছাড়ে নাই । কিন্তু "চোরা না শোনে ধর্মের কাহিনী ।" আইরিসেরা দেখিল যে জাতীয় পরাধীনতার ফলে তাহাদের পেটের

ভাতও মারা যাইতে বসিয়াছে। ব্রিটিস সাম্রাজ্যের ভার বহনের জগ্নু শ্রায়তঃ তাহাদের যে কর দেওয়া উচিত, পার্লামেন্ট তাহাদের নিকট হইতে তাহার অপেক্ষা বাৎসরিক ৭৫০,০০০ পাউণ্ড অধিক আদায় করিয়া লইতেছে। ইংরাজ ব্যবসাদারের স্বার্থের দিকে লক্ষ্য রাখিয়াই আইরিস ব্যাঙ্ক ও রেলওয়ের কাজকর্ম চালান হইতেছে। আইরিসদের সওদাগরী জাহাজগুলি অনেকদিন হইল মারা পড়িয়াছে। দেশে লোহা, কয়লা প্রভৃতি যা কিছু খনিজ দ্রব্য ছিল সেগুলো খনির মধ্যই পড়িয়া আছে। সেগুলো বাহির হইলে পাছে ইংরাজ ব্যবসাদারদের ক্ষতি হয় এই ভয়ে কর্তৃপক্ষেরা সে দিকে ফিরিয়াও চান না। লোকসংখ্যা এত দ্রুতবেগে কমিয়াছে যে ইউরোপে তাহার তুলনা মেলাই ভার। ইংরাজভক্ত “অলষ্টেরেরই” লোকসংখ্যা সত্তর বৎসরের মধ্যে প্রায় আধাআধি হইয়া দাঁড়াইয়াছে। এ সমস্ত দুর্ঘটনা চূপ করিয়া দেখা ছাড়া আর উপায় নাই। কারণ যে কি, তাহা সকলেই জানে ও বুঝে, কিন্তু সেই সর্বনাশা কারণ দূর করিবার সামর্থ্য যে কাহারও নাই!

তা' হোক, কিন্তু মানুষ সহজে হাল ছাড়ে না। যতক্ষণ শ্বাস, ততক্ষণ তাহার আশ। স্বাধীনতা গিয়াছে, শ্রীসম্পদ গিয়াছে—কিন্তু জাতির প্রাণটুকু যতক্ষণ ধুকধুক করে ততক্ষণ সব ফিরিয়া পাইবার আশা যায় না। আধ্যাত্মিক স্বাধীনতা জাতির প্রাণ। আয়লণ্ডের সবই গিয়াছিল; কেবল একেবারে যায় নাই গেলিক ভাষা। জাতীয় স্বাধীনতার ক্ষীণ আলো ঐ দীপেই মিট মিট করিয়া জ্বলিতেছিল। আয়লণ্ডের অতীত যুগের গৌরবকাহিনী, আশা অকাঙ্ক্ষা, সুখ দুঃখের ইতিহাস ঐ ভাষার মধ্যই নিবন্ধ। বিদেশী আসিয়া সবই কাড়িয়া লইয়াছিল; কেবল অতীতের গৌরবমণ্ডিত স্মৃতিস্মৃতিটুকু বছদিন পর্যন্ত কাড়িয়া লইতে পারে নাই। কিন্তু “জাতীয় শিক্ষা”র নাম দিয়া যে দিন হইতে ইংরাজ-প্রতিষ্ঠিত বিদ্যালয়ে ইংরাজী ভাষায় বিদ্যাদান আরম্ভ হইল, সে দিন হইতে “গেলিক” ভাষার কপাল পুড়িল। আইরিস ইতিহাসের পঠন পাঠন রক্ষ হইল; জাতীয়-ভাব-উদ্দীপক কবিতাদি পাঠ্যপুস্তক হইতে বহিষ্কৃত হইল; এবং পিতৃ পুরুষের নাম ভুলিয়া আইরিস বালকেরা আপনাদিগকে “ব্রিটিস” নামে পরিচয় দিয়া গৌরব বোধ করিতে শিখিল। দুই এক পুরুষের মধ্যই জাতীয় “গেলিক ভাষা” মৃতপ্রায় হইয়া উঠিল।

দেশের যখন এইরূপ অবস্থা তখন “সিনফিনের” উৎপত্তি। বিদেশীকে অস্ত্রবলে দেশ হইতে তাড়াইবারও সামর্থ্য নাই; আর তাহার দ্বারে “ধরনা”

দিয়াও লাভ নাই দেখিয়া কয়েক জন আইরিস স্থির করিলেন যে বিদেশীর প্রভুত্ব সর্ব বিষয়ে অস্বীকার করিয়া আত্মনির্ভরশীল হইয়া দেশের সমস্ত কাজ যথাসম্ভব নিজের হাতে করিতে হইবে। সর্ববিষয়ে এইরূপ স্বদেশী ভাবাপন্ন হওয়ারই নাম, আইরিস ভাষায়—সিনফিন।

আইরিসেরা দেখিলেন যে জাতীয় ভাব বাঁচাইতে গেলে আগে জাতীয় ভাষা সাহিত্য বাঁচাইতে হয়; এবং সেই উদ্দেশ্যেই ১৮২৩ খ্রীষ্টাব্দে “গেলিক লিগ” নামক সভা প্রতিষ্ঠা করেন। ক্যাথলিক হোক, প্রোটেষ্ট্যান্ট হোক, সকলেই এই সভার সভ্য হইতে পারিতেন। ধর্ম বা রাজনীতিসংক্রান্ত কোন প্রশ্নই সেখানে উঠিত না। “লিগ” শুধু জাতীয় ভাষা, সাহিত্য, সঙ্গীত ও শিল্পবাণিজ্যের উন্নতি ও প্রচারেই মনোযোগ করিতেন। কিন্তু জাতীয় ভাষা ও সাহিত্য প্রচারের সঙ্গে সঙ্গে জাতীয় ভাবও পুনর্জীবিত হইতে লাগিল; জাতীয় স্বাতন্ত্র্যবোধও পরিস্ফুট হইয়া উঠিল। ফলে সাক্ষাৎ সম্বন্ধে রাজনীতির সহিত গেলিক লিগের কোন সংশ্লিষ্টতা না থাকিলেও উহার প্রভাব ক্রমশঃ রাজনৈতিক ক্ষেত্রেও ব্যাপ্ত হইয়া পড়িল। একটা জাতি নবজীবনের আনন্দ পাইয়া যখন জাগিয়া উঠে তখন তাহার কর্ম ক্ষেত্রবিশেষে আবদ্ধ থাকে না।

গেলিক লিগ স্থাপনের পর হইতেই নানাস্থানে “সাহিত্য-সভা” স্থাপিত হইতেছিল; সে গুলি প্রাচীন “ইয়ং আয়ারলণ্ড” দলের ভাবেই রঞ্জিত। ১৮২৯ খ্রীষ্টাব্দে আর্থার গ্রিফিথ “ইউনাইটেড আইরিসম্যান” নামক সপ্তাহিক সংবাদ পত্র বাহির করিয়া জাতীয় জীবনের সর্বক্ষেত্রে প্রবল স্বদেশী ভাবের স্রোত প্রবাহিত করিতে চেষ্টা করেন। ১৮৮২ খ্রীষ্টাব্দে আয়লণ্ডের জন্ম যেরূপ স্বতন্ত্র পার্লামেন্টের ব্যবস্থা ছিল, গ্রিফিথ তখন তাহারই পক্ষপাতী। কিন্তু আয়ারলণ্ডের স্বাতন্ত্র্যের পক্ষপাতী হইলেও তিনি তাহা লাভ করিবার জগ্নু বিপ্লবশষ্টির সমর্থন করিতেন না। তিনি বলিতেনঃ—“আয়ারলণ্ডের উপর ইংরাজের কোনও অধিকার আমরা স্বীকার করিব না। পার্লামেন্টে কোনও আইরিস সভ্য পাঠাইব না; কেন না তাহা হইলে প্রকারান্তরে স্বীকার করিয়া লওয়া হয় যে ইংরাজের আয়ারলণ্ড সম্বন্ধে আইন গড়িবার অধিকার আছে। তবে ইংরাজের বিরুদ্ধে অস্ত্রধারণও আমরা করিব না; অস্ত্রধারণ অহায় বলিয়া নহে, সে সামর্থ্য আমাদের আপাততঃ নাই বলিয়া। আমাদের জাতীয় জীবন আমরা আত্মশক্তিবলে গড়িয়া তুলিব। প্রথমে মানসিক স্বাধীনতা লাভ করিতে হইবে; রাজনৈতিক স্বাধীনতা তাহার অবশ্যস্বাভাবী ফল।”



গ্রিফিথ নিজে স্বতন্ত্র পার্লামেন্টমূলক রাজতন্ত্রের পক্ষপাতী হইলেও যাহারা সম্পূর্ণ প্রজাতন্ত্রের পক্ষপাতী তাঁহাদের প্রবন্ধাদিও “ইউনাইটেড আইরিসম্যান” প্রকাশিত ও আলোচিত হইত।

এই সমস্ত শিক্ষার প্রভাবে আয়লণ্ডে কতকগুলি নূতন নূতন স্বদেশী দল পড়িয়া উঠিতেছিল। ১৯০০ খ্রীষ্টাব্দে স্থাপিত Cumann nan Gaedhal (কুমান না গেডাল) ইহাদের মধ্যে সর্বপ্রধান। মুখ্যতঃ জাতীয় ভাষা, সাহিত্য, সঙ্গীত, ব্যায়াম চর্চা ও শিল্প বাণিজ্য বিস্তার, এবং গোপনতঃ আয়লণ্ডের স্বাধীনতা লাভে সহায়তা করাই এ সমিতির উদ্দেশ্য। কিন্তু সকলে এ আদর্শ স্বীকার করিল না। তাহারা বলিল—“সাময়িক রাজনীতির সহিত সঘন্থ রাখা চাই। দেশের বুকের উপর বসিয়া যাহারা রাজত্ব করিতেছে তাহাদের অস্বীকার করিব বলিলেই তো আর তাহাদের হাত হইতে নিষ্কৃতি পাওয়া যায় না। দেশের শক্তি কেন্দ্রীভূত করিয়া যখন একদিন না একদিন তাহাদের বিরুদ্ধে প্রয়োগ করিতেই হইবে, তখন শুধু জাতীয় সাহিত্য ও শিল্প বাণিজ্যের উন্নতির দিকে মন দিলে চলিবে না, দেশকে সংঘবদ্ধ করিয়া শক্তিশালী করিয়া তুলিবার ব্যবস্থাও থাকা চাই।” এই উদ্দেশ্য সিদ্ধ করিবার জন্ত Cumann na nGaedhal (কুমান না গেডাল) সভার তৃতীয় বার্ষিক অধিবেশনে (১৯০২ খ্রীষ্টাব্দে) গ্রিফিথ যে বক্তৃতা দেন তাহাতে তাঁহার আদর্শ ও কার্যপ্রণালী সুন্দরভাবে ব্যক্ত হইয়া উঠে। সভায় স্থির হয় যে ভবিষ্যতে ইংলণ্ডের পার্লামেন্টে আর যাহাতে আইরিস সভা না যায় তাহার ব্যবস্থা করিতে হইবে। যতদিন পার্লামেন্টের আইরিস সভ্যেরা স্বদেশের এই অপমানজনক ব্যাপার হইতে নিবৃত্ত হইয়া দেশে থাকিয়া দেশরক্ষায় ব্রতী না হন ততদিন যেন বিদেশবাসী আইরিসেরা তাঁহাদের কোনরূপ সাহায্য না করেন।

এই প্রস্তাব গৃহীত হইবার পর হইতেই প্রকৃত পক্ষে সিনফিনের জন্ম। ইহা কার্যে পরিণত করিবার জন্ত ১৯০৫ খ্রীষ্টাব্দে ডবলিন সহরে জাতীয় পরিষদের (National Council) প্রতিষ্ঠা হয়। গ্রিফিথ প্রস্তাব করেন যে ৩০০ সভ্য নির্বাচন করিয়া আয়লণ্ডের এক পার্লামেন্ট গঠিত হউক। ইংরাজী পার্লামেন্টের যে সমস্ত আইরিস সভ্য ওয়েষ্টমিনিষ্টারে যাইতে অস্বীকৃত, তাহারাও এ নূতন পার্লামেন্টের সভ্য বলিয়া গণ্য হইতে পারিবেন। দেশের মধ্যে যত মিউনিসিপ্যালিটি বা স্থানীয় স্বায়ত্তশাসন সভা আছে সেগুলি যাহাতে এই পার্লামেন্টের আদেশ অনুসারে চলে তাহার ব্যবস্থা করিতে হইবে।

আইন ভঙ্গ না করিয়াও যে যে উপায়ে আয়লণ্ডকে কার্যতঃ ইংরাজের শাসনশৃঙ্খল হইতে মুক্ত করা যায় জাতীয় পরিষদ তাহারই অমুসন্ধানে করিতে লাগিলেন। স্থির হইল, প্রথমতঃ শিক্ষার ভার নিজেদের হস্তে লইয়া এমন একদল যুবককে গড়িয়া তুলিতে হইবে যাহারা দেশের কৃষি, শিল্পবাণিজ্য ও শাসন কার্য পরিচালন করিতে পারে। কাউন্টি সভার (County council) তত্ত্বাবধানে যত কিছু কর্ম আছে সেই সমস্ত কর্মে প্রতিযোগী পরীক্ষার ফলে এই সমস্ত যুবককে ভর্তি করিয়া দিতে পারিলে ক্রমশঃ ইহাদের দ্বারা একটা “আইরিস সিভিল সার্ভিস” গড়িয়া তুলিতে পারা যায়। ভিন্ন ভিন্ন দেশে এই পরিষৎ কর্তৃক নির্বাচিত দূত রাখিয়া বিদেশের সহিত ব্যবসা-বাণিজ্যের উন্নতির চেষ্টা করিতে হইবে। আইরিস ব্যাঙ্ক সমূহ যদি আইরিস শিল্পের উন্নতির জন্ত ঋণ না দেয়, তাহা হইলে লোকে যাহাতে এই সমস্ত ব্যাঙ্ক হইতে টাকা তুলিয়া লয় সে দিকে দৃষ্টি রাখিতে হইবে। আইরিসদিগের তত্ত্বাবধানে নৌ-বাহিনীর সৃষ্টি করিতে হইবে। স্বদেশী শিল্পরক্ষার জন্ত আয়লণ্ড হইতে ইংরাজী পণ্য বহিষ্কার করিতে হইবে এবং বিচার ভিক্ষার জন্ত যাহাতে ইংরাজের দ্বারস্থ না হইতে হয় সে জন্ত ‘সালিসী’ বিচারালয় স্থাপিত করিতে হইবে। এক কথায়, দেশের মধ্যে নিজেদের একটা স্বতন্ত্র শাসনবিভাগ গড়িয়া তুলিয়া হইবে। ইহাই সিনফিনের প্রথম অবস্থার কার্য-প্রণালী।

দুই বৎসর কাজকর্ম বেশ উৎসাহের সহিত চলিল; কিন্তু কয়েক বৎসরের মধ্যেই সিনফিনের চীৎকার যেন অরণ্যে রোদন হইয়া দাঁড়াইল। ন্যাশনালিষ্ট (Nationalist) দলের নেতা রেডমণ্ড তখন পার্লামেন্টের নিকট হইতে হোমরুল আদায় করিয়া লইবার জন্ত উঠিয়া পড়িয়া লাগিয়াছেন। সকলেরই দৃষ্টি তাঁহার উপর নিবদ্ধ। সিনফিনের নেতারাও স্থির করিলেন যে এ সময় রেডমণ্ডকে বাধা দিয়া হোমরুল প্রাপ্তির অন্তরায় হওয়া সমীচীন নহে।

১৯১০ হইতে ১৯১৩ পর্যন্ত সিনফিন একরূপ নির্জীব হইয়াই পড়িয়াছিল। কিন্তু অগ্রাগ্র শক্তি ধীরে ধীরে আয়লণ্ডে মাথা তুলিয়া উঠিতেছিল। তাহারাই ক্রমে ক্রমে সিনফিনের সহিত মিলিত হইয়া সিনফিনকে পুষ্ট করিয়া তুলিল।

ক্রমশঃ।

## বিলাপবিধুরা ।

[ শ্রীগোবিন্দলাল মৈত্রেয় ]

কিশোরী কহিছে ললিতায়—

মোদেরি কপাল গুণে গোপাল বিরূপ সখি,

সে দোষে কাহারে দোষা যায় !

আতুরী দাতুরী যবে গাহিবে মিলন গান,

অঝোর নিঝর ঝরে বাদরে বহিবে বান,

স্বনীল ফেনিল জলে ভাসায় ময়ূর তরী,

কে পার করিবে যমুনায় ?

তমাল তলায় যবে বুঝিতে বঁধুর মন,

ছলনা-নয়ন জলে ভাসাব আঁখির কোণ,

আপনা পাসরি সেই তুরজয় অভিমান,

কে বেলো ভাঙ্গাবে ধরি পায় ?

জটীলা কুটীলা মিলি গোকুল বিকুলি যবে

কালী-কলঙ্কিনী রাধা সবারে ডাকিয়া কবে

বাঁচাতে সুরম হতে ফুটা কলসীর স্রোতে—

কে আর রোধিবে বল হায় ?

বরজ বিপিনে যবে শিহরি কদম ফুল

মাতাল মধুপ তানে মজাবে কামিনীকুল

শাওন মেঘের তলে অধরে বিজুলী মাখি

কে আর বুলাবে রাধিকায় ?

ফাগুনে ফাগুয়া লয়ে ব্রজের বালক সনে

গহন কানন চুঁড়ি বিনোদিয়া বৃন্দাবনে

বাছতে বাঁধিয়া প্যারী হাতে লয়ে পিচকারী

কে আর রঙ্গাবে গোপিকায় ।

নিপট কপট শঠ ছড়ায়ে যাহুর নিদ

নিষ্ঠুর কঠিন করে পাজরে কাটিয়া সিঁদ

হরিয়া হরষভরে ধাধার নয়ন মনি

শ্রাম যেরে গেল মথুরায় ।

## সাহিত্যে, হুভূতি ।

( অধ্যাপক শ্রীরামপদ মজুমদার এম, এ )

সাহিত্য-সমালোচনার মুঞ্চিল এই যে সাহিত্যের বেশীর ভাগই অহুভূতির দ্বারা বুদ্ধিতে হয় এবং জ্ঞান ও অহুভূতির পার্থক্য বিভাগ করিয়া দেখা যায় না। চোখের দেখা কতটুকু এবং প্রাণের দেখা কতটুকু ইহার কেহ হির নির্দেশ করিতে পারেন না। ভালবাসিলে যে কতখানি পাওয়া যায়, যে ভালবাসে নাই তাহাকে তাহা কেমন করিয়া বুঝান যাইবে? এই জগৎ ইংরাজ-কবি সেলি প্রেমকেই সাহিত্যের ভিত্তি বলিয়া গিয়াছেন। সত্যোপলক্ষি বা সত্যের জ্ঞান এক কথা; সত্যাহুভূতি, তাবের দ্বারা সত্যগ্রহণ আর এক কথা। সত্যোপলক্ষি যেন জানার জগুই জানা, অথবা প্রয়োজন সিদ্ধির জগু জানা, চিকিৎসকের যেমন রোগীকে জানিতে হয় অথবা বৈজ্ঞানিক যেমন তত্ত্বাসন্ধানে ব্যাপৃত থাকেন। সত্যাহুভূতি যেন প্রেমের দৃষ্টিতে জানা, ইহা তেমন পুঙ্খানুপুঙ্খরূপে জানিতে চায় না, অথচ এ জানা কত বেশী, ইহা কত আপনার করিয়া লয়—ইহাতে এমন আশ্চর্যবিশ্বস্ততা আছে যে ইহা পাইতে চায় যতটুকু দিতে চায় তার চেয়ে বেশী,—নিজেকে নিঃশেষে বিলাইয়াও ইহার আশ্চর্য হইতে হয় না। সেই জগু অহুভূতি দিয়া যাহা পাওয়া যায় তাহাতে মানবের এত আনন্দ। জ্ঞান ও বিজ্ঞানের এত চর্চা সঙ্কেও আমরা শিল্প ও সাহিত্যে ছাড়িতে পারি না। চণ্ডীদাস যখন আবেগের উচ্ছ্বাসে জ্ঞাতিকুলমান জলাঞ্জলি দিয়া, সামাজিক সংস্কার বিলুপ্ত করিয়া রজকিনী রায়ীকে 'বেদবাদিনী' বলিয়া সম্বোধন করিয়াছিলেন—তখন তাহা কোনও নারী বিশেষে প্রযোজ্য হয় নাই। সেই হুভূতি প্রেমের যে স্বরূপ তাহার চিত্তে জাগরুক হইয়াছিল

এবং নারী-হৃদয়ের সমস্ত সৌন্দর্যের ভিতর দিয়া অথও মূর্তিতে দেখা দিয়াছিল তাহারই সামনে তিনি যে গভীর প্রশংসা অনুভব করিলেন,—যেন সেই শৌর্যের চরণে ধূলির সাথে ধূলি হইয়া যাইতে চাহিলেন ;—তখনকার তাহার মনের সেই ভাবটিকে আকুল হৃদয়ের অব্যক্ত বেদনাব মধ্যে আর ধরিয়া রাখিতে পারিলেন না, কামনার পরপারে ভোগবিবর্তির মধ্যে তাহাকে লয় করিয়া ধর্ম ও প্রেমের সাম্য-স্থাপন করিয়া দিলেন। ভাবের যে গভীরতা এখানে ধ্বনিত হইয়া উঠিয়াছে, ইহাকে ইঙ্গিতে প্রকাশ করা চলে, ভাষায় সম্যক ফুট করা যায় না, কারণ, ইহা জ্ঞানের সীমা ছাড়িয়া অল্পভূতিতে মিশিয়া গিয়াছে। বাস্তবিক এই তত্ত্বগুলি বিশ্লেষণ করিয়া তাহাদিগকে প্রকাশ করিবার জন্য যে চণ্ডীদাস ঐ কথাটি ব্যবহার করিয়াছিলেন তাহা নহে। খুব সম্ভবতঃ ঐ কথাটি ব্যবহার করিবার পরেও তাঁহার মনে এ সব তত্ত্ব উদ্ভিত হয় নাই। তাঁহার অধ্যাত্ম সত্য এই তত্ত্বগুলি অক্ষুণ্ণ অবস্থায় নিহিত ছিল এবং প্রেমাত্ম-ভূতির গভীরতা ভাবের সহজ ধর্ম অনুসারে এগুলিকে ঐ একটি কথার মধ্যে ফুট করিয়া দিয়াছিল।

ঠিক এই একই প্রকারে শিল্প ও সাহিত্য সৃষ্ট হইয়া থাকে। সাহিত্যিক ভাবের দ্বারা অর্থাৎ অনুভব করিয়া সত্যের স্বরূপ উপলব্ধি করেন। জ্ঞানের দ্বারা সত্যোপলব্ধি দর্শন বা বিজ্ঞান, এবং যখন ইহা ভাবের সাহায্যে হয়, তখন তাহা অল্পভূতি। কোনও বিশেষ তত্ত্ব অথবা সত্য উপলব্ধি করিয়া কল্পনার দ্বারা সাহিত্যিক তাহাকে অলঙ্কৃত করেন না এবং তাহা করিলে শিল্প হিসাবে এ সাহিত্য শ্রেষ্ঠ বলা যায় না। কখনও কখনও যেমন দেখা যায় যে অনেকের সঙ্গীতবিদ্যা না জানা থাকিলেও তাঁহারা স্বন্দর সঙ্গীত আলাপন করিতে পারেন,—ইহা তাঁহাদের স্বভাবধর্ম বলিয়া বোধ হয়—সাহিত্যিকেরও তেমনই একটি ধর্ম আছে যাহাতে তাঁহারা স্বভাবতঃই প্রত্যেক সত্তা ভাবের দ্বারা অনুভব করিতে পারেন, অধ্যাত্মচিন্তার গভীরতা স্বভাব-নিয়মে সৌন্দর্য্যে প্রস্ফুটিত করিয়া তুলেন। মিল্টন তাঁহার মহাকাব্যে যে সত্যের প্রতিপাদন করিতে চাহিয়াছিলেন,—মানুষের নিকট ভগবানের বিভূতি প্রকাশ করিয়া জগতের ভিত্তি মঙ্গলের উপর প্রতিষ্ঠা করিতে যে চেষ্টা করিয়াছিলেন—সে হিসাবে ধরিলে তাহার কাব্য বহুল পরিমাণে ব্যর্থ হইয়া গিয়াছে। কিন্তু তিনি যাহা প্রতিপাদন করিতে চাহেন নাই, সম্পূর্ণতা,—সার্থকতার প্রতি যে উন্মুক্ত আবেগ তাঁহার অধ্যাত্মচিন্তার গভীরতা হইতে উৎসারিত হইয়া শব্দতান,

আদম ও হবার চরিত্রে এবং সহস্র সৌন্দর্য্য বর্ণনায় উচ্ছ্বসিত হইয়া পড়িয়াছে— তাহারাই আজ তাঁহার কাব্যকে বিশিষ্টতা প্রদান করিতেছে। সাহিত্যিকের যে জ্ঞান নাই তাহা নহে কিন্তু সে জ্ঞান তিনি তাঁহার সমগ্র সত্তা হইতে বিচ্ছিন্ন করিয়া দেখিতে পারেন না। মাতা যেমন সন্তানকে ভালবাসে, সতী যেমন পতিকে ভক্তি করে—এই ভালবাসা ও ভক্তির মধ্য দিয়াই যেন তাহাদের সমগ্র জীবন সার্থকতা লাভ করিতে চায়—সাহিত্যিকও তেমনই তাঁহার সমগ্র প্রাণ দিয়া অধ্যাত্মচিন্তার সম্পূর্ণতা লইয়া কোনও বিশেষ জিনিষের অথবা সত্যের সহিত সম্বন্ধ স্থাপন করেন। এইরূপ ভাবে সম্বন্ধ-স্থাপনের নামই অল্পভূতি। অল্পভূতি বলিলে যে কি বুঝি, ইহার সংজ্ঞা কি—তাহার দার্শনিক ব্যাখ্যা দেওয়া না যাইতে পারে, এবং সাহিত্য-সমালোচনা হিসাবে বোধ হয় তাহার প্রয়োজনও নাই; তবে এইমাত্র বলা যায় যে ইহা জ্ঞানও নহে, কল্পনাও নহে—এমন কি ভাবময় কল্পনাও ইহা নহে—ইহা জ্ঞান, ভাব ও কল্পনার সেই সুসুপ্তি অথবা সাম্যাবস্থা\*—যখন ইহাদিগকে পৃথক করিয়া দেখা যায় না,—জ্ঞানের সহিত ভাবের, ভাবের সহিত কল্পনার ব্যবধান লুপ্ত হইয়া মন একটি অনির্কচনীয়তায় পূর্ণ হয় এবং জিনিষের স্বরূপ আমাদের নিকট পরিষ্কৃত করিয়া তুলে। অথবা ইহাও বলা যাইতে পারে যে অল্পভূতিতে আমাদের সমস্ত অধ্যাত্মসত্তা জাগ্রত হইয়া মনের পরস্পরবিরোধী ভাবগুলির একটি সমন্বয় করিয়া দেয় এবং চৈতন্যের মুক্ত শ্রোতে অবগাহন করিয়া প্রেমের আলোতে আমাদের অন্তদৃষ্টি খুলিয়া যায়। অল্পভূতি থাকিলেই, সহানুভূতি থাকে, এবং জিনিষের সঙ্গে অথবা সত্যের সঙ্গে সমপ্রাণতা অনুভব করিয়া তাহার স্বরূপ উপলব্ধি করিবার ক্ষমতা জন্মে। এইজন্য প্রচলিত ধারণায় সহানুভূতিমূলক কল্পনাকে সাহিত্য-সৃষ্টিতে এত উচ্চ আসন দেওয়া হইয়া থাকে,—কিন্তু বাস্তবিক ইহা কেবল কল্পনা নহে, অল্পভূতিমূলক কল্পনা যাহা বুঝিতে হইলে মানুষের সমগ্র অধ্যাত্মসত্তা বুঝা দরকার! জ্ঞানে নহে, বিজ্ঞানে নহে, সাহিত্যের মধ্য দিয়াই সমগ্র মানুষকে পাওয়া যায়। মানুষের যাহা সাহিত্যে ধরা পড়ে না, ভাব-জগতের চিরসম্পদ হইয়া যায় না তাহাতে—হাজার বাহাডধর থাকুক না কেন,—সভ্যতার ফেনিল উচ্ছ্বাসে তাহা পরিপূর্ণ হউক

\* Wordsworth মনের এই ভাবটিকে 'wise passiveness' বলিয়াছেন। এই ভাবটির একটি অতি সুন্দর বর্ণনা তাঁহার Tintern Abbey সম্বন্ধীয় কবিতায় দেখিতে পাওয়া যায়।

না কেন—কালের স্রোতে আপনিই মিশিয়া যাইবে,—তাহা ক্ষণস্থায়ী,—চঞ্চল । কিন্তু যাহা একবার অহুভূতির মধ্য দিয়া সৌন্দর্যে প্রতিষ্ঠালাভ করিয়াছে, তাহার ভিত্তি এমন একটা চিরন্তন সত্যের উপর—যে ইহা অপ্রত্যক্ষকেও প্রত্যক্ষের চেয়ে মূল্যবান করিয়া দেয় । ইহাকে শুধু কল্পনার খেলা বলা উচিত নহে, কারণ ইহা জ্ঞানের চেয়েও গভীর । ওয়ার্ডস্‌ওয়ার্থ যখন তাঁহার দিব্যদৃষ্টিতে এক অনির্কচনীয় সুষমা ও শান্তি সমস্ত প্রাকৃতিক জগৎ পরিব্যাপ্ত করিয়া দেখিয়াছেন,—তখন তাহাকে কি বলিব, তখন তাহা কি শুধু জ্ঞানের, না ভাবের, না কল্পনার ? ইহা যে কেবল জ্ঞানের নহে,—সে কথা নিশ্চয় করিয়া বলা যাইতে পারে ; কারণ জ্ঞান দিয়া ধরিলে এ সুষমাও শান্তি সর্বত্র দেখা যায় না, অথচ ভাব ও কল্পনা যে ইহাকে জন্ম দিয়াছে,—একথাও বলিতে পারি না কারণ আমাদের মনের সহজ প্রত্যয় বলিয়া দিতেছে যে এ সুষমা ও শান্তি যেন বাহ্য-প্রকৃতির সঙ্গে সঙ্গে জড়ান আছে । এই অহুভূতি আমাদের নিকট এতই সত্য, এমন প্রত্যক্ষ যে আমাদের সমস্ত জ্ঞান একত্র হইয়াও ইহাকে মিথ্যা প্রতিপন্ন করিতে পারে না ।

শিল্পী যেমন অহুভূতি দিয়া সৃষ্টির রহস্য উদ্ঘাটন করিবার চেষ্টা করেন, সমালোচকও তেমনই অহুভূতির সাহায্য ছাড়া শিল্পসৃষ্টির গূঢ় তত্ত্ব অবগত হইতে পারেন না । ফরাসী দার্শনিক বার্গসের মতে সৃষ্টি ব্যাপারটাই এমন যে ইহা জ্ঞানে ধরা দিতে চায় না, কারণ সৃষ্টির মধ্যে যে অখণ্ড গতি বর্তমান, জ্ঞানের নিকট তাহা খণ্ড খণ্ড হইয়া প্রাণশক্তি হারাইয়া জড়ভাবাপন্ন গুণের সমষ্টি হইয়া যায় । সাহিত্যিকের রচনাগুলির প্রকৃত বিচার করিতে হইলে ইহাদিগকে সৃষ্টি হিসাবে দেখিতে হইবে, তত্ত্ব হিসাবে দেখিলে সব সময়ে বুঝা যাইবে না । সাহিত্য-রচনার ভিতর,—প্রত্যেক শিল্প সৃষ্টিতে—এমন অনেক জিনিষ প্রচ্ছন্ন থাকে যাহা পরে জ্ঞান ও সমালোচনার সাহায্যে তন্মূলের আকার ধারণ করিতে পারে এবং এইরূপে সাহিত্যও পরোক্ষ জ্ঞানবৃদ্ধির সহায়তা করে । বাস্তবিক একদিক দিয়া দেখিতে গেলে আগে অহুভূতি, পরে জ্ঞান ; আগে সাহিত্য, পরে দর্শন । ঋষিরা অহুভূতি দিয়া যাহা লাভ করিয়াছিলেন, তাহা পাই বেদে—সেই অহুভূতির উপর যুক্তি ও তর্ক খাটাইয়া যে শৃঙ্খলাবদ্ধ জ্ঞানের বিকাশ হইয়াছিল তাহা পাই বেদান্তে । বেদই যদিও বেদান্তের ভিত্তি, তবুও ইহা পাঠ করিলে বৈদিক সাহিত্য ঠিক বুঝা হয় না । সেইরূপ কোরাণ সরিফ হইতে কত দর্শন আসিয়াছে—কিন্তু কোরাণের প্রকৃত

তাৎপর্য কোরাণেই আছে । এগুলিকে সাহিত্য-হিসাবে বিচার করিতে হইলে মনে রাখিতে হইবে যে ভাব-নিঃসৃত যাহা, তাহাকে জ্ঞানে পরিণত করিলেই তাহার স্বরূপ বদলাইয়া যায় । ধর্মের উৎপত্তি অহুভূতিতে, তাহার পরিণতি দর্শনে । এবং ধর্ম যে চিরকাল ধরিয়া মানুষের মনের উপর এত প্রভাব বিস্তার করিয়াছে তাহার একটি কারণ এই যে, ধর্ম সাহিত্যের সহিত, সৌন্দর্যের সহিত এমন ঘনিষ্ঠভাবে সংশ্লিষ্ট—ভাবের সহিত এতই বিজড়িত । ধর্মকে তত্ত্ব বিবেচনা করিলে,—ধর্ম ধর্মই থাকেনা—দর্শন ও নীতিশাস্ত্র হইয়া যায় । সাহিত্যে ধর্মের যে আভাস আমরা পাই তাহা অহুভূতি-লব্ধ—তত্ত্বালোচনা নহে । তত্ত্বালোচনা যুক্তির, কার্যকারণ পরস্পরের অপেক্ষা রাখে, সাহিত্য ভাবের সরলতা ও গভীরতা দিয়া বিচার করে,—তাহাকেই যেন আশ্রয়বাক্য বলিয়া মানে । সে মনে করে যে যাহার মহত্ত্ব ও বিশালতা তাহাকে স্তম্ভিত করিয়া দিতেছে যাহার সৌন্দর্য ও কান্তি তাহাকে উচাটন করিতেছে, যাহার প্রেম ও মঙ্গলমুর্তি তাহাকে বশীভূত করিয়াছে—তাহার আবার যুক্তি কি,—তাহার হৃদয়ই যে তাহাকে প্রমাণ করিয়া দিয়াছে । সেই জন্ত সাহিত্য হৃদয়ের ভাষায় আমাদের নিকট ধর্মের কথা বলে,—জ্ঞানের ব্যাকরণ হয়ত তাহাতে অনেক অশুদ্ধি বাহির করিতে পারে । কিন্তু সাহিত্যের ধর্ম বুঝিতে হইলে তাহাকে সাহিত্যের ভাষাতেই বুঝিতে হয়, জ্ঞান দিয়া তাহার কিছু কিছু সংশোধন করিয়া লওয়া যাইতে পারে । রবীন্দ্রনাথের যেগুলি প্রকৃত প্রস্তাবেই ধর্ম-কবিতা, তাহাতে তত্ত্বের কথা বড় একটা নাই’ কিন্তু ধর্মের অহুভূতি আছে । তত্ত্ব ও নীতি শুদ্ধতর্ক, ধর্ম ও সাহিত্য সরস আনন্দ । তত্ত্ব ও নীতির পথে চলিতে হইলে সংসারের কণ্টকাকীর্ণ পথে, প্রতিপদে আত্মসংযম ও আত্ম-চিন্তা দ্বারা নিজেকে চালিত করিতে হইবে, প্রত্যেক কক্ষ জ্ঞানের মানদণ্ডে তুলিয়া মাপিতে হইবে ; সেই জন্ত নীতির পথ এত জটিল,—এত সন্দেহাত্মক,—ইহাতে আনন্দ নাই, মুক্তি নাই কিন্তু সাহিত্য যে আনন্দের মধ্য দিয়া ধর্ম-ভাব উন্মেষিত করে—তাহাতে আমাদের আত্মা মুক্ত হইয়া যায়,—অস্তরের অপরিজ্ঞাত রহস্যের সহিত এক হইয়া, প্রাণের অব্যাহত গতি অহুভব করে । যে প্রেম ও প্রণতি, যে বিশ্বয়-জড়িত আনন্দ জাগাইয়া তুলে, তাহাতে হৃদয় আপনিই নমিয়া পড়ে ।

মনে করুন সেই দিন যেদিন কবি শান্ত উষার নির্মল বাতাসে জাহ্নবী-তীরে তাঁহার প্রেমসীকে স্নান-অবসানে শুভ্রবসনে পুষ্পরাজি তুলিতে দেখিয়াছিলেন,

তখন দূবে দেবালয়-তলে উষার রাগিনী বাঁশিতে বাঁজিয়া উঠিতেছিল ;—  
 তাঁহার সীথিমূলে যে অরুণ সিঁদুর রেখা এবং তাঁহার বাম বাহু বেড়িয়া যে  
 শঙ্খবলয় তরুণ ইন্দুলেখার মত শোভা পাইতেছিল, তাহারা যে মঙ্গলময়ী মুরতি  
 যে দেবীর বেশ বিকশিত করিয়া তুলিয়াছিল, তাহাতে কবির হৃদয় সহসা সম্মুখে  
 ভরিয়া অবনতশির হইয়া পড়িয়াছিল ;—সেই দিনকার সেই ক্ষণিকের দর্শনে  
 সমস্ত হিন্দু জাতির যে স্পষ্ট ধর্ম-চেতনা তিনি জাগাইয়া দিয়াছেন তাহা ত  
 শুধু চোখের দেখা নহে,—ইহাকে অল্পভূতি দিয়া প্রাণের সহিত প্রাণ মিলাইয়া  
 দেখিয়া লইতে হয়, এবং সেই জগৎই ইহা নিত্যকালের সামগ্রী, চির পুরাতন  
 হইয়া গিয়াছে । আর বহুমুখী তাঁহার শিক্ষার বিচিত্রতায় হিন্দুর পর্ণকুটারের  
 এই অধিষ্ঠাত্রী দেবীর প্রতি একবারও ফিরিয়া তাকাইলেন না ; জ্ঞানের অভি-  
 মানে বিমুগ্ধ হইয়া হিন্দু-সভ্যতার সেই দয়াময়ী ধর্মস্বরূপিণী কল্যাণীকে  
 আমাদের লাঞ্চিত জীবনের স্তিমিত আলোকে ফেলিয়া রাখিয়া, প্রেমিকাকেই  
 সখীবেশে সাহিত্য-সিংহাসনে প্রতিষ্ঠিত করিলেন ! তিনি ধর্মতত্ত্ব দিয়াছেন,  
 জ্ঞানের দিক হইতে ধার্মিকের চরিত্র অঙ্কিত করিয়াছেন কিন্তু শিল্পীর এক-  
 প্রাণতা লইয়া ধর্মের এমন সহজ অল্পভূতিলাভ করেন নাই যাহার সামনে  
 আমাদের মস্তক স্বতঃই অবনত হইয়া পড়ে । জ্ঞানের কথা যিনি বলেন তিনি  
 ধন্য, আরও ধন্য তিনি যিনি জ্ঞানকে অল্পভূতিতে লয় করিয়া দেন !

অনন্তর যে অল্পভূতি কবি দ্বিজেন্দ্র লাল রায়ের, “নীল আকাশে অসীম  
 ছেয়ে ছড়িয়ে গেছে চাঁদের আলো”, এই গানটাতে মর্মস্পর্শী হইয়া উঠিয়াছে  
 তাঁহার গভীরতা এতই বেশী যে ধর্মতত্ত্বে ইহাকে ধরা যায় না,—ইহা যেন  
 অন্তর-ধর্মের মর্মস্থল বিদ্ধ করিয়াছে,—এবং ঝুড়ি ঝুড়ি আধ্যাত্মিক কবিতার  
 অল্পনাটিক “হা ছতাশ” ধ্বনি ইহার বহু পশ্চাতে পড়িয়া রহে । বাস্তবিক  
 অল্পভূতির তাৎপর্য্যই এই যে ইহার মধ্যে প্রাণের সরল আবেগ আছে, ইহা  
 লাভ করিতে হইলে চাই ঋষির অন্তর্দৃষ্টির সহিত বালকের শুভ্র সরল প্রাণ ।  
 এইরূপ কবিতা পাঠে বুঝিতে পারি ধর্মের সংস্কারের সহিত ধর্মের অল্পভূতির  
 কি পার্থক্য ! বড়ই আশ্চর্য্যের বিষয় সাধারণ ধর্ম-সঙ্গীতে ধর্মের অল্পভূতি  
 বড় একটা পাওয়া যায় না ; ইহারা যেন ধর্মের বৈঠকী গান ;—স্বসম্বন্ধিত  
 প্রার্থনা-মন্দিরের বৈহ্যতিক আলোকে গীত হইলে, এগুলি স্তনিতে মন্দ লাগে  
 না ; কিন্তু প্রকৃতির উন্মুক্ত আকাশ-তলে যেখানে শত শত চন্দ্র তারকা  
 ঝালরের মত ঝুলিতেছে, সেখানে ইহাদের প্রতি পদই যেন মানব-মনের সনাতন

ধর্মকে প্রতিহত করিতে থাকে । রাম প্রসাদের সঙ্গীতের স্বচ্ছ শ্রোতে  
 সংসারের অনিত্যতা তুচ্ছ করিয়া, সামাজিক সংস্কারকে আচ্ছন্ন করিয়া ধর্মের  
 যে অল্পভূতি সহজ আবেগে উচ্ছ্বসিত হইয়া পড়িয়াছে আজিকালিকার ধর্ম-  
 সঙ্গীতে তাহা দেখিতে পাই না, কারণ এ গুলির রচয়িতাদিগের নিকট ধর্ম  
 অল্পভূতির বিষয় না হইয়া জ্ঞানের অথবা সংস্কারের বিষয় হইয়া গিয়াছে ;  
 এবং জ্ঞানের প্রকৃতিই এই যে ইহার কতখানি নিষ্ফল এবং কতখানি পরের  
 তাহা ঠিক করা যায় না, বাঁধিগতের মত ইহাকে আওড়ান' চলে,—আর  
 অল্পভূতি যাহা তাহাকে অল্পভব করিয়া পাইতে হয়,—এবং সেই জগৎই বোধ  
 হয় জ্ঞানকে ভাবের মধ্যে ‘খাপ-খাওয়ান’ এত কঠিন ।

বর্তমান সময়ের বাস্তব-যন্ত্রের বাঁধি স্বরের সহিত পূর্বেকার বাদ্য-যন্ত্রের যে  
 প্রভেদ, জ্ঞানের সহিত অল্পভূতির তেমনই প্রভেদ । অল্পভূতি বিশেষভাবে  
 ব্যক্তিগত হইয়াও ব্যক্তিত্বের বাহিরে, জ্ঞান সার্বভৌমিক হইয়াও ব্যক্তিত্বের  
 ভিতরে । জ্ঞানের স্বর যেন সকলের জগৎ বাঁধা হইয়া গিয়াছে ;—তাহাতে  
 ব্যক্তিত্বের কোনও প্রকাশ নাই ;—মর্ত্য-হৃদয়ের বিচিত্র লীলা, ঘাত-প্রতিঘাত  
 হইতে বিচ্ছিন্ন হইয়া স্বর্গের অমল কান্তি ধারণ করিয়াছে । অল্পভূতির স্বাক্ষরে  
 ভাবের ঐক্য থাকিলেও ইহা ব্যক্তি-বিশেষের নিকট বিভিন্ন রকমে ধ্বনিত  
 হইয়া উঠে । সত্যকে যখনই অল্পভব করি, তখনই তাহার স্বরূপ বদলাইয়া  
 যায়,—তাহা জ্ঞানের রাজ্য ছাড়িয়া বিশেষভাবে ব্যক্তিগত হইয়া পড়ে,—  
 ভাব-বস্তুতে পরিণত হয়—আনন্দের স্পন্দনে শিল্পীর সজ্জা তাহার সহিত  
 মিশিয়া গিয়া এক অনাস্বাদিত রসের পরিচয় করাইয়া দেয় । সত্যোল্পভূতির  
 ভিতর এই অনির্বাচনীয়তা আছে । এই জন্য আমাদের অলঙ্কার শাস্ত্রে  
 সাহিত্যকে রসের দিক হইতে বিচার করা হইয়াছে, কারণ মানব-মনের সহিত  
 সত্যের সংযোগে যে বিভিন্ন ভাবের সঞ্চার হয়, তাহাকেই রস বলা যাইতে  
 পারে । পাশ্চাত্য সমালোচকেরা তাহা করেন না কারণ তাঁহারা মনে করেন  
 যে ভাবের কোনও যুক্তি-সঙ্গত শ্রেণীবিভাগ হইতে পারে না, ভাবের  
 বিশ্লেষণ চলে না । প্রত্যেক ভাবের মধ্যে এমন একটা বিশেষত্ব আছে  
 যাহা এক হইতে অল্পভূতিতেই পৃথক করিয়া দেয় । ভাব অল্পভব করিবার,  
 বিচার করিবার নহে । সে যাহাই হউক আমি আমার প্রবন্ধে দেখাইতে  
 চেষ্টা করিয়াছি যে “অল্পভূতি” বলিলে যাহা বুঝি তাহা শুধু ভাব-বস্তু নহে—  
 ভাবের গভীরতা দিয়া সত্যের একটা পূর্ণতর স্বরূপ লাভ করিবার প্রয়াস হইতে

ইহা সম্ভূত। মানুষ জ্ঞান দিয়া সৃষ্টির যে রহস্যের মধ্যে চুকিতে পারে নাই, যেন ভাবের গভীরতা দিয়া,—সমস্ত অধ্যাত্মসত্তাকে একই বিন্দুতে কেন্দ্রীভূত করিয়া তাহার মধ্যে অল্পপ্রবিষ্ট হইবার চেষ্টা করে। সাহিত্যের নিম্ন স্তরে, রস-যেখানে ভাবের জগৎই ভাব, অর্থাৎ ভাবকেই মূখ্য জ্ঞান করিয়া সৌন্দর্যের মধ্য দিয়া তাহার বিভিন্ন প্রকাশই সাহিত্যের চরম উদ্দেশ্য বলিয়া বোধ হয়। সাহিত্যের উচ্চস্তরে প্রজ্ঞা,—যেখানে ভাবের দ্বারা প্রণোদিত হইয়াও সাহিত্য সমস্ত ভাবকে অতিক্রম করিবার চেষ্টা করে,—এমন একটা অবস্থায় পৌঁছিতে চায় যেখানে অন্তরের দিব্যসৃষ্টি জীবনের গূহ্যতম প্রদেশকে আলোকিত করিতে পারে। ইহার নিম্নে জ্ঞান ও কল্পনা,—উচ্চে, সমস্ত জ্ঞান ও কল্পনা বিরোধ করিয়া একটা নির্বিকল্প ভাব আত্মার গভীর অল্পভূতি।

সেইজন্ম সাহিত্য যতই উচ্চে উঠিতে থাকে ততই যেন ধর্মের সহিত ইহার ব্যবধান নূন্য হইয়া যায়,—সাহিত্যের পরিণতি ধর্মে। কিন্তু সাহিত্যের ধর্ম অনেক সময়েই লৌকিক ধর্ম হইতে সম্পূর্ণ বিভিন্ন কারণ ইহা অন্তরের অন্তরতম ধর্মকেই ভাষায় ব্যক্ত করিতে চেষ্টা করে। যে সমস্ত আচার অহুষ্ঠান ও সংস্কারের স্তর ধর্মের উপর জমিয়া আমাদের শ্রাণের গতি আড়ষ্ট করিয়া রাখে, তাহাদিগকে সরাইয়া অন্তর্জীবনের প্রসবন মুক্ত করিয়া দেয়। সাহিত্যিক সাক্ষাৎভাবে ধর্মের কথা না বলিলেও ধর্মই সাহিত্যের প্রাণ। যাহার অন্তর্দৃষ্টি, অল্পভূতির গভীরতা যত জিনিষের সত্তার মধ্যে প্রবেশ করিয়াছে, শ্রাণের স্বরূপ—জীবনের গতি—তাঁহার নিকট তত ব্যক্ত হইয়া পড়িয়াছে;—ততই তাঁহার রচনার আভাসে ও ইঙ্গিতে যেন কোনও অপরিজ্ঞাত রহস্য নিজেকে মূর্ত্ত করিতে চায়,—মানবের ভাষা তথায় পৌঁছিয়াও পৌঁছিতে পারে না:—জীবনের ক্ষুদ্রতা ও কর্মের কোলাহল শাস্ত করিয়া রাত্রির মৌন-গভীর স্তরতা লোকলোকান্তরে প্রসারিত হইয়া পড়ে।\*

সাহিত্যের এই বিশ্বয়-বিজড়িত রহস্যের ভাব কেবল ধর্মগ্রন্থে নহে—সর্বত্রই কমবেশী পরিমাণে দেখা যায়; এবং ছুঃখ, শোক ও বিয়োগের মধ্যেও

\* "This unique expression (Poetry) still seems to be trying to express something beyond itself." About the best poetry and not only the best, there floats an atmosphere of infinite suggestion. \* \* \* \* His (the poet's) meaning seems to beckon away beyond itself or rather to expand into something boundless which is only focussed in it; something also, "which, we feel, would satisfy not only the imagination but the whole of us." Bradley's Oxford Lectures.

হৃদয়ে শান্তি ধারা বর্ষণ করে। এই রহস্যকে স্ফূট করিয়া দেখিতে চাইলে,—নিজেকে এত ক্ষুদ্র, তুচ্ছ বলিয়া বোধ হয় যে জীবনের ব্যর্থতার চতুর্দিক ঘেরিয়া উপহাসের অট্টহাসি গুণিতে পাওয়া যায়। একদিকে যেমন কভে লিয়ার মৃত্যু-শয্যার পাশে দাঁড়াইয়া অসীম রহস্যাবৃত এই মানবজীবন আমাদের স্তম্ভিত করিয়া দেয়,—সকল ছুঃখ, সকল দ্বন্দ্ব তিরোহিত করিয়া যেন একটা পূর্ণতার আভাস ফুটিয়া উঠে; আর একদিকে তেমনই এই রহস্যের বিশালতা আমাদের গকে এতই অভিভূত করিয়া ফেলে, যে আমাদের সমস্ত জ্ঞান, সমস্ত অহঙ্কার একেবারে ধূলিসাৎ হইয়া যায়। এই রহস্য ধর্মে যেমন স্ফূট হইতে পারে, সাহিত্যে তেমন পারে না; কারণ এইরূপ করিলে যে সৌন্দর্য্যোপলব্ধি সাহিত্যের ভিত্তি তাহা অনেকটা ত্রিয়মান হইয়া পড়ে। সৌন্দর্য্যের প্রকৃতিই এই যে সে অতীন্দ্রিয়কে ইন্দ্রিয়গোচর করিতে চায়, অপ্রত্যক্ষকে প্রত্যক্ষের মধ্যে ধরিয়া দেয়,—এক হিসাবে ইন্দ্রিয়ের তৃপ্তিতেই তাহার আনন্দ। ইন্দ্রিয়গ্রাহ্য জগৎকে বাদ দিয়া সৌন্দর্য্য-সৃষ্টি হয় না। কিন্তু এই রহস্যের মধ্যে ইন্দ্রিয়গ্রাহ্য জগৎকে ধরিলে তাহা যেন ছায়াতে মিলিয়া যায়, তাহার আর কোনও সত্তাই থাকে না। সাহিত্যে যে "রূপ হইতে ভাবে, ভাব হইতে রূপে অবিরাম যাওয়া আসা" দেখিতে পাওয়া যায় ইহাকে সম্ভবপর করিতে হইলে, এই রহস্যের ভাবটিকে একটু প্রচ্ছন্ন রাখিতে হয়। ধর্ম-সাহিত্য অনেক সময়েই এই রহস্যের ভাবে অতিমাত্র পরিপূর্ণ এবং সেই জন্ম তাহা শিল্প হিসাবে উৎকৃষ্ট হইতে পারে না। অল্প সাহিত্যও যখন ইহাতে ভরপুর হইয়া উঠে, তখন আর তাহাতে শিল্পসৃষ্টির গূঢ় মর্ম সম্যক প্রকাশিত হয় না। কেবল অল্পভূতিই সাহিত্য নহে,—যদি সেই অল্পভূতিকে সৌন্দর্য্যে প্রস্ফুটিত করিতে পারা না যায়। কিন্তু তাহা হইলেও এ কথা সত্য যে এই রহস্যের আভাস না থাকিলে সাহিত্য আমাদের সম্পূর্ণ তৃপ্তি দিতে পারে না। কারণ কেবল জড়প্রকৃতির মধ্যে বিচরণ করিয়া; সসীমের ক্ষুদ্র গভীর মধ্যে নিজেকে আবদ্ধ রাখিয়া মানুষ কখনই সার্থক-বোধ করে না! সে তাহার সমস্ত সম্পর্কের ভিতর দিয়া, তাহার সমস্ত জ্ঞান ও সৌন্দর্য্য বোধ ছাড়াইয়া অসীমের একটা ক্ষীণ স্পন্দন অল্পভব করিতে চায়। ওয়ার্ডসওয়ার্থ ও সেলি প্রকৃতির সৌন্দর্য্য অল্পভব করিতে গিয়া অক্ষয় সৌন্দর্য্যের দ্বারে উপনীত হ'ন; সেক্সপিয়র মানব-চরিত্রের মর্ম বুঝিতে গিয়া জীবনের গূঢ়তম মর্ম উজ্জ্বল করিয়া বসেন; বৈষ্ণব কবিতার মোহমুক্ত মানবীয় প্রেম অনন্ত

প্রেম-স্বরূপে মিশিয়া যায় ; আর রবীন্দ্র নাথ তাঁহার আবেগবিহ্বল হৃদয়ের চঞ্চলতা লইয়া কখন যে সেই অসীমের কূলে উপস্থিত হইয়াছিলেন ;—সেই মায়ামুগ ক্ষণেকের জন্ত কখন যে তাঁহার লুপ্ত নয়ন প্রান্তে দেখা দিয়াছিল,—সুন্দর সন্ধ্যার সৌম্য সৌন্দর্যে অশ্রুবিগলিত হইয়া পড়িয়াছিল—তাহা নিজেই বুঝিতে পারেন নাই ; এবং যেদিন হইতে বুঝিতে পারিয়া তাহাকে কাব্যে ধরিবার চেষ্টা করিতেছেন সেই দিন হইতেই যেন জ্ঞানের আলোকে আর তাহাকে খুঁজিয়া পাইতেছেন না ।

বাঙ্গলায় ‘অল্পভূতি’ কথাটার বিশেষ স্মৃতি এই যে ইহা একদিকে যেমন কোনও কিছু অল্পভব করা বুঝায় আর একদিকে তেমনিই কোনও কিছু অল্পভব করিয়া তাহার অন্তরের স্বরূপটা উপলব্ধি করিবার প্রয়াসকেও ‘অল্পভূতি’ বলা যাইতে পারে । ইংরাজীতে এমন কোনও শব্দ নাই যাহা ইহার মত শিল্প ও সাহিত্য-সমালোচনার একটা দিক্ এমন সম্পূর্ণভাবে নির্দেশ করিতে পারে । শুধু উপলব্ধি অল্পভূতি নহে কিন্তু যখন উপলব্ধির দ্বারা ভাবের উদ্বেক হয় তখনই তাহা অল্পভূতি ; এবং ভাব বৃদ্ধির সঙ্গে সঙ্গে মনে যে একটা সহজ প্রত্যয় জন্মে,—যাহার দরুণ সত্যের সহিত আমাদের ব্যবধান লুপ্ত হইয়া সত্যকে পূর্ণতর বলিয়া বোধ হয়,—ভাব-প্রণোদিত সেই প্রত্যয়কেও ‘অল্পভূতি’ আখ্যা দেওয়া যাইতে পারে ; কারণ ইহাও অল্পভব করিবার বিষয়, জ্ঞান দিয়া ইহাকে প্রতিপন্ন করা যায় না । বাস্তবিক যে জ্ঞান আমাদের অল্পভূতির মধ্যে আইসে নাই, যাহার ভিতরে আমরা ‘রস’ পাই না, তাহার সহিত আমাদের প্রাণের কোনও সম্পর্ক স্থাপিত হয় না ;—বিচার-বুদ্ধির প্রখরতা, কর্মজীবনের জটিলতা তাহাতে বাড়িতে পারে, কিন্তু তাহা প্রাণের গতির সহিত যুক্ত হইয়া আমাদের প্রসারিত মুক্ত করিয়া দিতে পারে না । সাহিত্যের বিশেষত্ব এই যে সে জড় জগতের ও যুক্তি-বুদ্ধির প্রাধান্য খর্ব করিয়া, জীবনে সত্যাল্পভূতি বাড়াইয়া জ্ঞানের সহিত ভাবের, সত্যের সহিত সৌন্দর্যের বিরোধ ঘুচাইতে চেষ্টা করে ; এমন কি বহিঃপ্রকৃতিকেও অন্তরের লাভণ্যে মগ্নিত করিয়া মর্ত্যভূমির দ্বারা মানব-জীবন সমগ্রভাবে দেখিয়া অনন্ত-প্রসারিত রহস্যের মধ্যে তাহাকে নিমগ্ন করিয়া দেয় ।

## প্রভাতে

অসীম হ’তে উথলে উঠে  
আনন্দেরি ধারা,  
আসীম তারি স্রুথের স্রোতে  
হ’ল আপন-হারা ;  
স্বপন মাঝে স্তম্ভ ছিল  
মোহের উরসে,  
অরুণ রাগে আশীশ্ জাগে  
মলয় পরশে ।  
ভ্রমর ফুলে মিলন আশে  
বেড়ায় গুঞ্জরি,  
গন্ধে গানে জাগায় প্রাণে  
আশার মঞ্জরী ;  
গহন বন মোহন হ’ল  
যাহার আলোকে  
নিখিল বিশ্ব তাহার শিষ্য  
প্রাণের পুলকে ।

## স্রুথের ঘর গড়া

( পূর্ব প্রকাশিতের পর )

( শ্রীঅতুলচন্দ্র দত্ত )

যজ্ঞেশ্বরী দেবী পান-আল্লিক সারিয়া উপরে উঠিয়া আসিলেন । ইতিপূর্বেই মলিনী চাতালের উপর আসিয়া বৃদ্ধা মুসলমানির প্রতি কৌতূহল পূর্ণ প্রশ্ন আরম্ভ করিয়াছিল । বৃদ্ধা তৃষ্ণায় ও পথশ্রমে বড় ক্লান্ত হইয়াছিল, তার উপর কি একটা অসহ গুপ্ত বেদনায় তার মুখমণ্ডল অত্যন্ত ক্লেশ দেখাইতেছিল । বৃদ্ধী

যা' পারিতেছিল ছ' একটার উত্তর দিতেছিল। কিরণ পরিচয় জিজ্ঞাসা করিলে নলিনীই তার উত্তর দিয়া বলিল "চেননি দিদি একে? এ এসমাইলের মা, ও তার বউ—আমাদের ছাত থেকে খালপারে যে তালপুকুর দেখতে পাওয়া যায় ঐখানে ওদের বাড়ী পুৰদিকের ঘরটা এদের; কে সেটা পুড়িয়ে দিয়েছে! বুড়ীর বউ জল আনিবে, বুড়ী পরম আগ্রহে ঢক ঢক করিয়া প্রায় বদনার অধিকাংশ জলটুকু তপ্ত বালির জমির মত শুষিয়া লইল। তার পর "আরে আল্লা!" বলিয়া এমন একটা তুপ্তিসূচক শব্দ করিল যেন বুঝা গেল তার মহাপ্রাণীটা মহাশাস্তি লাভ করিল। কণ্ঠ সরস হইলে বুঝা তখন কিরণ ও নলিনীর সঙ্গে আলাপ আরম্ভ করিল। বউটা তখন বদনার বাকী জলটুকু ছেলের মুখে দিয়া শেষে নিজে একটু পান করিয়া চাতালের শীতল সানের উপর শুইয়া পড়িল।

যজ্ঞেশ্বরী উপরে আসিয়া দৃশ্য দেখিয়া দাঁড়াইলেন। তাঁহার শুভসিক্ত বসন পরা স্নানোজ্জ্বল গৌরবর্ণ সৌম্য গম্ভীর মাতৃমূর্তি দেখিয়া বুড়ী কথা বন্ধ করিল; তার ভয় হইয়াছিল বুঝি ইনি জমীদার বাড়ীর কেহ হইবেন বা। বুড়ী প্রসন্নভরা দৃষ্টিতে নলিনীর দিকে তাকাইল, নলিনী বুঝিয়া উত্তর দিল— "এ আমার জ্যাঠাই মা, সহর হতে এসেছেন।" নলিনী বুড়ীর পরিচয় করাইয়া দিল— "জ্যাঠাই মা! এ এসমাইলের মা আর ও তার বউ, ওইটে ছেলে—"। যজ্ঞেশ্বরী বাধা দিয়া বলিলেন— "ছি: মা, ওইটে বলতে হয় না, ওইটা বলো"। পরক্ষণেই ছেলেটার দিকে তাকাইয়া বলিলেন বৌ দিকি তোমার ছেলেটা তো—বেশ ঠাণ্ডা; ছেলেটা তখন ক্ষুধার আবদার জানাইয়া মাকে অপ্রস্তুত করিতেছে। যজ্ঞেশ্বরী কিছু পয়সা আঁচলে না বাঁধিয়া পথে ঘাটে বাহির হইতেন না। কয়েকটা পয়সা অলক্ষ্যে বাহির করিয়া নলিকে ডাকিয়া চুপি চুপি কি বলিলেন। নলি চাতালের পাশেই যে দোকান ছিল সেখানে ছুটিয়া গেল। এদিকে মা ও মেয়ে বুড়ীর সঙ্গে কথা আরম্ভ করিলেন।

য। কোথা থেকে আসছ তোমরা

বু। তালিবপুর হতে মা, ঐঠেয়ে আমার বহিন্ থাকে তার বাড়িকে গিয়ে ছিছ মা! আর খোদাতালা কি ঠাই রেখেছে মা!—

য। কেন? তোমাদের বাড়ী তো। এই গাঁয়ে নদীপারে না?

বু। ঘর বাড়ী কি আর ছষমনে রেখেছে, মা! মাল্লুস যার ছষমন হয়

মা খোদাতালাও তার ছষমণি করে! (কপালে করাঘাত করিয়া) কাদাল পরীবেস নসীবে বা সবাই ছষমন!

ব্যাপারটা কি যজ্ঞেশ্বরীর মনে খোলসা হইতেছিল না। নলিনী একটা ঠোঙ্গা করিয়া বাতাসা কিছু ও নারকেলের লাডু কয়েকটা এবং গামছার কোণে বাঁধিয়া চারটা মুড়কী আনিয়া জ্যাঠাইএর কাছে ধরিল। যজ্ঞেশ্বরী বুড়ীকে ও তার বৌ নাতিকে কিছু কিছু ভাগ করিয়া দিয়া খাইতে অহরোধ করিলেন। এই অপ্রত্যাশিত দয়া ও মমতার পরিচয়ে বুড়ী ও বৌ অবাক হইয়া গেল। তাহাদের অন্তরাআ ক্ষুধার তাড়নায় জলিয়া যাইতেছিল শুধু খাদ্য অভাবেই পুকুরের জলে উদর পূর্ণ করিয়াছিল। বুড়ী আগ্রহে মিষ্টান্ন হাত পাতিয়া লইয়া বৌ ও নাতিকে ডাকিয়া ভাগ করিয়া দিল। সভ্য সমাজের কৃত্রিম ভব্যতার তারা ধার ধারিত না; কাজেই "থাক থাক, না-না, এসব কেন" প্রভৃতি শিক্ষা-বিকৃত ছদ্মভাবের মৌখিক মিথ্যাবাণী তাহারা বলিল না; বরং বলিল "এ ছষমন গাঁয়ে কে মা তুমি! বাঁচালে, মা; খিদেয় বাছাটীর জানু যাচ্ছিল!"

য। ছষমন গাঁ কেন গা?

বু। (এদিক ওদিক তাকাইয়া) ছষমনের গাঁ বৈ কি মা; গাঁয়ের জমীদার রাজা যদি ছষমন হয় তা হলে সবাই তাই হয় মা! কেউ কাছে এসে না, আহা বলে না! সাধ করে কি গাঁ ছেড়েছিছ মা?

য। কেন কি হয়েছিল!

ন। ওদের ঘর কে পুড়িয়ে দিয়েছিল জ্যাঠাইমা—

য। (বিস্ময়ে) কে? কে গা?

বু। আর কে মা? শত্ভুর ছষমনে! রাজা জমীদারই শত্ভুর, ওরাই ছষমন! আর কে—

য। কেন?

বু। অনেক কথা, মা! অনেক কথা! কাজ কি মা কাদালের কথায়?

য। আচ্ছা শুনবো এখন; তুমি খাও আগে—

বু। না মা! আমি খাবো? আমার ছেলের আগে জান বাঁচুক! এসমাইল আমার ফিরে এসুক তখন খাবো—এ মুখে খাবার দেবো কোন লাজে মা? হে ছষমন—হে শত্ভুর! আরে আল্লা!

বুড়ী কাঁদিতে লাগিল—অঝোরে চোখ দিয়া জল ঝরিতে লাগিল। মা ও



যেহে হু'জনেই বুঝিল গ্রামের জমীদারের কোনো গুরুতর অত্যাচারে এই দরিদ্র অসহায় অনাথ গৃহীণীর এই দুর্দশা ।

কিরণ । মা গো মা ! যে গাঁয়ের কথাই শুনি জমীদারের অত্যাচারের গল্প শুনে শুনে আর কাগজে পড়তে পড়তে সারা হয়ে যাই !

য । জমীদার না ঘরের ঢেঁকী কুমীর সব ! ও গাঁয়েরও এই ভাগুগি !

যজ্ঞেশ্বরী লক্ষ্য করেন নাই যে পুরোহিত-পত্নী ও সাহা-ঘরণী পা টিপিয়া টিপিয়া আসিয়া উপরে উঠিয়াছে । যজ্ঞেশ্বরী অনেক পূর্বে স্নান সারিয়া উঠিয়াছেন, তবু চাতালে এত দেবী কেন ? কি ব্যাপার ? ইত্যাদি জানিবার নিমিত্ত উভয়ে কৌতুহলে দমকাটার মত হইয়াছিল । তাড়াতাড়ি স্নান সারিয়া তাই পা টিপিয়া টিপিয়া উপরে আসিল । যজ্ঞেশ্বরী বুড়ীর কথায় ও নিশ্চয় ভাবে মগ্ন ছিলেন, পরের গতি বিধির অত শত খেয়াল করেন নাই । যেখানে বাঘের ভয় সেইখানেই সন্ধ্যা হয় । যজ্ঞেশ্বরী-কৃত জমীদার মন্তব্য পুরোহিত পত্নীর কানে গেল । উহাদের দেখিয়াই যজ্ঞেশ্বরী কিরণকে ও নলিনীকে কাছে টানিয়া লইয়া পথ ছাড়িয়া দিলেন । চাতালের উপর উপস্থিত হইয়া দুই জনকেই বিশেষতঃ পুরুষ গিন্নি মুখটা বিকৃত করিয়া পায়ের কাপড় হাঁটুর উপর তুলিয়া, কেবল মাত্র আঙ্গুলের উপর ভর দিয়া হাঁটিতে হাঁটিতে মুসলমানী হু'জনকে ঈর্ষিত করিয়া তিরস্কার করিলেন ;—“এ যে এসমাইলের মা দেখছি ! এ কি বাছা তোদের কাণ্ড ? মুছলমানের ? মেয়ে তোরা হিঁদুর ঘাটে এসেছিস, তা এক পাশে বসলেই তো পারতিস ? না, গোটা চাতালটা জুড়ে—কি এলুৎ কাণ্ড মা !—

সাহাপত্নী । দেখো ঠাকুরন ! সব এঁটো পড়ে—ছিঃ ! বল মা—

পুকি ।—ও মা সত্যিই তো ? ছিঃ ছিঃ কি মুছলমানে কাণ্ড গো ! কি সব গোস্ব ফোস্ব খাচ্ছে নাকি গো ? ছিঃ মা ছিঃ ছিঃ—

নলিনী । গোস্ব কেন খেতে যাবে ? সন্দেহ বাতাসা খাচ্ছে দেখছুনী—

পুকি । হ্যালো হ্যা থাম্ ভোলার মেয়ে বুঝি ? কথা শিখিছিস তো

খুব । ( সাহা পত্নীকে ) দেখো বাছা—এই সব পায়ের দাগ মাড়িওনি যেন—মাগো হিঁদুর ঘরেও জাতবিচের নেই মা—

কিরণ আর থাকিতে পারিল না । কি বলিতে যাইতেছিল । যজ্ঞেশ্বরী চোখ টিপিয়া দিলেন । পুরোহিতপত্নী ও সাহাগৃহিণী কোনো মতে শুচি ও আচার ধর্ম রক্ষা করিয়া সরকারি পথ ছাড়িয়া নেউগীদের নারিকেল বাগান

দিয়া বাড়ী ফিরিলেন । বুড়ীর বিশ্রাম শেষ হইলে সেও বৌ ও নাতি লইয়া উঠিল ।

যজ্ঞেশ্বরী ও কণ্ঠাদের লইয়া উহারই সঙ্গে সঙ্গে চলিলেন । তাঁহার কৌতুহল এখনো চরিতার্থ হয় নাই । পথে যাইতে যাইতে আবার কথা তুলিলেন :—

য । গিছলে কোথা ?

বু । রাজাগাঁর হাঁসপাতালে মা—ছেলে সেখানে আধমরা হয়ে পড়ে আছে দেখতে গেছলু মা—আর যাব কোথা—

য । কি অসুখ ? হাঁসপাতালে কেন ?

বু । তবে শোনো মা—হুসমনের গাঁ, মা, কথা বলতে সাহস পাইনে—

য । তা হোক আমি তো হুসমন নই তুমি বল—

বু । না মা তুমি কেন হুসমন হবে ! খোদা তোমার ভাল করুক মা—

য । ছেলের কি হয়েছে ?

বু । হুসমনে মা ঘরে আঙুন জেলিয়ে দেয় তাই নিবুতে গিয়ে ছেলে আধ পোড়া হয়ে অজ্ঞেন হয়ে যায়—

য । কে ঘর জালিয়ে দেয়—

বু । হুসমনে, আবার কে গায়ের রাজাই হুসমন—

য । কেন ?

বু । তবে শোন মা মোর নানীর ছেলে ইব্রাহিম ; তাকে জমীদার বলে তোকে সাহেবের খানার এঁটো পরিষ্কার করতে হবে—তা মা সে বলে মুই তা জান গেলেও পারবোনা—হারামের গোস্ব খেলে সাহেব, মুছলমানে তা ছোঁবে মা ? তা সে করেনি । তাই জমীদার দরওয়ান দিয়ে তাকে আধমরা করে মা ! সে রোখা জোয়ান ছেলে । জমীদারের নামে নালিশ করে—হা খোদা ! খোদার কি চোখ আছে মা—

য । তার পর ?

বু । তার পর মা মোর ছেলে এসমাইল সাক্ষী দেবে বলে—সে নিজ চোখে দেখেছিলো কিনা—তা শুনে জমিদারের স্বমুন্সী চৌধুরী—এসমাইলকে ভেবে মানা করে বলে—তুই সাক্ষী দিতে পাবিনি—তা এসমাইল খুব রোখা মরদ, সেও বলে মা আমি সাক্ষী দিবুই—মাথার উপর খোদা থাকতে মিছে বলবুনি ; আবার মোর জাত ভাই যখন বিপদে পড়েছে মুই তাকে বিপদে ভেসিয়ে যাব ?

কিরণ । বাঃ বেশত ! গরীব হলে কি হবে মা ? মনের তেজ দেখ ?—

বু । ই্যা মা যেমনি বুকের পাটা তেমনি তেজ মা—তা মা খোদা কি দেখলে ? সেই রাগে মা ছেলের ঘর জেলিয়ে দিলে—ছেলে তো আধপোড়া হয়ে হাঁসপাতালে পড়ে আছে—আমি মা বহিনের বাড়ী এদের নিয়ে আছি, আবার সেখানে যাচ্ছি মা ;

কিরণ । কখন পৌঁছবে ?

বু । সেই বিকেল সাজ হবে মা ! মরদরা এক পহরেই চলে যায়— এই ছেলে নিয়ে বুড়া মাহুষ মা প্যাটে ভাত নেই—

য । তা এসমাইলের মা ! আজ এ গাঁয়ে থাক, খাওয়া দাওয়া করে কাল যাবে ?—

বু । ছুষমন গাঁয়ে ? না মা—ঘর কোথা ?

য । এ বেলা আমার ওখানে খেয়ে যাবে—রাত্রিরে থেকে কাল যাবে—

বুড়ী কিংকর্তব্য বুঝিতে না পারিয়া অগ্রমনা হইয়া বধুর দিকে তাকাইল । বৌটা আনন্দে ইচ্ছা জানাইল । স্নেহস্বধার্ত বিরহী অনাদৃত মন কোথাও একটু আন্তরিক স্নেহ মমতা যেখানে পায় সেই খানেই বশীভূত হইয়া পড়ে । এই আধ ঘণ্টার আলাপে বুড়ী ও বুড়ীর পুত্রবধু এই মাতৃহৃদয় রমণী দুটির পায়ে তাদের রক্তজ্ঞতা পূর্ণ ভক্তিসরস প্রাণ ছুটি লুঠাইয়া দিয়াছিল । ভগবানের সংসারে অন্তরের ভালবাসা দিয়াই আপন পর বিচার হয় । আমাদের সংসারে আমরা কিন্তু রক্তের যোগ দিয়াই আপন পর নির্ণয় করি । অথচ পদে পদে আমাদের মাপ কাঠি বা বিচার লক্ষণের ভুল দেখি, তার ফলভোগ করি, তবু আমাদের চোখ খোলে না । ইশা, মুশা, বুদ্ধ, খ্রীষ্টচতু প্রভৃতি বড় বড় Prophet বা অবতারগণ কেন যে সব তুলিয়া প্রেমের রাজ্য প্রচারেই ব্যস্ত হইতেন—মতের রাজ্য গঠনে নয় তা বেশ বোঝা যায় । “ভাল বাস, সকলকে ভালবাসে, ভালবেসে পরকে আপন কর, পরের জন্ত মর, মরে বাঁচ—এতেই মুক্তি” এই তাঁদের ছিল একমাত্র শিক্ষার মন্ত্র । কিন্তু তাঁদেরই প্র-পর-অপ এবং উপশিষ্যরা তাঁদেরই শিক্ষার দোহাই দিয়া মাহুষকে ঘৃণা করিবার, পায়ে ঠেলিবার এবং দলিবার কেমন হৃন্দর ব্যবস্থা করিয়াছেন ! এই বাঙ্গালা দেশ প্রেম-সন্ন্যাসী গৌর নিতাই এর শিষ্য বলিয়া গর্ব করি ! যে মহাপ্রভুরা হরিদাস যবনকে কোলে তুলিয়া লইয়াছিলেন জগাই মাধাই যে বুকে জড়াইয়া ধরিয়াছিলেন সেই মহাপ্রভুদের আধুনিক ভক্ত শিষ্যরা এমনি এক ছুঁৎ-মার্গ

পঠন করিয়া অপর সব নিম্নজাতিকে অস্পৃশ্য বলকে দাগী করিয়া রাখিয়াছেন যে দেখিলে শিহরিতে হয় ; মনেই হয় না এই দেশেই মাত্র তিন শত বৎসর আগে এক দিগ্বিজয়ী মহাপ্রেমিক প্রেম বহা বহাইয়া ছোট বড় সাধু অসাধু ; পণ্ডিত মুর্থ, স্পৃশ্য অস্পৃশ্যকে সকলকে এক শ্রোতে ভাসাইয়া ডুবাইয়া মাতাইয়া একাকার করিয়া দিয়াছিলেন ! আদর্শের এমন অধঃপতন, আচারের এমন ব্যাভিচার ধর্মের এমন-ধর্মনাশ কোনো দেশে এরূপ হইয়াছে কিনা জানি না ।

যজ্ঞেশ্বরী বুড়ীকে ও তার বৌ নাতিকে লইয়া নিজের বাড়ীতে উপস্থিত হইলেন । পরম সমাদরে দাওয়ার উপর একটা কঞ্চল বিছাইয়া তাহাদের বসাইয়া কাপড় ছাড়িতে গেলেন ।

বুড়ী বসিতে ইতঃস্ততঃ করিতেছে দেখিয়া কিরণ বলিল, “তা হোক, বসো—কঞ্চলের আসনে দোষ নেই—বসো ভাই !” বউটা অপ্রত্যাশিত ভাই’ সম্বোধনে অভিভূত হইয়া পড়িল । তার চোখ ভিজিয়া উঠিল ।—

পাড়াগাঁয়ের ছোট সীমার মধ্যে কোন গৃহস্থ কি করে তা বৈশিষ্ট্য অপরের কাছে অজ্ঞাত থাকে না ! সৌদামিনী রামাঘরের বাহিরে আসিয়া দেখিল এসমাইলের মা দাওয়ার উপর কঞ্চলাসনে পরম আদরে উপবিষ্ট ! এর আগে গেরস্বর ছোটখাটো কাজ কর্মের উপলক্ষে এসমাইলের মা কতবার এ বাড়ীতে আসিয়াছে কিন্তু এমনতর আদর তো সে কখনো পায় নাই ! একে গরীব চাষাভূষা তাতে মুসলমান জাতি ! হিঁদু বাউন বিধবার বাড়ী এমন অভ্যর্থনা ! বুড়ী যেন একটু কেমনতর হইয়া গেল ! বিশেষ সৌদামিনীকে দেখিয়া !—সে যেন Apologyর স্বরেই বলিল “গিন্নিমা ছাড়লেনা যে মা, তাই এসে বসল !” । সৌদামিনী বুঝিল দিদির কাণ্ড—সে অগ্র কিছু না বলিয়া বলিল “তা বেশ তো, বসো বসো, এসমাইল তো হাঁস পাতালে ? কেমন আছে ? ফিরে এসেছে ?—

বু । না মা ! ভাল আছে, তবে উঠতে হেঁটতে পেরেনি, হুগা বাদে ছাড়ান পাবে গো ।

সৌ । কোথা আছিস বউ নাতি নিয়ে ?

বু । তালিবপুরে মা, বহিন বাড়ীতে—। আর খোদা ঠাই রেখেছে কি ? যজ্ঞেশ্বরী বুঝিয়াছিলেন তার এই উদ্ভট অভ্যর্থনা ব্যাপারে সচ্ছ হইতো একটু ক্ষম হইবে ; তাই সাক্ষাই করিবার জন্ত, বাহিরে আসিয়াই বলিলেন—সচ্ছ গুনিছিস ব্যাচারীর চঃপের কথা ।

স। আমরা তো দিদি আগে হতেই সব জানি!

য। তা ঠাকুরপো আর সেই বা কি করবে?

স। জলে বাস করে কুমিরের সঙ্গে লড়াই করবে এমন কি ক্ষমতা তার দিদি?

য। তা তো বটেই, সহ, ওদের নেমতন্ন করে এনেছি আহা ব্যাচারীয়া সমস্ত দিন কিছু খায়নি! না খেয়েই বাড়ী ফিরছিল, ধরে এনেছি—

স। বেশতো দিদি, তোমার যুগ্মি কাজ করেছ।

সহুর হৃদয় এক নবীন অনাস্বাদিত প্রীতি ও ভক্তিরসে উচ্ছলিত হইয়া উঠিল। ভালবাসা এমনি ছোঁয়াচে রোগ!

বাড়ীর সকলেই যেন একটা স্বর্গীয় আনন্দে ও উৎসাহে ভরিয়া উঠিল। অতিথি নারায়ণের পূজার উৎসবে গৃহস্থের প্রাঙ্গণটা যেন অপূর্ণ রূপ ধারণ করিল।

এমন সময় আমাদের পূর্বপরিচিত যশোদা দেবী পুত্র কোলে পাড়া বেড়াইতে বাহির হইয়া মুখ্যে বাড়ী প্রবেশ করিল। যশোদা বাড়ী ঢুকিয়াই মুসলমানীদের রকে কুটুম্ব আদরে উপবিষ্ট দেখিয়া অবাক হইয়া গেল! তার যেন বসিতে পা উঠিল না। যজ্ঞেশ্বরীকে দেখিয়া কৌতুহল দীপ্ত হইয়া জিজ্ঞাসা করিল—এ আবার কি বউদি?

য। কি আবার?

পাছে ব্যাচারীদের অসম্মম স্মৃচক কোনো কথা যশোদা বলিয়া ফ্যালে এই ভয়েই আগে হইতেই বলিলেন—আমি ভাই এদের নেমতন্ন করে এনেছি—”

যশোদা। তা ভাল! পাল পার্কনের দিন কুলিন বাউন পেয়েছ ভাল—

য। হ্যাঁ দিদি ভগবানের গড়া মাহুধ—সব জীবের কুলীন তো বটে!

যশোদা। হিঁহু বাউনের বাড়ী ঘর—

য। যার যেমন রুচি প্রবৃত্তি দিদি! ওর ছিষ্টিকর্তা আর আমার ছিষ্টিকর্তা কি আলাদা ভাই; সে যাক্—ছেলের কি হয়েছে? আহা কালী মূর্তি যে?

যশোদা। হ্যাঁ ভাই আজ দুদিন হতে পেটের অস্থখ অর। এই দুধ খাওয়াই তা বমি করে ফেললে—

য। পেটের অস্থখে দুধ দিলে কেন? ও যে বিষ—

যশোদা। আর কি ই বা দেব বল।

যশোদার কিন্তু আর বলিবার বা গল্প করিবার প্রবৃত্তি ছিল না। ব্রাহ্মণের বিধবার বাড়ীর এই অনাচার কাণ্ডে তার সনাতন আচার বৃদ্ধি একেবারে

হততথ হইয়া গিয়াছিল। এই অদ্ভুত বার্তা বাড়ী বাড়ী প্রচার করিবার জন্য তাহার উদরায়ান ঘটবার উপক্রম হইল। সে একটা অছিল। করিয়া ফিরিবার উপক্রম করিল।

যশোদা। যাই তাই রোগা ছেলে নিয়ে আর বসবোনা—

যজ্ঞেশ্বরী বুঝিলেন যে যশোদাদেবী রুগ্ন পুত্রের মঙ্গল চিন্তায় কতদূর উতলা হইয়াছে। মনোভাব চাপিয়া বলিলেন—তবে এস, দুধ দিওনা, ছেলেকে বারলি বা এরাকট যা হয় দিও, দুধে আরো পেট খারাপ করবে”—

যশোদা। জানিতো ভাই, তা ওসব বন্বট করে কে? দোকান হতে এলো তো বারলি হবে—? যাই দেখি। যশোদা চলিয়া গেল।

কিরণ হাসিয়াই অস্থির। বলিল—“পাড়া বেড়ানো বা পরচর্চার বন্বট নয়, ছেলের সেবা শুশ্রূষার বন্বট নয় না—ধন্নি বাবা!”

যশোদা বাড়ী ফিরিবার পথে যতগুলি সাথীর অনাস্বীয়ের বাড়ী ছিল সব বাড়ীতে ঢুকিয়া যজ্ঞেশ্বরী দেবীর অনাচার কীর্তি অতিরঞ্জন যোগে বর্ণনা করিয়া প্রায় দুই প্রহর অতীত করত: ভিটায় পদার্পণ করিলেন।

বার্তা শুনিয়া ছেলে বুড়া, ছুড়ী বুড়ী যে যেথায় ছিল কাজ কর্ম ফেলিয়া মুখ্যে বাড়ীতে ঢুকিয়া চক্ষু কর্ণের বিরোধ ভঞ্জন করিয়া গেল। যাইবার সময় মস্তব্য অমস্তব্য যে দু' একটা প্রকাশ না করিয়া গেল তা নয়। সৌদামিনী প্রথমত: অপবাদ ভয়ে কিছু সমস্তা হইয়াছিল কিন্তু দিদির অপূর্ণ ওদাসীত্ব লক্ষ্য করিয়া চূপ করিয়া গেল। সেও যেন বৃকে বল ভরসা পাইয়াছিল।

রান্না বাস্না শেষ হইলে যজ্ঞেশ্বরী পরম যত্নে বুড়ীকে ও তার বৌ ও নাতিকে সেই রকে বসাইয়া তৃপ্তির সহিত ভোজন করাইলেন। এমন সময় ভোলানাথ ও পুরুষ বাড়ীর এক প্রতিবেশিনী এক বর্ষিয়সী বিধবা বাড়ী ঢুকিলেন। ভোলা-নাথ এসমাইলের মাকে ভোজননিরতা দেখিয়া অবাক হইল। সে সমস্ত পুরূহ বাড়ীতে ছিল না। নিকটের এক গ্রামে খড় কিনিতে গিয়াছিল। পথে বর্ষিয়সীর সঙ্গে দেখা হয়। বর্ষিয়সী লোকমুখে যজ্ঞেশ্বরীর কীর্তিকাহিনী শুনিয়া ব্যাপার দেখিতে আসিতেছিল। ভোলানাথের সঙ্গে দেখা হইতে বলিল, ‘ছোট বউএর কাছে একটু কাজ আছে বাবা তাই যাচ্ছি।’ ভোলানাথ বলিল ‘বেশ তো চল।’

বর্ষিয়সীর নাম ইচ্ছাময়ী। লোকে তাকে ইচ্ছা ঠাকরণ বলিত। ইচ্ছা-ঠাকরণ যজ্ঞেশ্বরীর অতিথি সেবা দেখিয়া অবাক। নাক সিটকাইয়া বলিলেন

“তোমাদের বাছা সব বাড়াবাড়ী, মুছুরমান খাওয়াবে তো উঠোন ছেল তো !  
আবার নিজেদের ঘর করার ঘটা বাটা নোংরা করেছ ?”

য। তাতে কি মা ? বেরাল কুহুরেও তো ঘটা বাটাতে মুখ দেয় !

ই। ওরা যে মুছুরমান গো ! কি কথা মা তোদের ?

য। মাহুষ তো বটে মা ! কুহুর বেরালের চেয়ে তো ভাল ?

ই। সে কি গো ? ধর্মান্ধ জাতবিচারে তো আছে ?

য। জাত বিচার কি গরীব গেরস্থর বেলায় বাছা ? তোমাদের জমীদার  
বাবু যে বাড়ীতে সাহেব এনে শস্যের গরু খাওয়ালে তাতে তাদের জাত  
যায় নি ?

ই। ঝগড়া করতে তো আসিনি বাছা। যার যা রুচি পিরবিত্তি হবে  
করবে—

য। তবে আর কেন ? কথা তুলেই কথা শুনতে হয়—

ই। ছোট বউ কোথা'লো ?

সহু বাহির হইয়া আসিল।—‘কেন গা পিসি ?’

ই। সেই পইতের পয়সা কটা দিতে পারবি মা ?

সহু ছু আনা পয়সা আনিয়া ইচ্ছাময়ীকে দিতে গেল। ইচ্ছাময়ী সরিয়া  
গিয়া বলিল—“রাখ ওই খেনে বাছা, ছু'সনি যত তোদের খিষ্টানী কীষ্টি !”—  
সহু হাসিয়া মাটিতে পয়সা কটা রাখিয়া দিল। ঠাকরণ তুলিয়া লইয়া আঁচলে  
বাঁধিয়া চলিলেন। সহু হাসিয়া কিরণ বলিল—‘নেয়ে যেও ঠান দি—ছোয়া  
পয়সা।’ ইচ্ছাময়ী ব্যঙ্গটুকু বুঝিল। বক্তার একবার মাত্র আক্ৰোশ দৃষ্টি নিক্ষেপ  
করিয়া কিছু না বলিয়া চলিয়া গেল।

ভোলানাথ ইত্যবসরে যজ্ঞেশ্বরীর কাছে সব কথা শুনিয়া লইল। ‘হাঁ’ ‘না’  
কিছু না বলিয়া সে তেল মাখিতে বসিল। যজ্ঞেশ্বরী হাসিয়া বলিলেন—“কি  
ঠাকুরপো ? খুব চটেছ ?”

ভো। কে ? আমি ? না—চটবো কেন বৌদি ?

য। স্নেহ কাণ্ড করছি ?

ভো। আমি চটিনি তবে গায়ে একচোট খুব টি টি পড়ে যাবে—

য। ভয় হয়েছে তা হলে ?

ভো। ভয় আর কি ? তবে একটা কথা জমীদার বাড়ীর কাজকর্ম নিয়ে  
খোঁটা দিলে—জানই তো।

য। ঘর জালিয়ে দেবে ? তা দিক্। তুমি নেয়ে এসে খেতে বসো।  
যজ্ঞেশ্বরী অতিথি সেবায় মন দিলেন। ভোলানাথ স্নানে গেল।

ভোজনান্তে তৃপ্ত হইয়া বৃড়ী নাতি লইয়া স্বস্থানে ফিরিয়া আসিয়া বসিল।  
বৌটি গিয়া এঁটো স্থান পরিষ্কার করিয়া ঘটা বাটা মাজিয়া উঠানের একপাশে  
রাখিল। তাদের ছোয়া বাসন হিন্দুর ঘরে কি করিয়া উঠিবে ভাবিয়া সে  
লঙ্কিত ও চিন্তিত হইতেছিল। যজ্ঞেশ্বরী বলিলেন “নাও মা এসে জিরোও, ও  
থাক ওই খেনে; গঙ্গাজল ছুইয়ে আগুন ঠেকিয়ে নিলেই শুদ্ধ হবে—তুমি এস।”

বৌটি নিশ্চিত হইয়া আসিয়া বসিল।

বেলা পড়িলে তাহারা উঠিল। যজ্ঞেশ্বরীর জিদ সত্ত্বেও তারা ফিরিতে  
ব্যস্ত হইল। যজ্ঞেশ্বরী গতান্তর না দেখিয়া বলিলেন—“তা এসমাইলের মা  
এসমাইল হাঁসপাতাল হতে ফিরে এলে যেন দেখা করে—আমার খালধারের  
বাগানে জায়গা দেব, ঘর তুলে থাকবে, সব গাঁ ছাড়া হবে কেন ? আমার  
ঝাড়ের বাঁশ দেব ঘর তুলো।”

বৃড়ী কি বলিবে কেবল নির্বাক হইয়া তাকাইয়া রহিল। চোখে শুধু  
ঝর ঝর করিয়া জল পড়িতে লাগিল। অনেক পরে বলিল, “এসমাইল ফিরে  
এসেই তোমাদের পায়ের ধুলো নে যাবে মা খোদা তোমাদের ভাল করবে”

বৃড়ী উঠিল। যজ্ঞেশ্বরী ঘরে ঢুকিয়া দুটা টাকা ও সের কয়েক চাল, কিছু  
আনাজ তরকারী নমত বৃড়ীকে আনিয়া দিল। বৃড়ী পরম ভক্তিভরে জলভরা  
চোখে প্রীতির দান লইয়া সাষ্টাঙ্গে গড় করিয়া বিদায় হইল।

বৃড়ীর ও তার বৌ দুজনেরই বুক কুলে কুলে ভরিয়া উঠিয়াছিল এবং  
দুজনেরই চোখ ছাপাইয়া পড়িল।

উহারা চলিয়া গেলে, যজ্ঞেশ্বরী বাসনগুলি আগুন ছোয়াইয়া ঘরে তুলিল।  
সহু বুঝিতে পারিল সোণার স্পর্শে সেও সোণা হইয়া উঠিতেছে।

## বাঁশী

( শ্রীসুধাকান্ত রায়চৌধুরী )

বাঁশের বাঁশী নয় তো শুধু বাঁশের বাঁশী নয়  
লক্ষ যুগের কান্না হাসি ওই বাঁশীতে রয় ।  
বন্ধ ঘরে রইল যারা বন্ধ বছদিন  
চক্ষে মনে আঁধার টানি মুক্তি-মুখহীন—  
মুক্ত হল শান্তি পেল আশ্রিত হল দূর  
শুনতে পেয়ে মনে প্রাণে বাঁশের বাঁশী সুর ।  
হাজার বছর পার হয়েছে হাজার রাজা শেষ  
ইতিহাসের বক্ষে তারি মিলবে দেখ লেশ,  
কতই ওঠা কতই নামা ধুলায় হল লয়  
বাঁশীর সুর যায় কি ভোলা! সম্ভব কি হয়?

রাধার প্রাণে ফাগুন আনে যখন বাঁশী বাজে  
মন যে তার ব্যাকুল করে বিদ্রুপ ঘটে কাজে  
বাঁশীর সুরে উজান বহে যমুনারি জল  
কাঁটার বনে কুসুম ফোটে মধুর নিরমল ।  
চাঁদনি রাতে নাচনি হাওয়া কুসুম হতে ফুলে  
বাঁশীর সুরে অবস হয়ে কেবল পড়ে তুলে ।  
শ্রাবন মেঘে আঁধার নামে দিগন্তের কূলে  
স্বপন মায়া জড়িয়ে দিয়ে বর্ষা রাণীর চূলে ;—  
মন যে তার উদাস করে মুখ যে হয় ভার—  
শুনলে পরে বাঁশীর সুর কেবল বার বার  
ওরে আমার প্রাণের বাঁশী  
না হয় তুই ওরে  
কারো হাতে বাঁশের গড়া  
বাঁশীর রূপ ধরে

ব্যাকুল সুরে ওঠরে বেজে  
বনের তীরে তীরে  
সুরটি তার লাগুক এসে  
আমার বুক ভরে—  
বাইরে মোরে—নিক সে টানি  
মুক্তি যেথা ভাসে  
বংশীধারীর নীলসাগরের  
শুভ্র ফেধা রাশে ।

## আন্তর্জাতিক চিরন্তন শান্তি

তাহার উপায় ও সম্ভাবনা ।

( শ্রীসুকুমাররঞ্জন দাশগুপ্ত এম, এ )

( পূর্বপ্রকাশিতের পর )

জাতীয় সংঘ গঠনের প্রস্তাবটি এক নূতন মহাবিকাশের আয় জগতে একটা আনন্দের উৎস ছুটাইয়া দিয়াছে—পৃথিবীব্যাপী একটা আন্দোলনের সাজা পড়িয়া গিয়াছে, যেন চারিদিকে আনাকহুন্ডি বাজিয়া উঠিয়াছে। কিন্তু সত্যই কি ইহা একটা নূতন আবিষ্কার? প্রকৃত পক্ষে এই League of Nations বা জাতিসংঘের পরিকল্পনাটি এক অতি প্রাচীন সংস্কারের নূতন অভিব্যক্তিমাত্র। সেই প্রাচীন কাল হইতেই কিরূপে দেশে শান্তিরক্ষা করিতে পারা যাইবে এবং কিরূপেই বা যুদ্ধের বিভীষিকা কতকটা দূর করা যাইবে এই উদ্দেশ্যে অবিরত প্রয়াস চলিয়াছে। প্রাচীন গ্রীসে যে এ চেষ্টা পরিণতির দিকে অনেকটা অগ্রসর হইয়াছিল, তাহার নিদর্শন আছে। প্রথমতঃ একটা Congress of states বা রাষ্ট্রসমিতি ছিল, দ্বিতীয়তঃ ছিল, একটা পররাষ্ট্রদ্বারা মধ্যস্থতার ব্যবস্থা বা Arbitration of States ; যেমন Sparta ( স্পার্টা ) ও মেসিডোনিয়া পরস্পর বিবাদোন্মুখ হইলে এথেন্স হইল তাহাদের মধ্যস্থ। এইরূপে ক্ষুদ্র রাজ্যগুলির সকলের পক্ষেই মধ্যস্থতা-বিধি প্রচলিত ছিল। কি সমাজগত কি ব্যক্তিগত সকল আদর্শের মূলই ছিল তখন শান্তি। মধ্যযুগে

যখন নরহত্যা বা ছোট বড় যুদ্ধ একটা দৈনন্দিন ঘটনার মধ্যে গণ্য ছিল, তখন লোকে শান্তি পাইবার জন্য আশ্রয় লইত ধর্মমন্দিরের অভ্যন্তরে। সেই সময়-কার সামাজিক উন্নতি বা চিন্তাস্রোতের ধারার অনুসরণ করিলে মনে হয় যেন League of Nations বা জাতিসংঘের পরিকল্পনাটি—তখনও বেশ ফুটিয়া উঠিয়াছিল। মধ্যযুগের ধর্মযাজকগণ মানবের এই যুগুৎস্ব ভাব দমন করিতে যথেষ্ট প্রয়াস পাইয়াছিলেন। তাঁহারা অধঃপতিত ও প্রপীড়িতের উদ্ধারের জন্য নিঃসহায়ের সাহায্যকল্পে ও আত্মের পরিত্রাণ মানসে শক্তির নিয়োগ করাইতেন, এইরূপে শক্তির সাধন বা পরাক্রম প্রদর্শন ধর্মের একটা অঙ্গরূপে পরিণত হইয়াছিল। রোমের অভ্যুদয়ের দিনে Pope বা তৎকালীন খ্রীষ্টজগতের প্রধান ধর্ম যাজকই ছিলেন আন্তর্জাতিক বিচারক এবং কোনও মারাত্মক রকমের বিবাদ উঠিলে বিভিন্ন রাজ্যের বা জাতির তিনিই মধ্যস্থতা করিতেন। এইরূপে পোপের স্তম্ভমুখে যখন অসীম শক্তির তিনি অধীশ্বর ছিলেন, তখন প্রতিদ্বন্দ্বী জাতিসমূহের মধ্যে আপনার প্রভাব অক্ষুণ্ণ রাখিয়া তিনি বিচার করিতে পারিতেন; তখন কেবল মানবপ্রীতি, ন্যায়শক্তি ও শান্তিস্থিতিই তাঁহার লক্ষ্য ছিল। আবার সেদিন যখন ফরাসী দেশে রাজপ্রাধা অসহ হইয়া উঠিয়া মহাবিপ্লবের সৃষ্টি করিল, তখনও সেই ফরাসী বিপ্লবের অভ্যুদয়ে যুরোপে এই কথা জাগিয়াছিল। কিন্তু সারা জগৎকে একসূত্রে বাঁধিবার কল্পনা ফ্রান্সে জাতিগঠন করিয়াই তখনকার মত নিবৃত্ত হইল। ঊনবিংশ শতাব্দীতেও সেই কল্পনার ধারা বহিয়া আসিয়াছে; জাতিধর্ম ও রাষ্ট্রধর্মকে অতীতের সন্ধীর্ণতা ও ভেদবুদ্ধিজনিত বলিয়া অনেকের ধারণা জন্মিয়াছে। তাঁহারা বলেন বিজয়দৃষ্ট সেনাপতি যখন সগর্বে বিজয় পতাকা উড্ডীন করিয়া অরিদল মথিত করিয়া ছুটে তখন সে স্বজাতির মুচ অহঙ্কার ও দাস্তিকতার প্রতিমূর্তি। স্বদেশের সীমারেখা লইয়া ধরাবক্ষ বিদীর্ণ করিবার প্রয়াস অর্থবা বর্ণবৈষম্য ও আচারবৈষম্য লইয়া পণ্ডিত মুখের কোলাহল, সে শুধু অজ্ঞতা ও সন্ধীর্ণতার নামান্তর।

চিরস্থায়ী শান্তি সম্বন্ধে আলোচনা করিতে গিয়া Kant কতকগুলি প্রাথমিক উপায় নির্দেশ করিয়াছেন। তিনি বলিতেছেন, রাজ্যরক্ষার্থ স্থায়ী বেতনগ্রাহী সৈন্য উঠাইয়া দিতে হইবে, সাধারণ অস্থাবর সম্পত্তির মত কোনও রাজ্য হস্তান্তরিত করিলে চলিবে না, রাজ্যের মধ্যে সাম্প্রদায়িক কোন গোলমাল হইলে বাহিরের রাজ্য তাহাতে হস্তক্ষেপ করিতে পারিবে না,

যুদ্ধের জন্ত জাতির নামে ঋণগ্রহণ বন্ধ করিতে হইবে—যুদ্ধাসক্তিদমনের পক্ষে ইহা অনেকটা কার্যকরী হইবে। আর সর্বশেষে তিনি বলেন, বাণিজ্যের প্রসারের সহিত সকল দেশ একই স্বার্থসূত্রে বন্ধ হইলে চিরস্থায়ী শান্তিস্থাপনের পথ অনেকটা সরল হইয়া যাইবে। মহাত্মা কোমতও এই প্রস্তাবের মীমাংসা করিতে যাইয়া বলিয়াছেন—বিশ্বমানবের সেবাই ইহার একমাত্র সম্মুখান। পরিবার জাতি বা রাষ্ট্রের স্বার্থ যেখানে বিশ্বমানবের মঙ্গলের বিরোধী হইয়া দাঁড়ায়, সেখানে বিশ্বহিতে সমুদায় স্বার্থবলিদানে সঙ্কোচ করিলে চলিবে না। মানুষ কেবল মানুষ বলিয়াই প্রেমাস্পদ এ জ্ঞানটা সর্বপ্রথমেই বন্ধমূল করিতে হইবে। কিন্তু দুই চারিজন মহাত্মভব ব্যক্তির মনে এ ভাব ফুটিয়া উঠিলেও, জন সাধারণের উপর ইহার আধিপত্য বিস্তৃত হয় নাই। সকল বিরোধ ও অশান্তির মূল যে দর্প, কাম ও কামনা, তাহার উৎপাতন এ পর্যন্ত হইল কৈ? এ তিমির দূর করিতে হইলে প্রথম প্রয়োজন জ্ঞানের আলোক, সে আলোক বিস্কুরিত হইবে ধর্ম ও প্রেমের প্রদীপ হইতে। স্বাধীনতা ও শাস্ত্রের কথা অনেক আলোচিত হইয়াছে, তাহাতে আন্তর্জাতিক শান্তিস্থাপন কতটা অগ্রসর হইয়াছে? মোটকথা—মানুষকে যদি প্রকৃত মহত্বের পথ দেখাইয়া দেওয়া না যায়, মনের ঘানি ধৌত করিবার প্রয়াস যদি না পাওয়া যায়, তবে ভ্রাতৃত্ব-ভাব স্থাপনের চেষ্টা বিড়ম্বনা মাত্র। কারণ মানুষ যদি ভাবে যে সে তাহার স্বেচ্ছাচারিতার পথে চলিয়া বেশ সুখ পাইতেছে, তবে প্রেমসাধন সে করিবে কেন?

কিন্তু যখন যুরোপের রাজনীতি-গগনে প্রকাণ্ড বাড উঠিয়া অনেক চিন্তা ও মানসিক ভাবের ওলট পালট করিয়া দিয়া গেল, তখন এই টুকরা টুকরা কল্পনা ধারা একত্র জমাট বাঁধিয়া মানুষের মনে বিশেষ স্থান অধিকার করিয়া বসিল। বাস্তবিক সেই সকল আলোচনা ও শিক্ষার দ্বারা সাধারণ স্তরের লোকেরও মানসবীণা এমন একটা উচ্চ সুরে বাঁধা হইয়া গেল যে যেমনই এখন League of Nations বা জাতি-সংঘের প্রস্তাব উপস্থাপিত হইয়াছে অমনি উহা সহসা গ্রহণ হইয়া বাজিয়া উঠিয়াছে। কিন্তু এই আন্তর্জাতিক শান্তিস্থাপনের প্রথমটা প্রাচীন রাজনীতিবিদগণের পক্ষে যেমন তত কঠিন ছিল না, এখন তেমনি এ প্রথমটা ভীষণ জটিল হইয়া দাঁড়াইয়াছে। তখন ছিল কেবল এক ধর্মাবলম্বী খ্রীষ্ট যুরোপ লইয়া কথা, কিন্তু এখন নূতন মহাদেশ আমেরিকা আসিয়া জুটিয়াছে এবং সর্বাঙ্গের বিষয় সমস্যা হইয়াছে ভিন্নধর্মাবলম্বী ও আচার সভ্যতা দ্বারা

বিচ্ছিন্ন প্রাচ্যের সম্পর্ক লইয়া । অবশ্য যখন জাতি ধর্ম ও সভ্যতা ভিন্ন হইয়াও এবং সাত সমুদ্র তের নদীর পারে অবস্থিত হইয়াও বৃটিশ সাম্রাজ্যের অঙ্গগুলি মোটের উপর এমন সুন্দর মিলিয়া রহিয়াছে তখন আশা হয় আন্তর্জাতিক চিরন্তন শান্তিটা নেহাৎ স্বপ্ন নয় এবং সেই মিলন সেতুর কতকটা যেন এখনই বেশ দৃঢ়রূপে গড়িয়া উঠিয়াছে । বস্তুতঃ ইতিহাসের সাক্ষ্য লইলে মনে হয় যে এই জাতি সংঘের ধারণাটা ক্রমেই যেন স্ফুট হইতে স্ফুটতর হইয়া আসিতেছে, সভ্যতাবিকাশের মূল হইতেই যেন ইহার ক্রমাগত প্রয়াস চলিয়াছে ; এবং হয়ত অদূর ভবিষ্যতে ইহা বিশ্বকে রাগ্‌বিতণ্ডা ও যুদ্ধবিগ্রহের হাত হইতে ত্রাণ করিতে পারিবে । ইহাই যে সকল প্রয়াসের চরম পরিণতি এবং ইহার জগুই যে এই ভীষণ জীবনসংগ্রাম ও ক্ষুদ্রলাভের রাজ্যে মানবাত্মা থাকিয়া থাকিয়া কাঁদিয়া উঠিতেছে ।

আসল কথা চিরস্থায়ী শান্তির প্রস্তুতি বড়ই জটিল এবং সঙ্গে সঙ্গে এতগুলি পারিপার্শ্বিক অবস্থার দিকে লক্ষ্য রাখিয়া চলিতে হয় যে, এক এক সময়ে মনে হয়—সমগ্র জাতিটার শাসনোপায়ের উপক্রম হইয়া আসিয়াছে । তাই অনেকে ইহা আদৌ কার্যকরী হইবে কি না এ বিষয়েই সন্দেহ করেন । তাঁহারা বলেন মানুষের চিত্ত চাঞ্চল্যটা এত বেশী এবং অসদ্বৃত্তি ও স্বার্থপরতাটা এত প্রবল যে হয়ত কার্যকালে কোন কোন রাজ্য একটা সংঘ বা সমিতির হস্তে আপনাদের ভবিষ্যৎ স্বথ শান্তি অর্পণ করিয়া স্থির থাকিতে অস্বীকৃত হইতে পারে । অবশ্য উহার স্বার্থসাধনের জগু প্রথম প্রথম সর্ত্বাবদ্ধ থাকিতে সম্মতি দিবে সন্দেহ নাই ; কিন্তু প্রয়োজন হইলেই চুক্তিপত্রকে a mere scrap of paper বা একটা বাজে কাগজ বলিয়া অগ্রাহ্য করিতে পারে এবং তখনই যে কল্পনাসৌধটি গড়িয়া উঠিয়াছে বলিয়া আশা করা গিয়াছিল, তাহা সহসা সশব্দে ভূমিসাৎ হইয়া উহার আশ্রয়ে নিঃশব্দ শয্যায় সুষুপ্ত লোকগুলিকে একবারে মুক্তিকা-প্রোথিত করিয়া ফেলিবে । জগতে যখন এরূপ ব্যবহারের বহুসাক্ষ্য রহিয়াছে এবং এখনও যখন সেই দাঙ্কিত্যের ব্যত্যয় ঘটে নাই তখন এমন ধারণা কিছু ভ্রান্ত বলিয়া উড়াইয়া দেওয়া চলে না ; কারণ ইহা খুবই সত্য যে মানুষ যতদিন না অসৎ কামনার হস্ত হইতে মুক্তলাভ করিতে পারে, ততদিন সংসারে অমঙ্গল থাকিবেই স্বতরাং যুদ্ধও থাকিবে । এই যে যুরোপের বক্ষ মণ্ডিত করিয়া একটা মহাপ্রলয় বহিয়া গেল, কতজন কত অর্থ সেই মহাপ্রলয়ে ভাসিয়া গেল, এত করিয়াও যুরোপ আসিয়া দাঁড়াইল কোথায় ?

রাষ্ট্রে রাষ্ট্রে সংগ্রাম বাধিয়া, পুরাতন রাষ্ট্রসঙ্ঘ একেবারে ওলট-পালট হইয়া গেল ; প্রাচীন রাষ্ট্রশক্তি হতবল ও প্রনষ্টগৌরব হইয়া নিরাশার গভীর অন্ধকারের মাঝে আসিয়া পড়িয়াছে । কিন্তু মানুষের সব গিয়াও ত তাহার উচ্চাশা লোভ ও কামনা যায় না । রাজস্ব নাই, রাজশক্তি নাই, অথচ পরাজিত জাতির রাজ্যলোভ নষ্ট হয় নাই । দল বাধিয়া গোপনে গোপনে কত আয়োজন, কত ষড়যন্ত্র চলিতেছে । জাতিতে জাতিতে অসুখা ও বিদ্বেষ প্রধুমিত হইয়া অন্তরের মাঝে এক ধূমায়মান সমরবহি লুকাইয়া রাখিয়াছে, কেবল একটা সময়োপযোগী ফুৎকারের অপেক্ষা মাত্র । এইত গেল যুরোপের আন্তর্জাতিক অবস্থা । যুদ্ধ ত হইয়া চুকিয়াছে, কিন্তু পুনরাবির্ভাবের আশঙ্কা যায় নাই । যুদ্ধের সময় শোনা গিয়াছিল বটে সকলেই যুদ্ধের চিরবিরামসাধনের জগু অস্ত্র ধারণ করিয়াছিলেন এবং ইহাই নাকি সভ্যজাতির ইতিহাসে শেষ যুদ্ধ । হয়ত যুদ্ধের মাঝখানে সরলভাবেই এরূপ সঙ্কল্প করা হইয়াছিল, কারণ বিপদে পড়িলে মানুষ অশেষ প্রকার সাধু সঙ্কল্পই করিয়া থাকে ; কিন্তু আজ এ কল্পনা ত ছায়াবাজির মত লয় পাইতে বসিয়াছে, কেই বা গ্রাহ্য করে আর কেই বা আমল দেয় । যুদ্ধের আশঙ্কা ত শেষ হয়ই নাই, বরং বাড়িয়া চলিয়াছে, এইরূপই ত অনেকের ধারণা । অবশ্য সন্ধি-সংসদ বসিয়াছিল, তাহার কাজও হইয়াছে, সন্ধিও স্থাপিত হইয়াছে । কিন্তু সন্ধি আর শান্তি ত এক নয় । সন্ধি চায় যুদ্ধের সেই সময়কার মত বিরাম, আর শান্তির উদ্দেশ্য সমস্ত পারিপার্শ্বিক অবস্থার বিচার করিয়া যুদ্ধের আকাজ্জক পর্যাপ্ত নিবৃত্তি সাধন । এইরূপ শান্তি যুরোপে এখনও সুদূরপর্যন্ত । কারণ ইহাই যে যুরোপের বর্তমান অবস্থায় অনিবার্য । আমাদের শাস্ত্রে বলিয়াছে যে একমাত্র ত্যাগ ও প্রেমের দ্বারা শান্তিলাভ হয়, শান্তির অগ্রপথ নাই । যুরোপে সে ত্যাগের শক্তি কই ? এই জগুই ত শান্তির বৈঠক উঠিতে না উঠিতেই একটা ভাগাভাগি ব্যাপার চলিয়াছে, তবে ইহা লইয়া যে এখনও একটা যুদ্ধ বাধে নাই, তাহার কারণ প্রবৃত্তি থাকিলেও শক্তি কোথায় ? আশ্চর্য্যকরই যে সকলে এখন ব্যতিব্যস্ত । তাই ত দেখি League of Nations বা জাতিসংঘগঠনের সর্ত্বগুলির প্রথম খসড়া ও শেষ খসড়ার মধ্যে কত প্রভেদ—ধর্মের শাসন আর বন্ধুর উপদেশে যতটা ব্যবধান । এ যেন ঠিক অমৃত ভাণ্ডারের লোভ দেখাইয়া সাধারণ মিষ্টান্ন বিতরণের ব্যবস্থা ।

অবশ্য এই যুদ্ধের শিক্ষার ফলে যুরোপের জাতীয়জীবন ক্রমে ক্রমে নূতন

ভাবে গঠিয়া উঠিতে পারে; তবে অনেক সময় দুঃখের দিনের অর্জিত জ্ঞান সুখের দিনে মনে থাকে না। বিপদের সময় করুণাকাতর আঁখিই বিপদ কাটিয়া গেলে জ্রুটি করিতে ধ্বিধা করে না। আন্তর্জাতিক মিলন হয়ত স্বব্যবস্থার মধ্যে আসিতে পারে, কিন্তু মানুষের অন্তর গ্লানিদূর করা সর্বাগ্রে প্রয়োজন। কেবল বাহিরের ব্যবস্থায় স্থায়ী সফলের আশা একটা মস্ত ভ্রম। সমস্তরের প্রেরণাই ত বাহিরে ফুটিয়া উঠিবে। মানুষের প্রাণে যতদিন না মিলনের আকাঙ্ক্ষা তীব্র ভাবে ফুটিয়া উঠিবে, ততদিন শুধু কঠোর নিয়মের পেষণে তাহার স্বার্থবুদ্ধিকে নিস্তেজ করিয়া রাখিয়া শান্তি স্থাপনের চেষ্টা একেবারেই পণ্ডশ্রম। এই জগতই ধর্মশিক্ষা ও পরমার্থশিক্ষার প্রয়োজন। সাধারণ স্তরের মানুষকেও আধ্যাত্মিক জ্ঞানের উৎসে স্নাত করিয়া আসিতে হইবে। মানবদেহের ক্ষণভঙ্গুরতা ও পার্থিব ঐশ্বর্যের অস্থিরতা বুঝাইয়া দিতে হইবে। মানব জীবনে সুখই যখন আদর্শ তখন বুঝাইতে হইবে প্রকৃত সুখ কিম্বা ক্রামাত্মতা একেবারেই প্রশংসার যোগ্য নহে। সেই দুস্পূর্য্য কামনা ও প্রলয়-ক্ষরী হিংসা ত্যাগ করিয়া আর্ন্ত ও পীড়িতের দুঃখনিবারণের প্রয়াসে এবং জ্ঞান রাজ্যের নূতন নূতন বিজয়ের চেষ্টাতেই ত সুখ। ধর্মদেষণ দূর করা চাই, ভ্রাতৃত্বভাবের আলোক আসিলে এই ঘনাককার দূর হইবে ও সকলেই বুঝিবে যেমন সব মানুষ এক ঈশ্বরের সন্তান, সেই রকম সব ধর্ম এক বিশ্ব-ধর্ম হইতে উদ্ভূত। তখনই একটা সুন্দর ভ্রাতৃত্বপ্রেম জাগিয়া উঠিবে। সেই 'প্রেমের রাজ্যে সুন্দর কুৎসিত নাই, জাতিভেদ নাই। তার গৃহ প্রভাতের উজ্জল আকাশে। সে একটা স্বচ্ছ স্বতঃ উচ্ছসিত সৌন্দর্য্য। মৃত্যুর উপর বিজয়ী আত্মার মত, ব্রহ্মাণ্ডের বিবর্তনের উপর মহাকালের মত, সে সঙ্গীত অমর।" নীচ স্বার্থ, রুদ্রতা, ভ্রাতৃত্বদ্রোহিতা ও বিজাতিবিদ্বেষ দূর না হইলে চিরস্থায়ী শান্তিস্থাপনের সুখস্বপ্ন নিশ্চয়ই ফলিবে না। সত্য সত্যই তার ভিত্তি হইবে ভালবাসা। আপনার স্বার্থ ডুবাইয়া দিয়া ক্রমে ভাইকে, জাতিকে, মনুষ্যকে, মনুষ্যত্বকে ভালবাসিতে শিক্ষা করিতে হইবে। তখন জাতির ভবিষ্যৎ আপনাই গড়িয়া উঠিবে। জাতীয় উন্নতির পথ শোণিতের প্রবাহের মধ্য দিয়া হয় না, জাতীয় উন্নতির পথ ভ্রাতৃত্বভাবের মধ্য দিয়া, ভ্রাতৃত্বভাব নহে। কবি মিল্টনের অমর কথার প্রতিধ্বনি করিয়া বলিতে পারা যায় Who overcomes by force, hath overcome but half his foe— অর্থাৎ হৃদয়জয় শক্তি প্রয়োগে হয় না, ভাইএর মত ভালবাসিয়া আপনার করিতে পারিলেই

চরম জয়লাভ। ইহাই আন্তর্জাতিক শান্তি স্থাপনের সর্বপ্রথম ও সর্বপ্রধান উপায়। বঙ্গের প্রেমের ভিখারী চৈতন্য তাহা বুঝাইয়া গিয়াছেন, সাধক বিবেকানন্দ সর্বসম্বয়ের মন্ত্র ছড়াইয়া এই ভাবেরই উদ্বোধন করিতে চেষ্টা পাইয়াছিলেন; তাহাই জগতের আদর্শ না হইলে শান্তির কল্পনা স্বপ্নতুল্য রহিয়া যাইবে। জগাই মাধাইয়ের মত পরম চেষ্টাকেও যখন সংপথে আনিবার ইচ্ছা জাগিবে, তখনই পৃথিবীতে যুদ্ধের অবসান হইবে, তাহার পূর্বে নয়। যদি কখনও জগতের সকল লোকে বলদর্প ভুলিয়া বলিতে পারে—

ঘুচাতে চাস যদি রে এই হতাশাময় বর্তমান;  
বিশ্বময় জাগায়ে তোল ভায়ের প্রতি ভায়ের টান;  
ভুলিয়ে যা রে আত্মপর, পরকে নিয়ে আপন কর;  
বিশ্ব তোর নিজের ঘর—আবার তোরা মানুষ-হ'।

বাস্তবিক তখনই এই জটিল তত্ত্বের কত সহজ মীমাংসা পাওয়া যাইবে। অনেকে হয়ত বলিবেন যে, এইরূপ মিলন-মন্দির প্রতিষ্ঠা একটা Utopian idea বা মস্তিষ্কবিকার জনিত কল্পনা মাত্র, কিন্তু ইহাও তেমনি সত্য যে এ চেষ্টা সফল হওয়া চাইই। কারণ যুগ যুগান্তরের সভ্যতাকে এক নিষ্ঠুর পরাক্রম-সম্মত দান্তিকতার হস্তে সমর্পণ করিতে সকলেরই প্রাণ কাঁদিয়া উঠিবে এবং যখন চিরন্তন শান্তি স্থাপন করিতে পারিলে যাহা এতদিন কেবল স্বার্থসাধনে ও নরহত্যাব্যাপারে নিয়োজিত ছিল, মন কত শক্তি একত্র পুঞ্জীভূত হইয়া এক অভূতপূর্ব উচ্চাঙ্গের মানবসমাজ গড়িয়া তুলিতে পারে, তখন পরস্পরের প্রতি শ্রদ্ধা ও প্রীতি এবং পররাজ্যসম্বন্ধে নিঃস্বার্থভাবে উদ্বুদ্ধ করিতে সকলেই চেষ্টা করিবে সন্দেহ নাই। সেই নবভাবের উদ্বোধনের জন্ম এতকাল পরে সকলেই বলদর্পী পাশ্চাত্য ক্ষত্রশক্তিতে বীতশ্রদ্ধ হইয়া আসিবে এই পরমার্থচিন্তার পীঠস্থানে এই সংযম তিতিক্ষার তপোবনে—

যেথা একদিন বিরামবিহীন  
মহা ওঙ্কার ধ্বনি  
হৃদয়তন্ত্রে একের মন্ত্রে,  
উঠেছিল রণরণি।  
তপস্যা বলে একের অনলে  
বহুরে আছতি দিয়া



নারায়ণ ।

বিভেদ তুলিল জাগায়ে তুলিল  
একটি বিরাটু হিয়া ।  
সেই সাধনার সে আরাধনার  
যজ্ঞশালার খোলা আজি দ্বার  
হেথায় সবারে হবে মিলিবারে  
আনত শিরে—  
এই ভারতের মহামানবের-  
সাগর তীরে ।

পথ

( শ্রীশশাঙ্কমোহন চৌধুরী )

পরম প্রেমে ধরতে বুকে সইবি শত জালা ;  
বরণ ক'রে নিবি ছুখে প'রতে সুখমালা ।  
মলিন মুখে সাজবে ভাল পরের সুখে হাস ;  
মনের কথা বাজবে ভাল পেলে ব্যথার শ্বাস ।  
পুলক দিয়ে ভ'রতে হৃদি পাগল সাজে সাজ ;  
দৈত্যতরী নেগো বেয়ে শান্তি-সাগর-মাঝে ।  
ক্রবলোকের পথটা সে যে বিশ্বপদে লুটী ;  
অমৃতরে আনতে ধয়ে বিপদপানে ছুটি ।  
আধারখানির বক্ষ হতে ধরগো চেপে আলো ।  
সত্যজীবন সেথায় যেথা মৃত্যু দারুণ কালো ॥

## শরৎ সাহিত্যে মাতৃ ভাব ।\*

( শ্রীউমাচরণ চট্টোপাধ্যায় বি, এ )

প্রতিভাশালী ঔপন্যাসিক শ্রীযুক্ত শরৎচন্দ্র চট্টোপাধ্যায় মহাশয়ের গ্রন্থ সমূহ আলোচনা করিলে আমরা দেখিতে পাই যে, আর্টের যে সকল উপাদান থাকায় তাঁহার উপন্যাস এত চিত্তাকর্ষক হইয়াছে, তন্মধ্যে তাঁহার অসাধারণ সহানুভূতির আবেগই সর্বপ্রধান । এই সহানুভূতি আছে বলিয়াই, সমাজের শাসন ও বিধি নিষেধের জন্ত যে সকল প্রেম নিষ্ফল হইয়া করুণ কাহিনীর সৃষ্টি করিতেছে, তাহার বেদনা-সঙ্গীত শরৎচন্দ্র সাহিত্যের মন্দিরে যেরূপ গভীর ও স্পষ্টস্বরে গাহিয়াছেন, তেমন আর কোন ঔপন্যাসিক পারেন নাই । কিন্তু শরৎচন্দ্র, প্রেমের এই নিষ্ফলতা ও তাহার কারণ মাত্র প্রদর্শন করিয়াই ক্ষান্ত হন নাই ; বিবিধপ্রকারের বিভিন্ন সমাজের আদর্শ ও বিধি আমাদের সমক্ষে ধরিয়া তিনি আমাদের সামাজিক সমস্যার বিচার ও মীমাংসা করিয়াছেন । ইহা শরৎ বাবুর অসামান্য প্রতিভার অগ্রতম কীর্তি । কিন্তু এই সকল সামাজিক সমস্যা ছাড়া, তিনি তাঁহার অসাধারণ প্রীতি ও সহানুভূতির দ্বারা গৃহের সঙ্কীর্ণ গণ্ডীর মধ্যে যে সকল স্নেহ ও বাৎসল্য রমের চিত্র অঙ্কিত করিয়াছেন এবং ব্যক্তিগত বিশিষ্টতার জন্ত সেই স্নেহ-বাৎসল্য যে দুঃখ ও ত্যাগের উপাদান হইয়াছে, তাহা তিনি তাঁহার সুনিপুণ তুলিকায় এমন অদ্ভূত ধরণে বিকশিত করিয়াছেন, যাহা বঙ্গ সাহিত্যের অভিনব সম্পদ ও শরৎচন্দ্রের অক্ষুণ্ণ কীর্তি । বস্তুতঃ সাহিত্য ও সমাজ বিশেষ ঘনিষ্ঠভাবে সংশ্লিষ্ট এবং শরৎচন্দ্র যে সমস্ত সামাজিক সমস্যা আমাদের চোখের সামনে ধরিয়াছেন, তাহা ভাবিবার বিষয় এবং 'শ্রীকান্ত' প্রভৃতি গ্রন্থে আজকালকার মস্ত সমস্যা—Rights of Women—সম্বন্ধে তিনি যাহা বলিয়াছেন, তাহাও প্রণিধানযোগ্য । কিন্তু যেহেতু এগুলি সামাজিক ব্যাপার, ইহাতে মতভেদ অবশ্যজ্ঞাবী, সুতরাং শরৎচন্দ্রের সামাজিক উপন্যাসগুলির মূল্য এবং প্রভাব কতকটা দেশ ও কালের উপর নির্ভর করে । এবং সমাজের পরিবর্তনের সঙ্গে সঙ্গে উহাদেরও

\* কলিকাতা "নীতিশিক্ষা প্রদায়িনী সভা ও হৃদয় লাইব্রেরী" হইতে "স্বর্ণমণি পদক" পুরস্কার প্রাপ্ত ।

বর্তমান প্রভাবের পরিবর্তন হইবে। কিন্তু শরৎচন্দ্র বাৎসল্য রস ঢালিয়া 'রামের স্মৃতি' 'মেজদিদি' প্রভৃতি গল্পে যে মাতৃহৃদয়ের চিত্র আঁকিয়াছেন, তাহার মূল্য বা প্রভাব দেশ-কাল-পাত্রের উপর নির্ভর করে না, কারণ এই স্নেহ বাৎসল্য মানব হৃদয়ের চিরন্তন বৃত্তি এবং যেহেতু 'The same heart beats in every human breast, (Matthew Arnold), ইহাদের প্রভাব সর্বত্র, সকল সময় এবং সকল মানব হৃদয়েই সমান। এই জগুই তাঁহার 'মেজদিদি' প্রভৃতি গল্পের ভারতবর্ষের বাহিরে London Timesও এত প্রশংসা করিয়াছেন।

শরৎচন্দ্রের সাহিত্যে এই মাতৃভাব দেখানই বর্তমান প্রবন্ধের উদ্দেশ্য। বস্তুতঃ আজকালকার লেখকগণের অধিকাংশই দাম্পত্য ও স্বাধীন প্রেম লইয়াই ব্যস্ত; একমাত্র রবীন্দ্রনাথের 'ছুটি' গল্পছাড়া আমাদের সাহিত্যে বাৎসল্য-রসের নিদর্শনের নিতান্ত অভাব ছিল, শরৎচন্দ্র বঙ্গ সাহিত্যে, সেই বাৎসল্যরস প্রচুর পরিমাণে ঢালিয়া দিয়া অমৃতের স্রোত বহাইয়াছেন। শরৎচন্দ্রের 'বিন্দুর ছেলে' 'রামের স্মৃতি' 'মেজদিদি' 'নিষ্কৃতি' প্রভৃতি গল্পে এবং 'শ্রীকান্ত' 'অরক্ষণীয়া' 'পল্লীসমাজ' প্রভৃতি উপন্যাসে, তাঁহার এই অভিনব মাতৃভাব বিশেষভাবে বিকশিত হইয়াছে। কোন্ গল্পে ও উপন্যাসে কিরূপ ঘটনার ভিতর দিয়া এই মাতৃভাব ফুটিয়া উঠিয়াছে, নিম্নে আমরা তাহার সংক্ষিপ্ত পরিচয় দিলাম।

তাঁহার 'রামের স্মৃতি' 'বিন্দুর ছেলে', 'মামলার ফল' 'মেজদিদি' ও 'নিষ্কৃতি'তে আমরা দেখিতে পাই যে, পরের ছেলের প্রতি স্নেহপরায়ণা নারীর ভালবাসা, অভিমান ও পারিবারিক কলহের মধ্য দিয়া ব্যক্ত হইয়াছে।

#### ১। নারায়ণী—(রামের স্মৃতি)

'রামের স্মৃতি' গল্পের পাড়ার সেরা দুইছলে রাম, শ্যামলালের বৈমাত্র ভাই। শ্যামলালের স্ত্রী নারায়ণীর বয়স যখন ১৩ বৎসর, তখন রামের মা তাঁহার আড়াই বছরের পুত্র রামের ভার এই বালিকা বধূর হস্তে দিয়া পরলোকে গমন করেন। অল্প মেয়ে যে সময় পুতুল খেলা করে, সেই সময় হইতে পুতুলের পরিবর্তে নারায়ণী তাঁহার এই দেবরটিকে মামুষ করিয়া আসিতেছে। এই গল্পে শরৎচন্দ্র সন্তানতুল্য রামের প্রতি, মাতৃসমা বৌদিদির বাৎসল্য দেখাইয়াছেন।

অনেক দিন কাটিয়া গিয়াছে, নারায়ণীর একটা পুত্র হইয়াছে, তাহার নাম গোবিন্দ। রাম আমাদের এখন ১৬।১৭ বছরের হইয়াছে। কিন্তু রাম

বৌদিদির অসাধারণ স্নেহের মধ্যে থাকিয়া এখনও ছোটবেলাকার মতই আছে। এতবড় বয়সেও সে নিজের হাতে ভাত খাইবে না, বৌদিদি হাতে করিয়া না খাওয়াইয়া দিলে তাহার খাওয়া হইবে না। তজ্জন্ত পাড়ার লোকের নিকট নারায়ণীকে কত গল্পনা ও টিটকারী সহ করিতে হয়। তাছাড়া, রামের ছুটামীর জগুও তাহাকে কত কথা সহ করিতে হইত। নারায়ণী রামকে শাসনও করিত কিন্তু সে শাসন মায়েই মত - বৌদিদির একবারের শাস্তিতে যে টুকু কষ্ট হইত, তাহার শতগুণ আদর পাইয়া রাম সে শাস্তির কথা ভুলিয়া যাইত। স্নেহ-বিহ্বলা নারায়ণীর বড় দুঃখ এই যে—'পাড়ার লোকে কেবল আদবটাই দেখে, শাসনটা দেখে না।' কিন্তু এই মাতৃর শাসন কিরূপ, তাহা এই ঘটনা হইতেই বুঝা যাইবে। একদিন শস্য চুরী করার অপরাধে নারায়ণী রামকে একপায়ে দাঁড়ানর শাস্তি দিল, কিন্তু কিছুক্ষণ পরেই যখন দেখিল যে, রাম কোঁচার খুঁট দিয়া ঘন ঘন চোখ মুছিতেছে, তখন নারায়ণীর মাতৃহৃদয় কাঁদিয়া উঠিল, সে বলিল "আচ্ছা, যা, হয়েছে, এমন আর করিসনে।" কাজেই স্পষ্টবাদী নেতৃত্বালী বলিয়া উঠিল—"আর শাসনও ভারী! ছেলে এক মিনিট একপায়ে দাঁড়িয়ে কেঁদেছে ত পৃথিবী রসাতলে গেছে।" নারায়ণী-রামের এই স্নেহ ভালবাসার চিত্র আরও পরিস্ফুট হইয়াছে, যেদিন হইতে নারায়ণীর মা দিগম্বরী তাহাদের শাস্তির মধ্যে আসিয়া পা দিয়াছে। নারায়ণী রামকে কোনদিন পর ভাবে নাই, কিন্তু দিগম্বরী আসিয়া অবধি রামকে বিষ-নয়নে দেখিতে লাগিলেন; এবং নারায়ণী যেদিন মায়ে মূখে শুনিল "কেন, বাড়ী কি ওর (রামের) একলাকার।" সেইদিন নারায়ণী মায়ে বৃকের ভিতরট স্পষ্ট দেখিতে পাইয়া, বোধকরি, বড় ভয় খাইয়াছিল।

মাতৃসমা এই বৌদিদির প্রতি রামের ভালবাসা যে কত গভীর, তাহা শরৎচন্দ্র সামান্য দুই একটি ঘটনা দ্বারা অতি স্নন্দরভাবে দেখাইয়াছেন। দিগম্বরী ঠাকরণ যেদিন 'শকুনি-হাড়-গোড়ের' ভয়ে, রামের কত সাধের অশ্বখগাছটা উঠান হইতে তুলিয়া ভাঙ্গিয়া ফেলিয়া দিলেন, সেদিন রাম চীৎকার করিয়া রাগিয়া কাঁদিয়া উঠিল, কিন্তু অন্ত্রোপায় হইয়া নারায়ণী যখন তাহাকে বুঝাইল, "মঙ্গলবার দিন অশ্বখগাছ পুঁতলে বাড়ীর বড় বৌ ম'রে যায়" তখন রাম বৌদিদির গলা জড়াইয়া ধরিয়া বলিল, "কিন্তু ফেলে দিলে আর দোষ নেই—না, বৌদি?" আবার যেদিন রামের খাওয়া লইয়া মা ও মেয়েব মধ্যে খব বাগড়া হইয়া গেল, সেদিন নারায়ণী উপবাসী রহিল। রাম

নেতৃত্ব কাছ হইতে মুড়ী লইয়া বাহিরে গেল। কিন্তু সে মুড়ী তাহার মুখে উঠিল না, তাহার কতবার মনে হইতে লাগিল, বৌদি উপোষ করিয়া আছে— সে তখনই মুড়ি গুলি জলের উপর ছড়াইয়া ফেলিয়া দিল।

নারায়ণীর বাৎসল্যও কত গভীর, তাহা শরৎচন্দ্র একটা কথায় অতি সুন্দর ভাবে ফুটাইয়া তুলিয়াছেন। দিগম্বরীর ব্রাহ্মণ খাওয়াইবার দিন রাম যখন কিছুতেই তাহার কাষ্টিক গণেশ মাছ দুটির একটিকেও ধরিতে দিল না, তখন দিগম্বরী চিংকার করিয়া বলিয়া উঠিল,—“কবে ছোঁড়া মরবে যে, আমার হাড়ে বাতাস লাগবে—যেন তে রক্তির না পোহায়।” এই অভিশাপ কাণে যাইবা মাত্র নারায়ণী বিদ্যুৎবেগে দাঁড়াইয়া উঠিয়া বলিল, “মা”। যতই হউক দিগম্বরীও ত মা,—সন্তানের মুখে এই ‘মা’ কথাটা শুনিয়া দিগম্বরীর অন্তরাঙ্গা বোধ করি কাঁপিয়া উঠিয়াছিল। শরৎচন্দ্র সামান্য এই ‘মা’ কথাটির দ্বারা যে মনস্তত্ত্বের ইঙ্গিত করিয়াছেন, তাহাতে চরিত্রটা জীবন্ত হইয়া ফুটিয়া উঠিয়াছে এবং একটা সুদীর্ঘ বক্তৃতা দ্বারা বোধ হয় মনস্তত্ত্বের এমন সুন্দর ইঙ্গিত প্রকাশ করিতে পারা হইত না।

কিন্তু রামের ছোঁড়া কাঁচা পেয়ারাটা যে দিন দিগম্বরীকে না লাগিয়া নারায়ণীকে আঘাত করিল, সেই দিন শ্যামলাল দিব্যি দিয়া স্ত্রীকে বলিলেন—“যদি ওকে খেতে দাও, যদি কোন দিন কথা কও, যদি কোন কথায় থাক, সেই দিনে যেন তুমি আমার মাথা খাও।” এই বলিয়া তিনি সেই দিনই রামকে পৃথক করিয়া দিলেন। পরদিন রাম নিজের পৃথক রান্নাঘরে কাঁচাভাত রাখিয়া শুধুই তাহা খাইতেছে, একথা যখন নারায়ণীর কাণে পৌঁছিল, তখন তাহার মাতৃহৃদয়ে কান্না ঠেলিয়া বাহির হইবার জন্ত মাথা ঠুকিতেছিল, কিন্তু নারায়ণী কিছু করিলেন না, শুধু নিজে উপোস করিয়া রহিলেন। কিন্তু গুরুর পর দিন রাম রাখিলও না, খাইলও না, কারণ আজ দুইদিন তাহার বৌদিদি তাহাকে ডাকে নাই, তাহাকে বকে নাই। সারাদিন ভাবিতে লাগিল, পেয়ারাটার আঘাতে বৌদিদির কত না লাগিয়াছে। এই ভাবিয়া সে একটা কাঁচা পেয়ারা লইয়া নিজের কপালে একশ বার ঠুকিয়া ঠুকিয়া দেখিতে লাগিল, তাহাতে কতটা ব্যথা লাগিতে পারে। এমন অনিন্দ্যসুন্দর করুণচিত্র আর নাই বলিলেও বোধ হয় অত্যাঙ্গী হইবে না। অবশেষে সে মনে করিল, যদি কোথাও চলিয়া যাই, তাহলে হয়ত বৌদি সুখী হইতে পারেন, এই ভাবিয়া রাম স্থির করিল—তাহার অজানা অচেনা মামার বাড়ী চলিয়া যাইবে।

এ দিকে গোপনে কাঁদিয়া কাঁদিয়া নারায়ণীর অমর হইয়াছে। তিনদিন কাটিয়া গিয়াছে। নারায়ণী যখন শুনিল, কাল রাম রাঁধেও নাই, খায়ও নাই, তখন সে আর স্থির থাকিতে পারিল না; প্রাতে উঠিয়াই রান্না চড়াইয়া দিল। তারপর যখন রাম তাহার সেই অজানা অচেনা মামার বাড়ী যাইবার জন্ত বৌদিদিকে টাকা চাহিয়া পাঠাইল, তখন নারায়ণী ভোলাকে বলিল, “যা ভোলা শীগ্গির ডেকে আন।” রাম আসিলে নারায়ণী তাহার হাত ধরিয়া টানিয়া হইয়া সাজান ভাতের খালার নিকট বসাইল। কিন্তু কে-ই বা খাইবে, আর কে-ই বা খাওয়াইবে। রাম বৌদিদির কোলের মধ্যে মুখ লুকাইল, আর বৌদিদির অশ্রুপট্টিতে রামের মাথা পিঠ ভিজিয়া যাইতে লাগিল। তিনদিন পূর্বে তাহার স্বামী যে মাথার দিব্যি দিয়াছিলেন, একথা তাহার মনে ছিল, এই জন্তই সে তিনদিন নিজে খায় নাই, এবং রামকেও খাইতে দেন নাই, কিন্তু আর পারিল না; এবং তাহার মা যখন সেই খানটাতেই খোঁচা দিয়া বলিলেন, “যে এত বড় একটা দিব্যি দিলে, তার বুঝি হুকুমটাও একবার নিতে হবে না?” নারায়ণী এবার কঠিন হইয়া বলিয়া উঠিলেন, “তুমি কি জানবে মা, কার কাছে কখন আমি হুকুম পেয়েছি?...যাকে বুক ক’রে এতটুকু বড় ক’রে তুলতে হয়, সেই জানে হুকুম কোথা দিয়ে কেমন ক’রে আসে। এখন একটু সামনে থেকে সরে যাও, ছুটে খাইয়ে দিই। ও আমার তিন দিন অনাহারে আছে।” বলিতে বলিতে নারায়ণীর চোখের জল টপ্ টপ্ করিয়া পড়িতে লাগিল। আমরাও চোখের জলে আর পড়িতে পারি না,—চোখের জল মুছিয়া আবার যখন পড়ি, তখন দেখি,—নারায়ণী তাহার মাকে বলিতেছে, “তোমার খরচ পত্র আমি সমস্ত পাঠিয়ে দেব, কিন্তু এখানে তোমার আর থাকা হবে না।”, আর, রাম আন্তে আন্তে বলিতেছে, “না বৌদিদি, উনি থাকুন, আমি ভাল হ’য়েছি।”

এমন বাৎসল্য-রস-অভিধিক্ত গল্প বাঙ্গালা সাহিত্যে আর নাই। ইংরাজ কবি Grey যেমন একমাত্র Elegyর জন্তই অমর হইয়াছেন, তেমনি শরৎচন্দ্র যদি এই একটা মাত্র গল্প—রামের স্মৃতি—লিখিতেন, আর কিছুই না লিখিতেন, তাহা হইলেও তিনি বঙ্গ সাহিত্যে অমর হইয়া থাকিতেন। রায় সাহেব দীনেশচন্দ্র সেন বলেন,—“প্রচলিত রাশি রাশি ছোট গল্পের করুণরস ‘রামের স্মৃতি’ গল্পের তুলনায় সিন্ধুর নিকট বিন্দু। নারায়ণী যেদিন স্বামীর শপথ উপেক্ষা করিয়া রামের জন্ত রাখিতে বসিল, সেদিন তাহার মূর্তি, রাফেলের অমর তুলিকাখ আঁকা ম্যাডোনো মূর্তির ত্রায় আদর্শ মাতৃমূর্তি।”

২। বিন্দু, (বিন্দুর ছেলে)

বিন্দুর ছেলে গল্পটিতে শরৎবাবু, অমূল্যর প্রতি তাহার খুড়ীমার অপরিমিত স্নেহ ও এই স্নেহবিবশা খুড়ীমার অপরিসীম বেদনা, অভিমানের মধ্য দিয়া পরিব্যক্ত করিয়াছেন।

যাদব ও মাধব দুই জনে বৈমাত্র ভাই, কিন্তু থাকিতেন সহোদর ভাইএর মতই; এমনি তাঁদের মিল ছিল। যাদবের স্ত্রীর নাম অন্নপূর্ণা আর মাধবের স্ত্রীর নাম বিন্দুবাসিনী। বড় ভাই যাদবের একটা মাত্র পুত্র সন্তান ছিল; তাহার নাম অমূল্য। মাধবের কোন সন্তানই ছিল না। ছোটবউ বড় লোকের একমাত্র মেয়ে, স্ততরাং তিনি ছিলেন একটু অতিরিক্ত অভিমানিনী। বড় বউএর মাথার উপর সমস্ত সংসারের ভারটা থাকায় তিনি ছেলে মাহুষ করবার অবসর পাইতেন না। সে ভারটা ছোটবউ আসিয়া লইল; বিশেষতঃ একদিন ছোটবউএর ফিট হইবার সময় অমূল্যকে কোলে ফেলিয়ে দিয়া অন্নপূর্ণা দেখিলেন বিন্দু মুচ্চার কবল হইতে রক্ষা পাইল। সেইদিন হইতেই অমূল্য বিন্দুর কাছেই থাকিত এবং বড়বউ ও একদিন হাসিতে হাসিতে বিন্দুকে বলিয়াছিল, ‘অমূল্যকে তুই নে।’ সেই যে একদিন অন্নপূর্ণা বিন্দুকে বলিয়াছিলেন, ‘অমূল্যকে তুই নে’ তারই জোরে একদিন অমূল্যধনের দুধ জ্বালদিতে দেবী হওয়ায় সামান্য দুই একটা কথা কাটাকাটি হওয়ায় অভিমানিনী বিন্দু বড়বউকে দিব্যি দিয়া ফেলিল, “তোমার অতিবড় দিব্যি রহিল দিদি যদি কোনদিন আর অমূল্যর দুধে হাত দাও। আমারও দিব্যি রহিল, আর কোনদিন যদি তোমাকে বলি”। এই দিব্যি দেওয়া ব্যাপারটা হইতেই বুঝা যায় যে, বিন্দু অমূল্যকে কত ভালবাসিতেন; বিন্দুর বাৎসল্য কত গভীর। এইরূপে শুধু অমূল্যকে টিপ পরান আর কাজল দেওয়া নিয়ে বিন্দুর দিনগুলি কাটিতে লাগিল। ক্রমে যথা সময়ে অমূল্যধনের হাতে খড়ি দিয়া তাহাকে পাঠশালায় পাঠান হইল; সেদিন বিন্দু ছেলেকে এমন করিয়া সাজাইলেন যে দেখিয়া ছেলের মা অন্নপূর্ণা, পাচিকাকে বলিলেন, “ছেলে নিয়েই ব্যতিব্যস্ত, তবু পেটে ধরেনি—তাহ’লে নাজানি ও কি করত।” ছেলেকে চোখের অন্তরাল করিয়াই বিন্দুর মনে হইল, বাড়ীতে পাঠশালাটা উঠাইয়া আনিলে হয় না! ‘যদি কেউ ওর চোখে কলমের খোঁচাই দিয়ে দেয় তাহ’লে?’ অন্নপূর্ণা সাতদিন সাতরাত বসে ভাবিলেও, এই খোঁচাখুঁচির কথা মনে করিতে পারিত না কিন্তু বিন্দুর তৎক্ষণাৎ তাহা মনে হইল, এমনই স্নেহময়ী বিন্দু। এই

রূপে ‘ঐ কাল ভূতের মত ছেগেটাকে’ লইয়া বিন্দুর দিন গুলি কাটিতে লাগিল। ক্রমে বিন্দু একেবারে ভুলিয়া গেল যে অমূল্য তাহার পেটের ছেলে নয়। এধারে ফল এই হইল যে অমূল্য তাহার মা, অন্নপূর্ণাকে ‘দিদি’, আর বিন্দুকে ‘মা’ বলিতে লাগিল। কিন্তু বিন্দু স্নেহান্বিত ছিলেন না, অতিরিক্ত আদরে ছেলেটাকে মাটা করা তাঁহার ইচ্ছা ছিল না। ‘ছেলেকে দশের একজন ক’রে তুলতে হ’লে যে রকম চোখে চোখে রাখতে হয় সেই রকমই করিতেন এবং ‘ছেলে বড় হবে দশের একজন হবে’ ঐ একটা আশা নিয়েই তিনি বেঁচেছিলেন। তাই একদিন বলিয়াছিলেন “না, দিদি ও আশায় যদি কোন দিন ঘা পড়ে, তবে আমি পাগল হ’য়ে যাব।” তাই যেদিন তাঁহার ঠাকুরঝি তাঁহার ‘চণ্ডা-পাড়ের-কাপড় ফেরা দিয়ে পরা, ‘দেখিবার মত টেরি ওয়ান্দা’ পুত্র নরেনকে লইয়া এই গৃহস্থের মধ্যে আসিলেন, সেইদিন বিন্দুর মাতৃহৃদয়ে বড় ভয় হইয়াছিল। পাছে এই ‘খিয়েটারে আঁকট করা’ নরেনের সঙ্গে মিশিয়া তাহার অমূল্য খারাপ হইয়া যায়! তাই তিনি সর্বদা অমূল্যকে আরও শাসনে রাখিতেন; এবং এই শাসন হইতে কেহ অমূল্যকে রেহাই দিবার চেষ্টা করিলে, তিনি তাহা সহ্য করিতে পারিতেন না। তাই যে দিন আমপাড়ার অপরাধে স্কুলে অমূল্যর জরিমানা হইয়াছিল, এবং বিন্দুর ক্রোধ হইতে বাঁচাইবার জন্ত অন্নপূর্ণা ছেলেকে লুকাইয়া টাকা দিয়াছিলেন, সেইদিন অন্নপূর্ণা অমূল্যর জন্ত মাপ চাহিলে, অভিমানে ও ক্রোধে বিন্দু বলিয়া উঠিল, “আজ থেকে চিরকালের জন্তই মাপ করলুম, আর বলব না।” এই রূপে দুই একটা কথা হইতে হইতে বিন্দু অভিমানে ও ক্রোধে অন্ধ হইয়া তাহার মাতৃসমা দিদিকে বলিয়া ফেলিয়াছিল, “তুমি নষ্ট কর কার টাকা শুনি?” এই কথাটার পরিণাম এই হইল যে, দুই বাঁএর মধ্যে এমনি পাকা পাকি বাগড়া হইয়া গেল যে বিন্দুর মূতন বাড়ীতে গৃহদেবতার পূজার দিন অন্নপূর্ণা নিজেও গেলেন না এবং তাঁহার স্বামী ও পুত্রকেও ঘাইতে দিলেন না। স্নেহময়ী বিন্দু অভিমানে যাহাই বলুক না কেন, তাঁহারা না আসায় তাঁহার মন গুমরাইয়া গুমরাইয়া কাঁদিতোছিল; কোন কাজেই তিনি মন দিতেছেন না দেখিয়া, মাধব গিয়া অন্নপূর্ণাকে ডাকিয়া আনিলেন। বিন্দু তাঁহাকে দেখিয়া অভিমানে কাঁদিয়া ফেলিলেন। কিন্তু অমূল্যকে ডাকিতে গেলেও সে আসিল না। অনেক রাত্রে যখন অন্নপূর্ণা বাড়ী ফিরিতে উত্তত হইলেন, তিনি জলস্পর্শ করেন নাই শুনিয়া বিন্দু অভিমানে যা মুখে আসিল তাহাই বলিয়া এবং ভগবানের উপর

বিচারের ভার দিয়া, 'মুখে আঁচল গুঁজিয়া' কান্না রোধ করিয়া রান্নাঘরের বারান্দায় আসিয়াই উপুড় হইয়া মুচ্ছিত হইয়া পড়িলেন। পরদিনও বিন্দুর অভিমান যায় নাই; কখনও সে অন্নপূর্ণাকে উদ্দেশ্য করিয়া বলিতেছিল, "ঐ একটা বংশধর—তার নাম ক'রে দিব্যি?" এছাড়া তাঁহার রাখিবার জায়গা ছিল না, কিন্তু দিদি জলস্পর্শ করেন নাই তাহাতেও তাহার কম দুঃখ হয় নাই; তাই তিনি পাচিকাকে বলিলেন "রাগের মাথায় কে দিব্যি না করে, মেয়ে! তাই ব'লে জল স্পর্শ করলে না।"

অমূল্য এই কয়দিন বিন্দুর নতুন বাড়ীতে না আসিলেও সে বাড়ীর পাশ দিয়াই স্থলে যাইত এবং বিন্দু 'লালছাতার আড়ালে' তাহার পরিচিত সেই চলনটা লক্ষ্য করিয়া তাহার মাতৃস্বের ক্ষুধা কতকটা মিটাইত। কিন্তু দুই দিন সেই ছাতাটা আর সেই চলন দেখিতে না পাইয়া বিন্দু নরেনকে ডাকিয়া তাহার কারণ জিজ্ঞাসা করিল। নরেন বলিল, "টিফিনের সময় সে ছুটো ছোলা ভাজা নিয়ে যায়, আর আমার খাবার দেখে ছুটে এসে বলে, 'কি খাবার দেখি নরেন দা।'—তাই ও ঐ রকম করে নজর দেয় ব'লে মা মাষ্টারকে ব'লে দিয়ে ওর কান ম'লে দিয়েছে।" কথা কয়টা শুনিয়া বিন্দুর হৃদয় চুরমার হইয়া গেল; তাহার ছেলে অমূল্য টিফিনের সময় দু'টা ছোলা ভাজা ভিন্ন আর কিছু খাইতে পায় না। বিন্দু দুই দিন প্রায় উপবাস করিয়া রহিল, তারপর বাপের পীড়িত সংবাদে বাপের বাড়ী বলিয়া গেল।

আজ একমাস তাহার ছেলেকে বিন্দু দেখে নাই। কতদিন হইতেই যে বিন্দু অনাহারে নিজেই ক্ষয় করিয়া আনিতে ছিল, তাহা কেহই জানিতে পারে নাই। বাপের বাড়ী আসার পর বিন্দুর জ্বর ক্রমশঃ এত বেশী ও মুচ্ছা এত ঘন ঘন হইতে লাগিল যে, তাহার আশা প্রায় ছাড়িয়া দিতেই হইয়াছিল। এমনি অবস্থায়—একদিন বিন্দু চোখের জল ফেলিতে ফেলিতে তাহার স্বামীকে বলিল, "আমার সমস্ত অমূল্যের। শুধু হাজার দুই টাকা নরেনকে দিও, আর তাকে পড়িও, সে আমার অমূল্যকে ভালবাসে।"

কি অপরিণীম মাতৃস্নেহ! আজ অমূল্যর জন্ম বিন্দুর হৃদয় গুমরাইয়া গুমরাইয়া কাঁদিয়া উঠিতেছিল—তাহার অমূল্যকে নরেন ভালবাসে—তাই বিন্দু নরেনকে টাকা দিতে ও পড়াইতে বলিল। কি অনির্কচনীয়া স্নেহের চিত্র! ক্রমে মাধবের মুখে ঐ কথা যাদব শুনিলেন; তৎক্ষণাৎ যাদব, অন্নপূর্ণা ও অমূল্য আসিয়া বিন্দুর বাপের বাড়ীতে উপস্থিত হইলেন। বিন্দুর আর

মরা হইল না। তাহার ছেলে আসিয়াছে, তাহার অমূল্য আসিয়াছে, সে কি আর মরিতে পারে? তাই বিন্দু বলিল, "দাও, দিদি, কি খেতে দেবে। আর অমূল্যকে আমার কাছে শুইয়ে দিয়ে তোমরা সবাই বাইরে গিয়ে বিশ্রাম করগে, আর ভয় নাই—আমি মরব না।"

কি সুন্দর মাতৃমুষ্টি এই বিন্দু! কয়জন মা এই খুড়ীমার অপেক্ষা স্নেহশীলা হইতে পারেন! শরৎচন্দ্র এই চিত্রটা জীবন্ত করিয়াছেন, বিন্দুর গুণে দোষ মিশাইয়া। বিন্দু রক্তমাংসের জীব, তাহাতে গুণ আছে দোষও আছে। বিন্দুর অপরিণীম স্নেহ আছে, কিন্তু তাহার অতিমাত্রায় অভিমানও আছে। শরৎচন্দ্র চিত্রগুলি এইরূপভাবে জীবন্ত করিয়াছেন বলিয়াই, আমাদের মনে হয় যেন তাঁহার সৃষ্ট মাহুষগুলি আমাদের সঙ্গে কথা কহিতেছে, মনে হয় সত্যই যেন বিন্দু আমাদের সামনে দাঁড়াইয়া বলিতেছে, "না ঠাকুরাণ, আমি মাথায় কাপড় রাখতে পারিনে, ছেলে বড় হয়েছে, মাথায় খোঁপা বাঁধলে দেখতে পাবে।" এই একটা কথায় শরৎচন্দ্র বিন্দুর মাতৃস্নেহ আরও ফুটাইয়া তুলিয়াছেন।

### ৩। হেমাঙ্গিনী (মেজদিদি)

মেজদিদি নামক গল্পে শরৎচন্দ্র, পরের ছেলে যাহাকে বলে, সেই রকম পর কেউর প্রতি 'মেজদিদি' হেমাঙ্গিনীর অনির্কচনীয়া মাতৃস্নেহ দেখাইয়াছেন।

যখন কেউর মা মারা গেল, তখন জগতে আর কেহ নাই দেখিয়া, কেউ আসিয়া তাহার বৈমাত্র বড়বোন কাদম্বিনীর বাড়ীতে উপস্থিত হইল। কেউ আসিয়া কিরূপ আদর পাইল, তাহা কাদম্বিনী যখন তাহার স্বামীর কাছে কেউর পরিচয় দিতেছে তখনই সেই কথাগুলি হইতেই জানিতে পারা যায়। কাদম্বিনী স্বামীকে বলিতেছে, "তোমার বড় কুটুম গো, বড় কুটুম! নাও, খাওয়াও পরাও, মাহুষ কর, পরকালের কাজ হোক।" কাদম্বিনীর বাড়ী আসিয়া অবধি কেউ তিরস্কার ও অপমানের অবিশ্রান্ত আঘাত খাইতে লাগিল। কেউ তাহার দুঃখী মায়ের নিকট আর কিছু না পাইলেও, পেট ভরিয়া ভাত খাইতে পাইত। কিন্তু কাদম্বিনী দিদির বাড়ীতে সে যখন খিদের জালায় কিছু বেশী ভাত খাইয়া ফেলিল, তখন কাদম্বিনী উচ্ছ্বাস করিয়া কহিল, তবেই হয়েছে! এ হাতীর খোরাক নিত্য যোগাতে গেলে যে আমাদের আড়ত খালি হয়ে যাবে।" এই কথায় কেউর বুকে অপমানের যে তীব্র শেল বিধিয়াছিল, তাহা এক অন্তর্ধামী ভগবানই জানেন। কিন্তু 'মেজদিদি' হেমাঙ্গিনীর সহিত প্রথম সাক্ষাতেই কেউ যখন তাঁহাকে প্রণাম করিল, তখনই কেউ হেমাঙ্গিনীর

আদরের আশ্বাদ পাইল; হেমাঙ্গিনী কেষ্ঠর চিবুক স্পর্শ করিয়া আশীর্বাদ করিল, “থাক, থাক, হয়েছে ভাই, চিরজীবি হও।” কেষ্ঠ মুঢ়ের মত তাঁহার মুখের পানে চাহিয়া রহিল; এদেশে এমন করিয়া যে কেহ কথা বলিতে পারে ইহা যেন তাহার মাথায় ঢুকিল না। পরদিন হেমাঙ্গিনী যখন কেষ্ঠকে নিমন্ত্রণ করিয়া লুচি, রুই মাছের মুড়োর তরকারী, সন্দেশ, রসগোল্লা খাওয়াইল সেইদিন কেষ্ঠ বুঝিল, যে তাহার মায়ের মতনই স্নেহ সে আর একজন পরের কাছে পাইল ও পাইবে। হেমাঙ্গিনী তাহার কে? তাহার বৈমাত্ৰভগ্নীর যা বই ত নয়! তাই, “আজ থেকে আমাকে তোর সেই মরা-মা মনে করবি— একথা হেমাঙ্গিনী কেষ্ঠকে বলিবার পূর্ব হইতেই, কেষ্ঠ হেমাঙ্গিনীকে মা বলিয়াই জানিয়াছিল। তাই খিদের সময় কেষ্ঠ হেমাঙ্গিনীর কাছে খাইতে চাহিয়াছিল, তাই সে বলিতে পারিয়াছিল—“কাল কিছু খাইনি মেজদি— কেষ্ঠ তাহার মেজদিদিকে কত গভীরভাবে ভাল বাসিত, তাহা তাহার সেই পেয়ারা আনা হইতেই বুঝা যায়। একদিন হেমাঙ্গিনীর সর্দিজ্বর হইয়াছিল, এই সংবাদ পাইয়া কেষ্ঠ নিজের বুদ্ধির সাহায্যে সমস্ত ছুপুরটা ঘুরিয়া ঘুরিয়া তাহার মেজদিদিকে গোটাছুই কাঁচা পেয়ারা আনিয়া দিল। কেষ্ঠকে কেহই বলে নাই যে, হেমাঙ্গিনী পেয়ারা খাইতে চাহিয়াছে, তবুও মেজদিদের জ্বর হইয়াছে শুনিয়াই কেষ্ঠ এই অসময়ে কাঁচা পেয়ারা আনিয়া দিল, এই চিত্তের চমৎকারিত্ব বলিয়া বুঝানো যায় না। কিন্তু এধারে কেষ্ঠের জন্ম মেজবউএর কোন দরদ কোন যত্ন কাদম্বিনীর বরদাস্ত হইল না, কাজেই কাদম্বিনী এই লইয়া হেমাঙ্গিনীর সঙ্গে ঝগড়া আরম্ভ করিয়া দিলেন। হেমাঙ্গিনী সে ঝগড়া গায়ে পাতিয়া লইল না, দেখিয়া কাদম্বিনী মেজবউকে ছাড়িয়া দেবরটাকে পর্যন্ত বাক্যবাণ ছুড়িতে লাগিলেন। ক্রমে দিন পাচ ছয় পরে একদিন বৈকালে হেমাঙ্গিনীর স্বামী বিপিন বিরত হইয়া বলিল, “কেষ্ঠ তোমার কে, যে একটা পরের ছেলে নিয়ে দিন-রাত আপনা আপনির মধ্যে লড়াই করে বেড়াচ্ছ। আজ দেখলুম, দাদা পর্যন্ত ভারী রাগ করেছেন।” স্বামী স্ত্রীর এইরূপ বিবাদ হইবার পরই কেষ্ঠ আসিয়া উপস্থিত হইল। আজ হেমাঙ্গিনী কেষ্ঠকে বলিয়া উঠিলেন, “এখানে কি? কেন তুই রোজ রোজ আসিস বলত?” ভয়ে বিষয়ে কেষ্ঠ বলিল, “দেখতে এসেছি।” এই কথায় বিপিন হাসিয়া উঠিল; স্বামীর হাসিতে বিরক্ত হইয়া হেমাঙ্গিনী আজ কেষ্ঠকে বলিল, “আর এখানে তুই আসিসনে, যা।”

কিন্তু কেষ্ঠ কি না আসিয়া থাকিতে পারে? হেমাঙ্গিনীর আবার দিন পাচ ছয় হইতে জ্বর হইয়াছে, সে জ্বর ছাড়ে নাই; শুনিয়া সন্ধ্যার সময় কেষ্ঠ তাহার মেজদিদিকে দেখিতে আসিয়াছিল কিন্তু তাহাকে আসিতে মেজদিদি নিষেধ করিয়া দিয়াছিল বলিয়া সে ভিতরে ঢুকিতে সাহস করে নাই। এমন সময় হেমাঙ্গিনীর পুত্র ললিত আসিয়া বলিল, “মা কেষ্ঠ মামাকে একবার আসতে দেবে? ঘরে ঢুকবে না—ঐ দোর গোড়া থেকে একটাবার তোমাকে দেখেই চলে যাবে।” এই প্রাণের টান দেখিয়া কি চোখের জল সম্বরণ করা যায়? হেমাঙ্গিনী তৎক্ষণাৎ তাহাকে ডাকিয়া পাঠাইল; সে আসিয়া কাঁদিতে লাগিল। মেজদিদি জিজ্ঞাসা করিল, “কান্না কেন?” কেষ্ঠ বলিল, “ডাক্তার বলে যে, বুকে সর্দি বসেছে।” সেই দিন যাইবার সময় কেষ্ঠ বলিয়া গেল, “আমাদের গায়ে বিশালাক্ষী ঠাকুর বড় জাগ্রত মেজদি, পূজা দিলে সব অসুখ বিষুথ সেরে যায়।—একটা টাকা দিয়ে পাঠিয়ে দাও না মেজদি।” মেজদিদি বলিলেন “হ্যারে কেষ্ঠ আমি তোর কেউ নই, তবে আমার জন্তে তোর এত মাথা ব্যাথা কেন?” এ প্রশ্নের উত্তর কেষ্ঠ কোথায় পাইবে? সে কি করিয়া বুঝিবে, যে, তাহার পীড়িত আর্ন্তহৃদয় দিব্যাত্মি কাঁদিয়া তাহার মাকে খুঁজিয়া বেড়াইতেছে।

পরদিন উমা আসিয়া হেমাঙ্গিনীকে খবর দিল, কা'ল তাগাদা না গিয়ে কেষ্ঠ হেমাঙ্গিনীর কাছে বসিয়াছিল বলিয়া, তাহার মার হ'য়েছিল—এমন মা'র যে নাক দিয়ে রক্ত পড়ে গিয়েছিল। কিন্তু মার খাইয়াও কেষ্ঠ তাহার মেজদিদিকে আবার দেখিতে আসিয়াছিল, সেই দিন মেজদিদি মুখে বলিলেন, “তুর হ বলছি।” কিন্তু ভিতরে, তিনি তাহাকে বুকের আরও কাছে টানিয়া আনিবার জন্ম চঞ্চল হইয়া পড়িলেন। রাত্রিতে স্বামীকে বলিলেন, “কোনদিন ও তোমার কাছে কিছু চাইনি আজ এই অসুখের উপর একটা ভিক্ষা চাইছি দেবে?” স্বামী জিজ্ঞাসা করিলেন, “কি চাই!” হেমাঙ্গিনী উত্তর করিল, “কেষ্ঠকে আমাকে দাও।” স্বামীর কিছুতেই মত হইল না, অবশেষে হেমাঙ্গিনীর অভিমান-ক্ষুব্ধ অনেক কথার পর বলিলেন, “আচ্ছা, সে দেখা যাবে।” কিন্তু তারপর এমন একটা ঘটনা ঘটিল, যে, হেমাঙ্গিনী আর স্থির থাকিতে পারিলেন না। কেষ্ঠ কোথায় তাগাদা করিতে গিয়া তিনটা টাকা পাইয়াছিল; সেই টাকা তিনটা দিয়া মেজদিদের অসুখের জন্ম কোন ঠাকুররের পূজা দিয়া একটা ঠোঙা করিয়া নির্মাল্য ও সন্দেশ প্রসাদ মেজদিদি'র জন্ম আনিয়াছে। ইহাতে

বড় বউ এমন কি বড় কর্তা পর্যন্ত হেমাঙ্গিনীকে অপমান করিতে ছাড়িলেন না, তাঁহারা বলিলেন, হেমাঙ্গিনীই কেষ্টকে চুরী করিতে শিখাইয়াছে। শুধু তাহাই নহে, তারপর বড়কর্তা কেষ্টকে এমন নির্দয় ভাবে মারিলেন যে, বোধহয়, মানুষ মানুষকে তেমন ভাবে মারিতে পারে না। সেই দিন সবে হেমাঙ্গিনীর পথ্য করিবার কথা; কিন্তু পাতের ভাত পাতেরই শুকাইতে লাগিল। রাত্রিতে আজ আবার জ্বর আসিল, হেমাঙ্গিনী জ্বরে অজ্ঞান হইয়া পড়িয়া রহিল। রাত্রিতে সে স্বামীকে বলিল, “কেষ্টকে আশ্রয় দাও, নইলে এ জ্বর আমার সারবে না। মা হুর্গা আমাকে কিছুতে মাপ করবেন না।—দেবে?” বিপিন সজল চক্ষু হাত দিয়া মুছাইয়া বলিলেন, “তুমি যা, চাও, তাই হবে; তুমি ভাল হ'য়ে ওঠ।” কিন্তু হেমাঙ্গিনী ভাল হইয়া উঠিলেও যখন বিপিন কেষ্টকে আনিতে দিলেন না, তখন হেমাঙ্গিনী বলিয়া উঠিল, “আমার দুটি সন্তান ছিল, কাল থেকে তিনটি হ'য়েছে। আমি কেষ্টের মা।” এই বলিয়া ‘কেষ্টের মা’ হেমাঙ্গিনী বাপের বাড়ী বাইবার জন্ত গাড়ী ডাকতে পাঠাইয়া, ছেঁড়া মাতুরে, গায়ের ব্যথার জ্বরে যেখানে কেষ্ট পড়িয়াছিল, সেই খানে গিয়া বলিল, “কেষ্ট, আয় আমার সঙ্গে, আমাকে বাপের বাড়ী আজ তোকে পৌঁছে দিতে হবে যে।” এই বলিয়া কেষ্টকে লইয়া তিনি গাড়ী চড়িয়া বসিলেন। যখন গাড়ী কিছুদূর চলিয়া গিয়াছে, তখন বিপিন ছুটিয়া আসিয়া জিজ্ঞাসা করিল, “কোথায় যাবে, মেজবৌ?” “এ দের গ্রামে।” “কবে ফিরবে?” হেমাঙ্গিনী কেষ্টকে দেখাইয়া বলিল, “কখনও এর আশ্রয় জ্বোটে, তবেই ত একা ফিরে আসতে পারব, না হয়, একে নিয়েই থাকতে হবে।” হেমাঙ্গিনীর এই মাতৃমূর্তি, তাহার এ মুখের ভাব দেখিয়া বিস্ময়ে বিপিনের কণ্ঠস্বর নম্র হইয়া আসিল, তিনি বলিলেন, “মাপ কর, মেজবৌ, বাড়ী চল।” মেজবৌ যখন বলিলেন, “কাজ না সেরে কিছুতেই বাড়ী ভিরতে পারবো না।” তখন, বিপিন কেষ্টের ডানহাত ধরিয়া বলিলেন, “কেষ্ট, তোর মেজদিদিকে তুই বাড়ীতে ফিরিয়ে নিয়ে আয় ভাই, আমি শপথ করছি, আমি বেঁচে থাকতে তোদের দুই ভাই-বোনকে আজ থেকে কেউ পৃথক করতে পারবে না।”

এই গল্পে শরৎচন্দ্র দেখাইয়াছেন, প্রেমের ক্ষেত্র কত অসীম। প্রকৃত প্রেম ও স্নেহ কোন সঙ্কীর্ণ গুণীর মধ্যে আবদ্ধ থাকে না। স্বামীর চেয়েও যে কেহ বেশী আত্মীয় হইতে পারে, এই গল্পে শরৎচন্দ্র সেই তত্ত্বই দেখাইয়াছেন।

স্নেহ স্বপ্ন দুয়ার ঠেলিয়া বহির হইতে চায়, তখন কিছুতেই তাহার পথ রোধ করিতে পারে না।  
(ক্রমশঃ)

## আবির্ভাব ।

(শ্রীসাবিত্রীপ্রসন্ন চট্টোপাধ্যায়)

হুর্গম বন-কান্তার ছেদি' হুস্তর পথ হেলায় উত্তরিয়া  
চক্রনেমির ঘর্ঘর রবে জগন্নাথের রথ এল বাহিরিয়া  
অন্ধকারের যবনিকা ভেদি ছুটায় রুদ্ধ আলোর উৎস রাশি।  
তরুণ অরুণ কিরণ প্রপাতে দিখলয়ের জ্যোতি উঠে পরকাশি!  
পার্শ্বসারথি ধরেছে বলা তর্জণী তুলি পথ নির্দেশ করে'  
অশ্বযুথের বিদ্যুৎ-বেগ, হেয়ার উঠিল গগন পবন ভরে;  
আর্ন্তের তরে একি আহ্বান সঞ্চরি' উঠে প্রলয় অন্ধকারে  
চঞ্চল আজি দুর্কল প্রাণ, অর্গল কাঁপে নিষেধের কারাগারে;  
বিশ্বের মহারাজ

নিখিল মরণ শকা হরণ অত্য দানিছে আজ।  
আজিকে শুভ শঙ্খ নিনাদে আহ্বান কার ভবনে ভূভনে রটে?  
এস বিশ্বের কল্যাণী নারী পূর্ণ করগো সব মঙ্গল ঘটে!  
সিন্দুর লেপ, দাওগো এলোনা, আশ্রশাথায় শুভের সূচনা কর  
পূর্ণ কলসে শান্তির জল আপন কক্ষে আজি আনন্দে ধর!  
এস হে মানব যজ্ঞশালায় হবিকাঠ দিয়ে জ্বালো জ্বালো হুতাশন,  
বিশ্বের হিত সাধনার ব্রত অগ্নিমস্ত্রে কর আজ সমাপন!  
মানুষ হইয়া মানুষের প্রতি কেমনে সহিবে এই হীন অপমান  
দেখ চেয়ে দেখ আলয়ে তোমার নহে নিদ্রিত, জাগ্রত ভগবান!

জ্যেগেছেন দয়াময়

নাহিক বিবাদ, নাহি অবসাদ নাহি নাহি আর ভয়!  
জগন্নাথের রথ চলে যায়, সেকি কম্পন ত্রস্ত ধরনী বুকে  
অজ্ঞেয় পথে থমকি স্বর্ঘ্য তূর্য্যানিনাদ শোনে সারথীর মুখে,

পবন আজিকে স্তম্ভ নিশানে পথ ছাড়ি' ভয়ে দূরে করে পলায়ন  
 রথ ঘর্ঘরে প্রতি ঘরে ঘরে চিরনিজিত মেলিতেছে দুঃখন !  
 অলস আজিকে ত্যজিছে শয্যা, অসাড় আজিকে দিয়ে ওঠে দেহ নাড়া  
 অন্ধ আজিকে দেখে চোখ মেলে, বধীর আজিকে আস্থানে দেয় সাড়  
 ওরে হতমান পীড়িত অধম বৃকে বল করি দাঁড়া দেখি পুরোভাগে  
 ওরে প্রাণহীন চিরদিনহীন দেখ দেখ বৃষি ভগবান বৃকে জাগে !

এসেছেন ব্যথাহারী

বৃকের পাষণ দূরে ছুড়ে ফেল বিশ্বের নরনারী !  
 নাহি কাম্বুক ভয়াল ভীষণ, তীক্ষ্ণ শাণিত যোদ্ধার তরবারী  
 নাহিক চক্র অমোঘ অস্ত্র, জেগেছেন আজ সকল বেদনাহারী,  
 বর্ষে বর্ষে নাহি সংঘাত, নিষ্ঠুরাঘাতে শস্ত্রের ঝনঝনি  
 পাঞ্চজন্তু যুদ্ধ ঘোষণা হবে না হবে না, অগ্নিশায়ক উঠিবে না রনরনি !  
 আজিকে হইবে পাশব দলন দীপ্ত অঁথির বক্র চাহনি দিয়া  
 এক অঙ্গুলি হেলনে ত্রস্ত নিশ্চয় হবে নির্ভয় পাপ হিয়া !  
 অত্যাচারের খড়্গা ধসিবে, অবিচারী রাজদণ্ড কাঁপিবে হাতে  
 ঞ্চার মুকুট মুকুতাবিহীন দীনতার লাজে মলিন হইবে মাথে ;

আজিকে শক্তিময়,

নিরাশার ঘোর অঁধার মাঝারে দিতেছেন বরাভয় !  
 মানব-মানস কুরুক্ষেত্রে শক্রমিত্রে হবে আজি মহারণ  
 সকল-স্বার্থে বিশ্ববাহিনী করিয়াছে আজ অটল মৃত্যুপণ ;  
 আজিকে পার্থ-স্বার্থের তরে আসে নাই রথে পার্থ-সারথি হরি  
 নিখিলের সব সম্পদ ভাগ তৌলদণ্ডে দিবে বণ্টন করি,  
 আজি বিশ্বের রাজাসন খানি স্থাপন করিবে বিশ্বকমল 'পরে  
 রাজসভাতলে হইবে বিচার হৃত অসহায় কাণ্ডাল জনার তরে !  
 চরণ-নখর হইতে ক্ষরিবে মুক্তির ধূলি, ভিক্ষার ঝুলি দূরে করে

ফেলে দাও

তুমি নহ দীন সম্পদহীন নির্ভয়ে আজ নয়ন তুলিয়া চাও !

এসেছেন নারায়ণ

এস হে তক্ত হৃদয়-রক্ত-কমল কর চরণ ।

## নারায়ণের পঞ্চ-প্রদীপ

সহজিয়া ।

( শ্রীবিভূতিভূষণ তট্ট বি এল )

দ্বিতীয় অধ্যায় ।

বিপ্রলকার কথা ।

বাবা আমার নাম রেখেছিলেন জানকী । কিন্তু মা আমার সে নাম  
 উণ্টে দিয়ে রাখলেন উর্শ্বলা, তবু ভাগ্য কি তাতে উল্টিয়েছে ? জানকী  
 নাম, বলে, রাখতে নেই, জন্ম হুঃখী হয় ; কিন্তু উর্শ্বলাই বা কি এত ভাল !  
 মা জানকী ত' তবু তাঁর স্বামীর সঙ্গে চৌদ্দ বছর বনে বনে কাটাতে  
 পেয়েছিলেন, আমায় যে উর্শ্বলার মত স্বামীকে পেয়েই হারাতে হয়েছে ! মা  
 আমার ভাগ্যটাকে যেন দিব্য চক্ষে দেখতে পেয়েছিলেন তাই আগে থাকতেই  
 নাম বদলে দিয়েছিলেন । তবু বাবা ডাকতেন, “মা জানকী,” এবং আমিও  
 উত্তর দিতাম । কারণ আর যে যাই মনে করুক, আমি আমার বাবাকে  
 জনক ঋষির চেয়ে কম ভক্তি করতাম না, করতে শিখিও নি, এবং সেই জন্ত  
 নিজেরও জানকী হবার পক্ষে আপত্তিও তেমন ছিল না ।

মাও যে বাবাকে কম ভক্তি করতেন তা নয়, তবু কেমন যেন তাঁর ভয়  
 করত । আমায় সীতাদেবীর মত যে বাল্যকাল হতে শ্রীরামচন্দ্রের জন্তই  
 উৎসর্গ করে রাখা হয়েছিল, এটা মা যেন সহিতে পারতেন না । কেবলি ভয়ে  
 ভয়ে থাকতেন । কাজে কর্মে সব সময়ই আমাদের গৃহ-দেবতা রামসীতার  
 চরণে তুলসী দিয়ে আমার বাবার অপরাধের জন্ত ক্ষমা চাইতেন ।

কিন্তু বাবার শরীরে মনে কাজে কর্মে কোথাও ভয়ের লেশ মাত্র ছিল না ।  
 উনি মাকে যখন তখন বৃষিয়ে দিতেন যে, “আমার জানকীর জন্ত শ্রীরঘুনাথজী  
 নিশ্চয়ই জন্তগ্রহণ করেছেন ; তিনিই আমার মা জানকীকে পায়ে টেনে  
 নেবেন ।” মা শিউরে উঠতেন, কিন্তু আমার জ্ঞান হওয়ার পর হতে মনে  
 পড়ে আমি কখনো ভয় পাই নি । আমি কত সময় দোতালার ছাতে উঠে  
 আমাদের গ্রামের “সরান” পথটা যেখানে মাঠের মধ্যে মিলিয়ে গিয়েছে,



সেই দিকে চেয়ে আলসে ধরে দাঁড়িয়ে থাকতাম। ভাবতাম আমার সেই রামচন্দ্র ধুলো উড়িয়ে পতাকা উড়িয়ে তাড়কা বধ করে কোন দিন হঠাৎ এসে উপস্থিত হবেন।

বাবার এই ভাবটায় আমাদের যে কি রকম পেয়ে বসেছিল তা যে শুনবে সেই অবাক হয়ে যাবে। এমন কি বাড়ীর দারোয়ান ঘনবরণ সিং উৎসাহের চোটে একদিন নিজের নামটাই বদলে ফেলেছিল। ছিল ঘনবরণ, হয়ে গেল রামচরণ। আর এমনি তার হাড়ে হাড়ে রামভক্তি বিঁধে গিয়েছিল যে সে যা কিছু ছাপার অক্ষর সম্মুখে পেতো সবই রামপক্ষে ব্যাখ্যা না করে ছাড়ত না—এমন কি হনুমানজীর লেজটুকু পর্যন্ত বাদ যেত না। তার একদিনকার একটা ব্যাখ্যা আমার এখনো বেশ মনে পড়ে। কোথা হতে আমাদের গাড়োয়ান ছেদীলাল এক টুকরো কাগজ নিয়ে এসে দারোয়ানজীকে ধরে বসলে, “দারোয়ানজী, ইঠোতো দেখিয়ে, ইসকো মংলব তো বাংলাইয়ে।”

দারোয়ানজী তাঁর তুলসীদাস হতে চোখ তুলে, কাগজ খানা হাতে নিলেন। তারপর প্রায় কাঁদো কাঁদো স্বরে বলেন, “আরে ইয়ে তো বাংলা হরফমে সংস্কৃত হায়—রামো লক্ষ্মণম ব্রবীৎ।”

“মতলব কেয়া?”

“রামো রামচন্দ্র রঘুনাথজী; লক্ষ্মণ, লক্ষ্মণজী সমঝা?”

“হাঁ মহারাজ, উ তো সমঝা, উসকে বাদ?”

“অত্রবী ইসকো মংলব অলবৎ মা জানকী হোগা, আউর ওহি যে হলন্ত ত হায়ন্ত, ওহি হায় মহাবীর জীকো দুম (লেজ)।”

আমাদের দারোয়ানজীর ব্যাখ্যার অসাধারণ ক্ষমতা আগে হতেই সবাই জানতো, তাই আমাদের কোন আশ্রয়ীর মুখ হতে ক্রমশঃ পাঁচ হতে হতে শেষে বাবার কাণেও পৌঁছেছিল। আমরা চেপে চেপে হাসাহাসি করছিলাম বটে, কিন্তু বাবা দারোয়ানজীরই দিক নিয়ে বলেছিলেন, “ভক্তি করে যা মনে করবে তাই ঠিক হবে; তোমরা কেউ হেসো না।”

জোরে হাসবার কারো তেমন জো ছিল না, কারণ একে আমাদের বাড়ী হল গ্রামের জমিদার বাড়ী। তার ওপর এমনি একটা আচার অনুষ্ঠান পূজা পার্বন, শাস্ত্র পাঠ, অতিথি সেবার হাওয়া সারা বৎসর ধরে বাড়ীতে বইত যে হাসি ঠাট্টা বাড়ী হতে প্রায় বিদায় নিয়েছিল। এমন কি যাত্রা গান কথকতা বা কীর্তন যাই কিছু হোক না কেন, সমস্ত আনন্দের জিনিষের মধ্য

হাতে হাসির অংশটুকু বাদ না দিলে যেন আমাদের চণ্ডীমণ্ডপে সে সবেগ স্থান হত না।

আমি জমিদারের মেয়ে, তাই চাকর দাসীরও অভাব ছিল না। কিন্তু বন্ধু বলতে যা বোঝায়, সখী বলতে যা বোঝায় তা হোট বেলা কৈ কখনো পাইনি। যাকেই অন্তরঙ্গ করতে গিয়েছি সেই যেন কেমন একটুখানি দূরত্ব রেখে তবে কাছে এসেছে। আমি যেন কোন একটা অচেনা জগতের জীব, কি এক অজানা কারণে, বোধ হয় শাপভ্রষ্ট হয়ে সংসারে এসেছি। আমার সঙ্গে ভাল করে, প্রাণ খুলে যেন মিশতে নেই! সবারই পক্ষে আমার কথা শুনতে আছে, কাজ বললে তৎক্ষণাৎ করে দিতে আছে, আমার ঘরে ধূপ ধূমো ফুল চন্দন সবই দিতে আছে, কেবল আমার গলা জড়িয়ে ধরে দুটো মানে-মংলবহীন মিষ্টি কথা বলতে নেই।

এই জন্ম আমার মধ্যে ছোটবেলা হতেই এমন একটা জীব জেগে উঠেছিল যা একেবারেই এ দেশের নয়, সে জন্তু কি দেবতা তা এখনো ঠিক করতে পারিনি সে কখনও চাইত ছুটে বেরিয়ে নেচে কুঁদে অস্থির হয়ে সব শুচিবস্তু সব দূরত্ব দূর করে ফেলে দিতে, আবার কখনো চাইত একদম একলা চূপ চাপ অশোক বনের সীতার মত বসে থাকতে। আর এই দোটার মারখানে যে মাহুঘটা সমস্ত দিনের কাজকর্মের মধ্যে ঘুরে বেড়াত সে যে কি ছিল, তা আমি বলতে পারব না, তার না ছিল হাসি না ছিল কান্না, না ছিল মান না ছিল অপমান, না ছিল রাগ না ছিল অহুরাগ!

( ২ )

যাক, এমনি করে কতদিন কেটে গেল! তারপর হঠাৎ এমন দুটা লোক আমাদের বাড়ীতে এসে উপস্থিত হল, তারা যেন একেবারে আশো আর অন্ধকারের মত আলাদা। একজনের নাম হাসি, আর একজনের ঠিক নাম কি জানিনে কিন্তু বাবা বলেন তিনি একজন গ্রাসী। আমরাও তাঁকে গ্রাসী মহারাজ বলেই ডাকতাম। একজন এল ফাগুনের দিনের মত একরাশ আলো আর হাসি আর রূপ, আর সাজসজ্জার অতিশয্য নিয়ে, অশ্রুজন এলেন বর্ষার অন্ধকার রাত্রের মত গাশীর্ঘ্য নিয়ে জটাজুট সমায়ুক্ত হয়ে, কৌপীনবস্ত্রঃ খলু ভাগ্যবন্তের সর্ব-রিক্ত মহাশয় নিয়ে! আর আমি পড়ে গেলাম মহামুগ্ধিলে, কারণ এ দুজনার একজনকেও চৈকিয়ে রাখবার জো ছিল না।

হাসি এসে আমার চাল চলন অসন বসন দেখে হেসেই অস্থির। আর

শ্রাসী মহারাজ আমার ঐ সমস্তই লক্ষ্য করে বলেন, যে, আমি হতে কুলং পবিত্রং জননী কৃতার্থা হবেন। হাসি আমার পূজা অর্চনা পড়া শুনার ধূম দেখে রেগে সমস্ত বৈ কাগজ পত্র পুড়িয়ে দেবার ব্যবস্থা দিলে। আর শ্রাসী মহারাজ তাঁর ঝুলি হতে একখানা পরমহংস সংহিতা বার করে আমায় উপহার দিলেন। একই বস্ত্র দুজনে দু রকম চোখে দেখছেন দেখে আমি অবাক হয়ে গেলাম। আমার সেই আঠার বছরের অভিজ্ঞতা, জ্ঞান, বিচার শক্তি সমস্তই হঠাৎ কেমন থমকে দাঁড়িয়ে গেল! অথচ দুজনের একজনকেও দূরে রাখতে পারলাম না। আমার চিরদিনকার শিক্ষা দীক্ষা যে সময় আমার ঐ শ্রাসী ঠাকুরের পায়ের কাছে বসিয়ে দিলে, ঠিক সেই সময়ই আমার অন্তরের অন্তরে যে মানুষটা ছিল সে যেন হাসির হাসির হাওয়ার মধ্যে ছুটে বেরিয়ে গেল। আমার কাণ ছটো, শ্রোকের ব্যাখ্যা শুনত, মনও তাতে যে যোগ দেয় নি তা নয়, কিন্তু মনের যা মন তা যে হাসির দূর হতে টানাটানি অনুভব করছিল সেটা ত' মিথ্যে নয়।

এই হাসিটা ছিল আমার মামাত বোন। আমার মামা ক্রিস্টান হয়ে গিয়েছেন বলে আমার দিদিমা তাঁর মাতৃহীনা নাতনীটাকে নিয়ে মামার কাছ থেকে পালিয়ে এখানে এসেছেন। তাঁর আশা বোধ হয় এই ছিল, যে আমাদের সংস্রবে এসে হাসি তার সমস্ত ক্রিস্টানী শিক্ষা দীক্ষা হাব ভাব, বিশেষতঃ তার অকারণ হাসির উচ্ছ্বাস টুকু ভুলে প্যাচা হয়ে বসবে। কিন্তু ফলে হল, 'উন্টা বুঝি রাম'। সে এসেই বাড়ি শুদ্ধ মাতিয়ে তুললে। মা তার সংস্রবে পড়ে পূজা পাঠের অবসরে ঘর দুয়ার সাজান ধোয়া মোছায় একটু বেশী মন দিলেন; বিয়েদের কাজ কর্ম বাড়ি সত্ত্বেও তারা মন খুলে গল্প গুজব লাগালে, আশ্রিত আশ্রিতারা একটু ভাল খাবার দাবার পেতে লাগল এবং তাঁদের ছোট ছোট ছেলে মেয়েরা পরিষ্কার কাপড় চোপড় পরে বাড়িময় ঘুরে বেড়াতে লাগল। অতিথিশালায়ও শুনলাম নাকি খরচ আর কাজ বেড়ে গেছে। ঝাড়ুদার বেহারী হতে আরম্ভ করে বাগানের মালী পর্যন্ত একটা শোভনতা রক্ষার মধুর অত্যাচারে সর্বদাই ব্যস্ত হয়ে ফিরতে আরম্ভ করলে। এমন কি বাবাও যেন ক্রমশঃ তাঁর কঠোর শুচিব্দের আবেষ্টনী হতে শোভন নির্মূল্যের আবহাওয়ায় পড়ে স্বস্তি অনুভব করলেন, অন্ততঃ আমার ত তাই মনে হল।

শ্রাসী মহারাজ কিন্তু নিজের অগাধ গাঙ্গীর্ষ্যের শিখরে অচল হয়ে বসে রইলেন। হাসি মাঝে মাঝে তাঁকেও নানা প্রকারে আক্রমণ করতে লাগল

কিন্তু তিনি এমনি একটা প্রশান্ত হাশ্বে তার সকল প্রশ্ন তর্ক যুক্তিকে ঠেলে দিতে লাগলেন, যে, শেষে হাসি আর পারতপক্ষে তাঁর ত্রিসীমা মাড়াত না। ডাকলে বলত, "ওরকম হাজার বছরের আগেকার মানুষের কাছে গেলে অকারণে বৃড়িয়ে যেতে হবে।"

আমি কিন্তু এই শান্ত গম্ভীর মানুষটাকে কিছুতেই বেশীক্ষণ ছেড়ে থাকতে পারতাম না, যখন তখন গিয়ে কাছে বসতাম, এটা ওটা এগিয়ে দিতাম, যখন তখন যা তা প্রশ্ন করে তাঁকে ভাবিয়ে তুলতাম, না হয় এমন একটা উত্তর নিয়ে আসতাম যা সমস্ত দিন ধরে আমায় পেয়ে বসে থাকত। বাবা যখন তাঁর সঙ্গে কথা বার্তা কইতেন সেই সময়টা ছিল আমার সব চাইতে ভয়ঙ্কর সময়, কারণ সেই সময়টা আমায় উপস্থিত থাকতেই হ'ত—বাবার সেই রকম আদেশ ছিল। কিন্তু এই রকম বাধ্য হয়ে বসে থাকা বাধ্য হয়ে ধর্ম কথা শোনা আমার যেন তেমন সহ্য হ'ত না; তাই বাবা যখন থাকতেন না তখন যত ইচ্ছা এবং যেমন করে ইচ্ছা হ'ত তেমনি করে শ্রাসী মহারাজের ঝুলিটা নেড়ে চেড়ে দেখতাম! এবং তাঁর সেই সময়ের অবাধ সঙ্গোপনভোগ হতে যা পেতাম তাই যেন প্রকৃত লাভ বলে মনে হ'ত। মা দিদিমা বা অগ্রাণ্ড কোন সাধুসঙ্কলোলুপ আত্মীয়ের উপস্থিতিও যেমন এই অপূর্ব মানুষটার ওপর একটা ভাব-গৈরিকের আচ্ছাদন ফেলত, তেমনি আমার সঙ্গেও অনেক সময় যেন তাঁর মনের উপরকার সেই প্রবীণত্বের গৈরিকটা টেনে ফেলে দিয়ে ভিতরকার চিরন্তন কিশোর মানুষকে টেনে বার করত।

এঁর বয়স যে কত হয়েছিল তা বলতে পারিনে। বাবা বলতেন সত্তর পঁচাত্তর হবে—কিন্তু কিছুদিনের পরিচয়ের পর আমার তা মনেই হ'ত না। আমার মনে হ'ত যেন তিনি আমারই বয়সী। তাঁর চিমটে, তাঁর ধুনি, তাঁর ছাই ভস্ম, তাঁর কটা গৌফ জটা কিছুই যেন তাঁকে বুড়ো করতে পারেনি। অন্তরের খোলা মাঠে অবাধে ছুটে ছুটে খেলে বেড়িয়ে তিনি যেন অন্তরে চিরকিশোরই রয়ে গিয়েছিলেন। না ছিল তাঁর খাওয়া দাওয়ার ঠিক, না ছিল শোয়া বসার সময়। বেড়াচ্ছেন ত বেড়াচ্ছেনই—বসে আছেন ত বসেই আছেন, গল্প করছেন ত গল্পই করে যাচ্ছেন; আবার চূপ করে আছেন ত এমনি চূপ যেন জন্ম হতে চির-মৌন। তাঁর গল্পের সময়ও দেখিছি চারদিকের আকাশ বাতাসও যেন গল্প করত, গম্ভীর আওয়াজে মুখর হয়ে উঠত। আবার তিনি যখন মৌন হয়ে থাকতেন তখন যেন মনে হ'ত জগতের মধ্যে আওয়াজ বলে

কোনো পদার্থই নেই। আমাদের গীত শাজ্জে নাকি বলে যে দিনের প্রত্যেক অংশের এক একটা প্রধান স্বর আছে, এমন কি ষড় ঋতুরও এক একটা নিজস্ব স্বর আছে। সেই স্বর নাকি আমাদের গীত-বিশারদের কাণে ধরা পড়েছিল, তাই বিভিন্ন সময়ের জন্তু এবং বিভিন্ন ঋতুর জন্তু বিভিন্ন রাগ রাগিণীর সৃষ্টি হয়েছিল। আমি অত শত বুঝি না, কিন্তু আমাদের গ্রাসী মহারাজ যখন যা করতেন বা বলতেন তার সমস্তই যেন সময়ের সঙ্গে স্থানের সঙ্গে সম্পূর্ণ খাপ খেয়ে যেত।

( ৩ )

কিন্তু হাসিরও আমার গুণ ছিল যে রত, তা বলে শেষ করতে পারি না। সে সুরাদিন নানা কাজে যুচ্ছে, কিন্তু দিনের শেষে দেখতাম একখানা একখানা চমৎকার ছবি তার ঘরের জানালার পাশে তৈরী হয়ে উঠেছে। কখন যে সে এত কাজ করে, ঘর সাজিয়ে, ছেলে পিলেদের খাইয়ে মুছিয়ে, রাজ্যের লোকের তত্ত্ব তন্নাস করে, এমন কি নানা রকম খাণ্ড তৈরী করেও এই কলা-বিজ্ঞার সময় পেতো তাও ধরতে পারতাম না; কিন্তু এটা বেশ বুঝতে পারতাম যে তার প্রাণের হাসিটুকু তুলির মুখে ছবির ভেতর অতি সহজেই ফুটে উঠত আর তা সহজেই ধরা যেত। সে যা আঁকত তাতে কেবল থাকত আলো আর আলো শুধু রং আর রং। গাছ পালা, জীব জন্তু নদী সমুদ্র, পাহাড় পর্বত, সব তাতেই একটা সজীব আলোর সমাবেশ। সবই যে প্রকৃতির ছবছ নকল তা নয়, হয়ত সবটাতেই রংএর একটু আতিশয্যই থাকত, তবু যেন ঐ সব সৃষ্টি ছাড়া সৃষ্টি হতে তার মনের মানুষটিকে আমি ধরতে পারতাম।

একদিনকার কথা বেশ আমার মনে পড়ে। সেদিন বৃষ্টি হচ্ছিল, সমস্ত আকাশ যেন মেঘে একেবারে অন্ধকার, সমুখের দীঘীর জলও কালো হয়ে এসেছে, আম কাঁঠালের গাছের মধ্যে অন্ধকার জমে এসেছে কিন্তু আমি তাঁর ঘরে গিয়ে দেখি যে সে ছবি আঁকচে। যদিও সেটা বরষারই ছবি বটে কিন্তু তাতে সে মেঘের ফাঁকে ফাঁকে নানারঙের আলো ফুটিয়ে তুলেছে, আর একটা হরিণশিশু মাথা উঁচু করে অন্তমান সূর্যকে দেখছে। গাছের সবুজ পাতাগুলোর ডগা লালে লাল আকাশে নীলের সঙ্গে লালের মেশামিশি, আর একটা রামধনুর এক অংশ ছবির কোণায় স্পষ্ট দেখা যাচ্ছে।

আমি বললাম “এ হতেই পারে না—রামধনু দেখা গেলে সূর্য দেখা যেতে পারে না।”

হাসি হেসে বলে,—“তা নাই বা গেল, তবু আমি তাই আঁকিব।”

এর ওপর তর্ক চলে না তাই তর্ক বন্ধ হল, কিন্তু আমার মনের মধ্যে তর্ক চলতেই লাগল। একবার মনে হল বলি, যে, যা অসম্ভব তা কিছুতেই সুন্দর নয়, আবার তখন মনে হল, যে, যা সুন্দর তাকে যে সম্ভবের মধ্যে ধরা দিতেই হবে তার মানে কি? যে যে জিনিষ কেবল নিয়ম মেনে চলে তাকে সুন্দর করে তুলতে হলেই ত তার মধ্যে নিয়ম-ছাড়াকে সৃষ্টি-ছাড়াকে এনে ঢোকাতে হবে, নৈলে সৌন্দর্য যে কিছুতেই ফুটবে না। যা প্রত্যাশিতের মধ্যে অপ্রত্যাশিত তাই ত সুন্দর। যা নিয়মের মধ্যে অনিয়মিত তাই ত মনোমোহন।

হাসি তার ছবি থেকে মুখ তুলে একবার আমার দিকে চাইলে, তারপর হঠাৎ উঠে দাঁড়িয়ে আমার গলা জড়িয়ে ধরে তার তুলি দিয়ে আমার কপালে একটা টীপ পরিষে দিয়ে বলে, “এই দেখ এই ভুরু ছোটোর মধ্যে যা ছিল না তাকে সৃষ্টি করে, প্রকৃতির নিয়মকে উল্টে দিয়ে তোমার কপালখানি কত সুন্দর করে দিলাম। চল দেখবে।”

আমায় একখানা আয়নার সম্মুখে দাঁড় করিয়ে সে এক মনে কি যে দেখলে তা সেই জানে, কিন্তু তার আদরের অপ্রত্যাশিত চুম্বনটুকু আমার প্রাণের মধ্যে এমন অপ্রত্যাশিতকৈ এনে দিলে যাকে নিয়ে আমি ঐ আয়না খানার সামনে অবাক হয়ে নিজের দিকেই চেয়ে রইলাম। আমার চেহারার মধ্যে কি যে দেখছিলাম ঠিক জানি না, কিন্তু কেবল মনে হচ্ছিল এই ত আমি আমার কাছে ধরা দিয়েছি। আমার যে ‘আমিটাকে’ এত তত্ত্ব দিয়ে সূক্ষ্মাতি-সূক্ষ্ম ভাবে বিশ্লেষণ করতে পারছি, এই ত আমার সেই ‘আমি’ একটা আনন্দে ভরা চুম্বনে সুন্দর হয়ে স্থূল হয়ে আলোক বাতাস মাটির সমষ্টি হয়ে আপনারই কাছে ধরা দিয়েছি। এই দেহ হয়েই ত আমি আপনাকে পেয়েছি। আমি ত’ অধর নই, আমি যে পূর্ণ ভাবে ধরা পড়ে গিয়েছি।

এই সব কথা ভাবতে ভাবতে সন্ধ্যার পর গ্রাসী মহারাজের কাছে গেলাম। কিন্তু দেখলাম তিনি চুপ করে বসে আছেন, আর বাবা তাঁর মুখের দিকে চেয়ে অবাক হয়ে বসে আছেন। ইতিপূর্বে কি কথা যে হয়েছে তা জানিনে—কিন্তু হুঁজনে চুপ করে বসে আছেন দেখে আমার যেন কেমন ভয় করতে লাগল। কোনো কথাই বলতে পারলাম না, ধীরে ধীরে এক পাশে বসে পড়লাম। গ্রাসী মহারাজ ফিরেও চাইলেন না, কোনো কথাও বলেন না;

কিন্তু বাবা একবার আমার দিকে চেয়েই আবার তাঁর দিকে দৃষ্টি ফিরালেন। তার পর হঠাৎ বললেন, “তা হলে কি করব!”

শ্রাসী বললেন “তীর্থ ভ্রমণে বেরিয়ে যাও, তা হলেই তাঁকে পাবে—তিনি আপনি এসে দেখা দেবেন, কিন্তু এখানে বসে থাকলে হয়ত পাবে না।”

কার কথা হচ্ছিল, কাকে পেতে হবে, কিছুই বুঝতে না পেরে আমি অবাধ হয়ে একবার এর পানে একবার ওর পানে তাকাতে লাগলাম। বাবাও কিছুক্ষণ বসে থেকে শেষে উঠে গেলেন।

আমি অবসর পেয়ে ভাবলাম একবার জিজ্ঞাসা করি, কার কথা হচ্ছিল; কিন্তু শ্রাসী মহারাজ তার অবসর দিলেন না। তিনিও হঠাৎ উঠে অন্ধকার বারান্দায় গিয়ে পায়চারী করতে লাগলেন। আমি কিছুক্ষণ চূপ করে বসে থেকে, শেষে উঠতে যাচ্ছি, এমন সময় শুনতে পেলাম শ্রাসী মহারাজ মৃদুস্বরে গান করছেন। তাঁকে কোনো দিন গান করতে শুনিনি, তাই হঠাৎ তাঁর মধুর গভীর স্বর শুনে আমি চমকে উঠে, ধীরে ধীরে ঘরের দরজার কাছে এসে দাঁড়ালাম।

বাইরে একটু একটু ঝুটি হচ্ছিল। মাঝে মাঝে বিদ্যুৎও চমকচ্ছিল—আমি সেই বিদ্যুতের আলোকে দেখলাম শ্রাসী রেলিংএর উপর হাত রেখে অন্ধকার আকাশের দিকে চেয়ে গান গাইছেন। কি যে গাইছিলেন তা মনে নেই এবং বোধ হয় হিন্দি গান বলে বুঝতেও পারিনি, কিন্তু গানটার বিষয় এইটুকু মনে আছে যে যেন সেটা প্রতীক্ষার গান, কিম্বা বিরহের গানই হবে। তাই আমার কেবলি মনে হচ্ছিল যে এই এত বড় একটা আপ্তকাম পূর্ণকাম মাহুয়ের মনের মধ্যে আবার এরকম করুণ স্রবের উচ্ছ্বাস উঠল কেন?

তাঁকে অত্যন্ত অশ্রুমনস্ক দেখে আমি ফিরবার উত্থোগ করছি, এমন সময় তিনি কাছে এসে বললেন, “মা জানকি! তোমার জানকী নাম বদলে দিলাম, আজ হতে তুমি গৌরী; গৌরী হতে তোমার আপত্তি আছে?” আমি অবাধ হয়ে তাঁর মুখের দিকে চাইলাম; দেখলাম, তাঁর মুখে হাসির লেশ মাত্র নাই, তার পরিবর্তে একটা গুৎস্ক্যের ভাব ফুটে উঠেছে। আমার চূপ করে থাকতে দেখে তিনি বললেন, “তোমাকে কি করতে হবে জান? একজন ঘরছাড়া ঘরে আনতে হবে,—গৌরী যেমন শশানবাসী শিবকে গৃহবাসী মহাদেব করেছিলেন, তোমাকেও তেমনি একজনকে—কে সে জানিনে—

একজন মহাত্যাগীকে মহাযোগী করতে হবে; এই কাজের জগুই তুমি জমেছ, এইটাই তোমার এ জগতে জন্মবার কারণ—বুঝেছ?”

আমি চূপ করে মাটির দিকে চেয়ে দাঁড়িয়ে রইলাম। শ্রাসী মহারাজ পায়চারী আরম্ভ করলেন। দু চারবার ঘুরে আবার কাছে এসে বললেন, “এইটাই তোমার অদৃষ্ট তুমি বোঝো, আর নাই বোঝ, মা, তোমা হতে এই কার্যই সিদ্ধ হবে। তোমার বাবাকেও তাই বুঝিয়েছি; আর তিনি আমার কথাহুসারে কাজ কর্বেন বলেছেন। তুমি গৌরী হতে পার্বে না মা? একটা শিবকেও কি শব হতে না দিয়ে শঙ্কর করতে পারবে না?”

আমি কাতরভাবে বললাম, “কি করতে হবে বুঝিয়ে বলুন। যিনি ত্যাগী তিনি কি যোগী নন? যোগী তবে কে?”

“যিনি ত্যাগের দ্বারা ভোগ করেন, যিনি অনাসক্ত হয়ে আসক্ত হন, এবং যিনি আসক্ত হয়েও অনাসক্ত থাকেন তিনিই যোগী। যিনি বিয়োগী তিনি কি যোগী হতে পারেন? যিনি সর্ব্বকে সত্য বলে স্বীকার করে মিথ্যা বলে মায়্য বলে উড়িয়ে না দিয়ে যোগ-যুক্তা হয়ে অবস্থিতি করেন তিনিই যোগী। অল্প সমস্ত যোগই এই যোগের প্রাথমিক অবস্থা। তোমায় এমন একটা যোগীকে তৈরী করতে হবে—পারবে না মা?”

আমি বললাম, “আমি আপনাদের কথা বুঝতে তেমন পারলাম না, তবে এইটুকু বুঝলাম যে কোনো একজন সন্ন্যাসীকে গৃহী করতে হবে, তাঁর মুক্তির পথ বন্ধ করে বন্ধনের পথ করে দিতে হবে। তাই যদি আমার অদৃষ্ট হয়, তাই করব।”

শ্রাসী এইবার খুব জোরে হেসে উঠলেন—এত জোরে হাসতে তাঁকে কখনো শুনিনি। তিনি হাসতে হাসতে ঘরে ঢুকে তাঁর আসনের উপর বসে বললেন, “মা মুক্ত না হলে কি পূর্ণরূপে বন্ধনের আনন্দ জানতে পারে? যে বন্ধ জীব সে তো মুক্ত হবার জগুই ছট ছট করছে, যে মুক্ত সেই পূর্ণ বন্ধনকে স্বেচ্ছায় স্বীকার করতে পারবে। যাক এসব কথা আর এখন নয়, যখন সময় হবে আপনাই বুঝতে পারবে। যখন তোমার প্রকৃত গুরুকে পাবে, যিনি সহজেই তোমার সমস্ত বন্ধনের মধ্যে প্রবেশ করে তোমাকেও মুক্ত করবেন নিজেও আনন্দ পাবেন, তখন আনন্দ পাবে, তখন আমার আজকের কথা বুঝতে পারবে। এখন যাও কাল ভোরেই স্নান করে আমার কাছে এস।”

আমি ধীরে ধীরে ভিতরে চলে গেলাম। পরদিন প্রভাতে তাঁর কাছে

গিয়ে দেখলাম, তিনি হোম করছেন শুনিলাম রাত্রি হতে এই কার্য হুচ্ছে । বাবা তাঁর কাছে বসে আছেন । কেন যে এই অস্থান তা বুঝতে পারলাম না । কিন্তু ঘটনাখানেক পরে শ্রাস্তী নিজে আমায় ফোঁটা পরিষে দিলেন, শান্তিজল দিয়ে আশীর্বাদী ফুল দিলেন । তার পর বাবার দিকে চেয়ে বল্লেন, “আমার কাজ শেষ হল, আজই আমি যাব । এর পর যা যা কর্তব্য তুমিই করো । হয়তো আর দেখা হবে না কিন্তু আশা আছে, তোমার এই কণ্ঠ্য হতে এমন একটা সত্য তুমি জানতে পারবে, যা তোমার কেন, অনেকেরই জানা নেই । কিন্তু তুমি না জেনেও সেই সত্যের জ্ঞান নিজেও তৈরী হয়েছ এই কণ্ঠ্যকেও তৈরী করেছ । তোমার চিরদিনকার আশার রামচন্দ্র আসবেন, এবং এমন ভাবে আসবেন যাতে সেই চিরন্তন গোপন সত্য তোমাদের উপলব্ধি হবে । মা জানকী ! তোমায় এই টীকা পরিষে দিলাম, তুমি আজ হতে কেবল তাঁরই যিনি কেবল তোমারি জ্ঞান আসছেন, যিনি কেবল তোমারি । তোমারি হয়েই তিনি সবারই এবং সবারই হয়েই তিনি সর্বাঙ্গীত ।

সন্ধ্যা কীছুক্ষণ চূপ করে রইলেন । বাবা নত হয়ে তাঁকে প্রণাম করলেন, আমিও করলাম ।

উপাসনা—অগ্রহায়ণ ।

### ছুঁৎমার্গ ।

একবার এক ব্যঙ্গ-চিত্রে দেখিয়াছিলাম, ডাক্তার-বাবু রোগীর টিকি মূলে ষ্টেথোস্কোপ বসাইয়া জোর গ্রাস্তারী চালে রোগ নির্ণয় করিতেছেন ! আমাদের রাজনীতির দণ্ডমুণ্ড হর্তাকর্তা বিধাতার দলও আমাদের হিন্দু-মুসলমানের প্রাণের মিল না হওয়ার কারণ ধরিতে গিয়া ঠিক ঐ ডাক্তার বাবুর মতই ভুল করিতেছেন । আদত স্পন্দন যেখানে, যেখানে হইতে প্রাণের গতি-রাগ স্পষ্ট শুনিতে পাওয়া যায়, সেখানে ষ্টেথোস্কোপ না লাগাইয়া টিকি-মূলে যদি ব্যামো নির্ণয় করিতে চেষ্টা করা যায়, তাহা হইলে তাহা যেমন হাশ্বাস্পদ ও ব্যর্থ, রাজনীতির দিক দিয়া হিন্দু-মুসলমানের প্রাণের মিলনের চেষ্টা করাও তেমনি হাশ্বাস্পদ ও ব্যর্থ । সত্যিকার মিলন আর স্বার্থের মিলনে আসমান জমিন তফাৎ । প্রাণে প্রাণে পরিচয় হইয়া যখন দুইটি প্রাণ মানুষের-গড়া সমস্ত বাজে

বন্ধনের ভয়-ভীতি দূরে সরাইয়া সহজ সঙ্কোচে মিশিতে পারে, তখনই সে মিলন সত্যিকার হয় ; আর যে মিলন সত্যিকার, তাহা চিরস্থায়ী, চিরন্তন । কোন একটা বিশেষ কার্য উদ্ধারের জন্ত চির-পোষিত মনোমালিগটাকে আড়াল করিয়া বাহিরে প্রাণভরা বন্ধুত্বের ভান করিলে সে বন্ধুত্ব স্থায়ী তো হইবেই না, অপরন্ত সে স্বার্থও সিদ্ধ না হইতে পারে, কেননা মিথ্যার উপর ভিত্তি করিয়া কখনও কোন কার্যে পূর্ণ সাফল্য লাভ হয় না ।

এখন কথা হইতেছে যে আদত-রাগ কোথায় ? আমাদের গভীর বিশ্বাস যে, হিন্দু-মুসলমানের মিলনের প্রধান অন্তরায় হইতেছে এই ছোঁয়া-ছুঁয়ির জঘন্য ব্যাপারটাই । ইহা যে কোন ধর্মেরই অঙ্গ হইতে পারে না, তাহা কোন ধর্ম সম্বন্ধে গভীর জ্ঞান না থাকিলেও আমরা জোর করিয়াই বলিতে পারি । কেননা একটা ধর্ম কখনো এত সঙ্কীর্ণ অহুদার হইতেই পারে না । ধর্ম সত্যের উপর প্রতিষ্ঠিত এবং সত্য চিরদিনই বিশ্বের সকলের কাছে সমান সত্য । এইখানেই বুঝা যায় যে, কোন ধর্ম শুধু কোন এক বিশিষ্ট সম্প্রদায়ের জন্ত নয়, তাহা বিশ্বের । আর এই ছুঁৎমার্গ যখন ধর্মের অঙ্গ নয় তখন নিশ্চয়ই ইহা মানুষের সৃষ্টি বা খোঁদার উপর খোঁদকারী । মানুষের সৃষ্টি শৃঙ্খলা বা সমাজবন্ধন সাময়িক সত্য হইতে পারে, কিন্তু তাহা তো শাস্ত সত্য হইতে পারে না । এই জন্তই “সম্ভবামি যুগে যুগে”—রূপ মহাবাণীর উৎপত্তি । আমাদেরও “হাদিসে” সেইজন্ত প্রতি-শত-বর্ষে একজন করিয়া “মুজাদ্দাদ” বা সংস্কারক আসেন বলিয়া লিখিত আছে । “বেদাৎ” বা মানুষের সৃষ্টি রীতিনীতির সংস্কার করাই এই সংস্কারক-দের মহান সক্ষমতা । হিন্দু-ধর্মের মধ্যে এই ছুঁৎমার্গরূপ কুষ্ঠরোগ যে কখন প্রবেশ করিল তাহা জানি না, কিন্তু ইহা যে আমাদের হিন্দু ভ্রাতৃদের মত একটা বিরাট জাতির অস্থিমজ্জায় ঘুণ ধরাইয়া একেবারে নিকীর্য করিয়া তুলিয়াছে, তাহা আমরা ভাই-এর অধিকারের জোরে জোর করিয়া বলিতে পারি । আমরা যে তাঁদের সমস্ত সামাজিক শাসনবিধি একদিনেই উল্টাইয়া ফেলিতে বলিতেছি, তাহা নয়, কিন্তু যে-সত্য হয়ত একদিন সামাজিক শাসনের জন্তই শৃঙ্খলিত হইয়াছিল, তাহার কি আর মুক্তি হইবে না ? বাঙলার মহাপ্রাণ মহাতেজস্বী পুণ্ড্র স্বামী বিবেকানন্দ বলিয়াছেন যে, ভারতে যেদিন হইতে এই “শ্লেচ্ছ” শব্দটার উৎপত্তি সেইদিন হইতেই ভারতের পতন, মুসলমান আগমনে নয় । মানুষকে এত ঘৃণা করিতে শিখায় যে ধর্ম, তাহা আর যাহাই হউক ধর্ম নয়, ইহা আমরা চ্যালেঞ্জ করিয়া বলিতে পারি । এই ধর্মই নরকে

নারায়ণ বলিয়া অভিহিত করা হইয়াছে। কি উদার সুন্দর কথা! মানুষের প্রতি কি মহান পবিত্র পূজা! আবার সেই ধর্মেরই সমাজে মানুষকে কুকুরের চেয়েও ঘৃণ্য মনে করিবার মত হয় জঘন্য এই ছুৎমার্গ বিধি! কি ভীষণ অসামঞ্জস্য! আমাদের অগ্নিমন্ত্রে দীক্ষিত দহন—পূত কালাপাহাড়ের দলকে সেইজন্য আমরা আজ প্রাণ হইতে আবাহন করিতেছি এই মাক্কাতার আমলের বিশ্বে বিধি-বন্ধন ভাঙিয়া চুরমার করিয়া ফেলিতে,—“আয়রে নবীন, আয়রে আমার কাঁচা!” আমরা যে ধর্মটাকেই একেবারে উড়াইয়া দিতে চাহিতেছি, ইহা মনে করিলে আমাদের ভুল বুঝা হইবে। আমরা অন্তর হইতেই বলিতেছি যে, আমাদের সীমার মাঝে থাকিয়াই অসীমের সুর বাজাইতে হইবে। নিজের ধর্মকে মানিয়া লইয়া সকলকে প্রাণ হইতে ছু-বাছ বাড়াইয়া আলিঙ্গন করিবার শক্তি অর্জন করিতে হইবে। যিনি সত্যিকার ভাবে স্বধর্মে নিষ্ঠ, তাঁহার এই উদার বিশ্বপ্রেম আপনা হইতেই আসে। যত ছোঁওয়া-ছুঁয়ির নীচ ব্যবহার তত বক-ধার্মিক আর বিভাল-তপস্বী দলের মধ্যেই। ইহাদের এই মিথ্যা মুখোস খুলিয়া ফেলিয়া ইহাদের অন্তরের বীভৎস নগ্নতা সমাজের চোখের সম্মুখে খুলিয়া ধরিতে হইবে। এইখানে একটা গল্প মনে পড়িয়া গেল। একদিন আমরা এক ট্রেনে গিয়া উঠিলাম। আমাদের কামরায় মালা-চন্দন-ধারী অনেকগুলি হিন্দু ভদ্রলোক ছিলেন। আমরা কামরায় প্রবেশ করিলামাত্র অর্থাৎ আমাদের মাথায় চুপী ও পগ্গ দেখিয়াই ছোঁওয়া যাইবার ভয়ে তাঁহারা তটস্থ হইয়া অল্প দিকে গিয়া দাঁড়াইয়া রহিলেন। সেই বেঞ্চারই এক প্রান্তে বসিয়া এক পণ্ডিতজি বেদ বা ঐরূপ কোন শাস্ত্র-গ্রন্থ পাঠ করিয়া ঐ ভদ্রলোকদের শুনাইতেছিলেন। তিনি আমাদের দেখিয়াই এরূপ আমাদের অপ্ৰতিভ ভাব দেখিয়া হাসিয়া আমাদের হাত ধরিয়া সাদরে নিজের পার্শ্বে বসাইলেন। ভদ্রলোকদের চক্ষু ততক্ষণে কাণ্ড দেখিয়া চড়ক গাছ! আমরাও তখন সহজ হইয়া পণ্ডিতজিকে জিজ্ঞাসা করিলাম যে, তিনি পণ্ডিত ও আচারনিষ্ঠ ব্রাহ্মণ-কুলতিলক হইয়াও কি করিয়া আমাদের মত করিয়া আলিঙ্গন করিতে পারিলেন, অথচ এই ভদ্রলোকগণ আমাদের দেখিয়াই একেবারে দশহাত লাফাইয়া উঠিলেন? ইহাতে তিনি হাসিয়া বলিলেন, “দেখ বাবা, আমি হিন্দু-ধর্মকে ভালবাসি ও সত্য বলিয়া জানি বলিয়াই বিশ্বের সকলকে সকল ধর্মকে ভালো বাসিতে শিখিয়াছি। আমার নিজের ধর্মের প্রতি বিশ্বাস আছে বলিয়াই অল্প সকলকে বিশ্বাস করিবার ও প্রাণ দিয়া

আলিঙ্গন করিবারও শক্তি আমার আছে। যাহারা অন্য ধর্মকে ও অন্য মানুষকে ঘৃণা করে বা নীচ ভাবে, তাহারা নিজেই অন্তরে নীচ, তাহাদের নিজেরও কোন ধর্ম নাই। তবে ধর্মের যে ঘটনা দেখ, তাহা অন্তরের দীনতা চাকিবারই ব্যর্থ প্রয়াস মাত্র!” ইহা বনানো গল্প নয়, সত্য ঘটনা। মানুষ হইয়া মানুষকে কুকুর বিভালের মত এত ঘৃণা করা—মনুষ্যত্বের ও আত্মার অবমাননা করা নয় কি? আত্মাকে ঘৃণা করা আর পরমাত্মাকে ঘৃণা করা একই কথা। সেদিন নারায়ণের পূজারী বলিয়াছিলেন, ‘ভাই, তোমার সে পরম দিশারী তো হিন্দুও নয় মুসলমানও নয়, সে যে মানুষ!’ কি সুন্দর বুকভরা বাণী! এ যে নিখিল-কণ্ঠের সত্য-বাণীর মূর্ত্ত প্রতীক! যাহার অন্তর হইতে এই উদ্বোধন বাণী নির্গত হইয়া বিশ্বের পিষ্ট ঘৃণাত ব্যথিতদের রক্তে রক্তে পরম শান্তির সুধা ধারা ছড়াইয়া দেয়, তিনি মহা-ঋষি, তাঁহার চরণে কোটি কোটি নমস্কার! যদি সত্যিকার মিলন আনিতে চাও ভাই, তবে ডাক ডাক, এমনি করিয়া প্রাণের ডাক ডাক। দেখিবে দিকে দিকে অবহেলিত জন-সম্মুখে তোমার এই জাগ্রত মহা-আহ্বানে বিপুল সাড়া দিয়া ছুটিয়া আসিবে। যাহারা স্বার্থপর, তাহারা মাথা কুটিয়া মরিলেও তো প্রাণের সাড়া কোথাও পাইবেনা, যাহাকে পাইয়া তাহারা উল্লাসে নৃত্য করিবে তাহা বাহিরের লৌকিক “ডিটো” দিয়া মাত্র। অন্তরের ডাক মহা-ডাক, ডাকিতে হইলে প্রথমে বেদনায়—একেবারে প্রাণের আর্ন্ততাবে গিয়া এমনি করিয়া ছোঁওয়া দিতে হইবে। আর তবেই ভারতে আবার নূতন সৃষ্টি জাগিয়া উঠিবে। হিন্দু হিন্দু থাক, মুসলমান মুসলমান থাক, শুধু একবার এই মহাগগন-তলের সীমা-হারা মুক্তির মাঝে দাঁড়াইয়া মানব! তোমার কণ্ঠে সেই সৃষ্টির আদিম-বাণী ফুটাও দেখি! বল দেখি, “আমার মানুষ ধর্ম!” দেখিবে, দশদিকে সার্বভৌমিক সাড়ার আকুল স্পন্দন কাপিয়া উঠিতেছে। এই উপেক্ষিত জন-সম্মুখে বুক দাও দেখি, দেখিবে এই স্নেহের ঈষৎ পরশ পাওয়ার গৌরবে তাহাদের মাঝে ত্যাগের একটা কি বিপুল আকাঙ্ক্ষা জাগে! এই অভিমাত্রিককে বুক দিয়া ভাই বলিয়া পাশে দাঁড় করাইতে পারিলেই ভারতে মহা জাতির সৃষ্টি হইবে, নতুবা নয়। মানবতার এই মহা-যুগে একবার গণ্ডী কাটিয়া বাহির হইয়া আসিয়া বল যে, তুমি ব্রাহ্মণ নও, শূদ্র নও, হিন্দু নও, মুসলমান নও, তুমি মানুষ তুমি সত্য। মহাত্মা গান্ধীজি ধরিয়াছেন এই মহা সত্যকে,

তাই আজ বিষ্ণুর জনসজ্জ্ব তাঁহাকে খিরিয়া এমন আনন্দের নাচ-নাচিতেছে। তোমরা রাজনীতিক যুক্তি-তর্কের চটক দেখাইয়া লেখাপড়া-শেখা ভণ্ডের মুগ্ধ করিতে পার, কিন্তু অমন ডাকটি আর ডাকিতে পারিবেনা। আমরা বলি কি, সর্বপ্রথমে আমাদের মধ্য হইতে এই ছুঁংমার্গটাকে দূর কর দেখি, দেখিবে তোমার সকল সাধনা একদিনে সফলতার পুষ্পে পুষ্পিত হইয়া উঠিবে। হিন্দু মুসলমানকে ছুঁইলে তাঁহাকে স্নান করিতে হইবে, মুসলমান তাঁহার খাবার ছুঁইয়া দিলে তাহা তখনই অপবিত্র হইয়া যাইবে, তাহার ঘরের যেখানে মুসলমান গিয়া পা দিবে সেস্থান গোবর দিয়া (!) পবিত্র করিতে হইবে, তিনি যে আসনে বসিয়া হাঁকা খাইতেছেন, মুসলমান সে আসন ছুঁইলে তখনই হাঁকার জলটা ফেলিয়া দিতে হইবে,—মহুয়াত্বের কি বিপুল অবমাননা! হিংসা, ঘেব, জাতিগত রেঘারেঘির কি সাংঘাতিক বীজ রোপণ করিতেছ তোমরা! অথচ মঞ্চে দাঁড়াইয়া বলিতেছ, “ভাই মুসলমান এস, ভাই ভাই এক ঠাই ভেদ নাই ভেদ নাই!” কি ভীষণ প্রতারণা! মিথ্যার কি বিক্রী মোহজাল! এই দিয়া তুমি একটা অথও জাতি গড়িয়া তুলিবে? শুনিয়া শুধু হাসি পায়। এসো, যদি পার তোমার স্বধর্ম প্রাণ হইতে নিষ্ঠা রাখিয়া আকাশের মত উদার অসীম প্রাণ লইয়া এসো! এসো তোমার সমস্ত সামাজিক বাধাবিঘ্ন ছুঁপায় দলিয়া মানুষের মত উচ্চ-শিরে তোমার মুক্ত-বিথার নাস্তা মহুয়াত্ব লইয়া। এসো, মানুষের বিরাট বিপুল বক্ষঃ লইয়া। সে মহা-আহ্বানে দেখিবে আমরা হিন্দুমুসমান ভুলিয়া যাইব। আমাদের এই তরুণের দল লইয়া আমরা আজ কালাপাহাড়ের দল সৃষ্টি করিব। আমরাই ভারতে আবার অথও জাতি গড়িয়া তুলিব। যে রক্ষণশীল বুদ্ধ এতটুকু “টু” করিবে, তাহার গর্দান ধরিয়া এই মুক্তির দিনে বাহির করিয়া দাও। যে আমাদের পথে দাঁড়াইবে, তাহার টুটি টিপিয়া মারিয়া ফেল। শুধু মানুষ বাঁচিয়া থাক ভাই,— ভারতে শুধু চিরকিশোর মানুষেরই জয় হউক!

নবযুগ

## নারায়ণের নিকষ-মণি ।

ছুনিয়ার দেনা ।

“ছুনিয়ার দেনা” এক খানি গল্পের সাজি। এতে সাতটি গল্প আছে—বোঝা বওয়া, ফকিরের ফাঁক, দশের দোসর, পথের মানুষ, কাপালিকের কপাল, সাঁঝের পাড়ি ও ছুনিয়ার দেনা। বই খানি শ্রীমতী হেমলতা দেবীর লেখা।

হেমলতার লেখনী অমৃত মাথা। মেয়ের লেখা প্রায়ই ফিকে হয়, আমাদের দেশে তাদের জীবনও যেমন সাত গণ্ডীর কোণে গড়া রিক্ত নিঃস্বল, তাদের লেখাও তেমনি দু দশটা কুড়িয়ে পাওয়া ভাবের হালকা ফেনায় ভরা। কিন্তু হেমলতার লেখায় ঋষির সাধনা ও দৃষ্টিখানি নারীর শুচিতায় কি যে অপূর্ব বস্তু হয়ে উঠেছে তা বলে বোঝাবার নয়।

‘বোঝা বওয়া’ গল্পটির মধ্যে থেকে একটু খানি নমুনা দিই—“তখন আমি বুঝলুম ব্যাপারটা কি? বল্লুম, ‘মহারাজ, আমার ও কাজ করে বেতন নেবার যো নাই’ আমি যে আমার ভক্তির আজ্ঞায় কাজ করে থাকি। বেতন নিলেই আমি মারা পড়বো।”

রাজা বলেন, “তবে তুমি বিনা বেতনেই আমার কোন একটা কাজ কর।”

“তাই হবে মহারাজ, কাল থেকে আমি প্রতিদিন আপনার দরবারের বড় দরজায় উপস্থিত থাকবো, যে কেউ রাজ দর্শনে আসবে তার সঙ্গে যদি কোন বোঝা থাকে তাই নামিয়ে নেওয়ার ভার আমার উপর রইল। আপনি যখন আমাকে নিজের মধ্যেই আটকে রাখতে চাইছেন তখন এই বাঁধার মধ্যে আমার ঐটুকু ফাঁক, ঐ বোঝা নামান টুকু দেখাতেই আমার আনন্দ।”

সেই থেকে যে আসে দরবারে তার বোঝা নামাই। এতে আমার শ্রান্তি নেই। ক্লান্তি নেই, শুধু কেবল তৃপ্তিই আছে।”

তাহার পর এ দরবারী বোঝা নামানর বাঁধা নিয়মও তার সইল না।

“আমি কিন্তু সেই দিন থেকে তাঁর রাজদরবারের বড় দরজার সামনে হাজির থাকবার বাঁধা নিয়ম থেকে অব্যাহতি পেয়েছি। এখন আমি নিজের ইচ্ছামত রাজ দরবারের দরজায় গিয়ে দরবারী লোকের বোঝা নামাই, কখনো

রাস্তার চৌমাথায় দাঁড়িয়ে সাধারণ পথিকদের বোঝা বই—যেমন আমার খুসী ।”  
নিজের আনন্দ স্বজনের বোঝা বয়ে মেয়ে-কবি হেমলতা তাঁর —“দেনা  
আমার দেনা, বেজায় আমার দেনা, দেনা আমার সবার কাছে”—সেই ঋণ যে  
ভাবে শোধ করেছেন, তা অক্ষয় কবচ হয়ে বাংলার সারদার আঁচলে বাঁধা  
থাকবে ।

### পল্লী ব্যথা ।

পল্লীব্যাথা কবিতার বই, সাবিত্রী প্রসন্ন চট্টোপাধ্যায় এই মালার মালিকর,  
মালার এক ছড়ার দাম ১ টাকা ।

পল্লীব্যাথা পল্লীর অযত্নকটকিত বিজন পথের ঝরা ফুল, এ ভাবের কবিতা  
নয়—প্রাণের কবিতা । রবীন্দ্রনাথ ও হেমচন্দ্রে যে ব্যবধান তাহা ধরিতে  
গেলে, এক স্থানে পাই ভাবের মগ্ন-সমাধি-কল্পনার কারুণ্য মর্ম্মর-স্বপ্ন ; আর  
অপর স্থানে হেমচন্দ্রে পাই প্রাণের তর-তরে গঙ্গা,—হৃদয়-আঙ্গিনার ভরা  
সঙ্কীর্ণন । সাবিত্রীর কবিতায় ঘরের আলপনা আছে, “বীশের খঁটি তাতে খানিক  
কোষ্টা বাঁধা” গ্রাম্য ছবি আছে, “কনে-চন্দনের উৎসব মঙ্গল স্নিগ্ধতা আছে,

“পিড়ে আমার নেপা পোছা সিঁদুর প’লে যায়গো তোলা

বাতায় গৌজা হুলছে দেখো খোকামণির সোনার দোলা ।”

পল্লীর শ্রামসজ্জল কুঞ্জ মধুর প্রাণের দেবতা যদি রূপ ধরে তবে সে ত পল্লী  
বধু হইয়া—

“তাদের সকল পুণ্য ধর্ম্ম ছড়িয়ে আছে ঘাটে বাটে,”

“তাদের হিয়ার ধৈর্য্য মেহ চিরদিনই অচঞ্চল ।”

“সিক্তবসনে হিন্দুনারী যে নিত্য ঘাটের কূলে

ধারা জল ঢালে আনত আননে অশথ-বটের মূলে,

ছোঁয়াইয়া মাটি শিরে

নিজ ঘরে যায় ফিরে,

তোমরা বলিবে “অন্ধ এ প্রথা তোমাদেরই ভাল মাজে

তুচ্ছ গাছও পাথরের পূজা দেখে মরে যাই মাজে ।

উজাড়িয়া ভরা ঝারি

ঢালে পবিত্র বারি

সে যে রমণীর অপূর্ণ সাধ পূর্ণ কলসে রয়

পুণ্যপরশে তীর্থ-সলিল চির গৌরবময় ”

এই পল্লী-দেবীর দেউল আজ উৎসবহীন, দেশ মরিয়াছে—তাই আজ  
দেশাঙ্গী রূপহারা । সে বেদনাও পল্লীব্যাথায় করুণ হইয়া বাজিয়াছে—

“সঙ্ঘ্যাবেলায় তুলসী তলায় জলে না প্রদীপখানি ।”

সাবিত্রীর হৃদয়খানি নারীর হৃদয়, কোমল বেদনায় সে যখন তুলি ধরে,  
তখন বর্ণে বর্ণে নারীস্বকে প্রাণ দেয় । হৃদয়ের যত কোমল বৃত্তি—করুণ ও  
কান্ত-রস স্নেহগলা হইয়া সাবিত্রীর কবিতায় প্রাণ পায় । এ কবি তুলিয়া  
পুরুষ হইয়াছিল—অল্প ভাবের কবিতা লিখিতে গিয়া আমার মনে হয় সাবিত্রী  
এমন সফল হয় নাই ।

### সংক্ষিপ্ত পুস্তক পরিচয় ।

রামমোহন রায় ও হিন্দুধর্ম্ম—শ্রীস্বকুমার হালদার প্রণীত ও  
গ্রন্থকার কর্তৃক সামলং ফার্ম, রাঁচি হইতে প্রকাশিত । মূল্যের উল্লেখ নাই ।

এই ৪০ পৃষ্ঠার ক্ষুদ্র পুস্তিকাখানির মধ্যে জানিবার ও ভাবিবার অনেক  
বিষয় আছে । রামমোহন রায় সম্বন্ধে আমাদের তথা-কথিত শিক্ষিত সমাজের  
জ্ঞান এত সঙ্কীর্ণ যে তাঁহার সম্বন্ধে কতকগুলো শোনা কথাই সত্য বলিয়া গৃহীত  
হইয়া আসিতেছে । রামমোহন প্রতিষ্ঠিত ‘ব্রহ্ম সভার’ স্বরূপ কি, তাহা হইতে  
কিরূপে বর্তমান ব্রহ্মসমাজ উদ্ভূত হইল, এবং ব্রহ্ম-সমাজ হিন্দু-সাধারণের  
মধ্যে বিশেষ প্রভাব কেন বিস্তার করিতে পারিল না—তাহা এই পুস্তিকায়  
স্বন্দরভাবে আলোচিত হইয়াছে । পুস্তিকাখানি ইংরাজীতে লিখিত না হইয়া  
বাঙলায় লিখিত হইলে গ্রন্থকারের উদ্দেশ্য আরও সফল হইত ।

পাশ্চাত্যধর্ম্ম ও বর্তমান সভ্যতা—স্বকুমার হালদার  
প্রণীত ও গ্রন্থকার কর্তৃক রাঁচি সামলং ফার্ম হইতে প্রকাশিত ।

ইউরোপীয়েরা বিশেষতঃ পাদরীরা অনেক সময় বলিয়া থাকেন যে  
তাঁহাদের বর্তমান সভ্যতা ও আধিপত্য খৃষ্টীয় ধর্ম্মেরই ফলস্বরূপ । লেখক



ইতিহাস হইতে বহুবিধ প্রমাণ সংগ্রহ করিয়া দেখাইয়াছেন যে ইউরোপীয় জাতি সমূহের উন্নতি উহাদের কার্যক্ষমতা ও কার্যকুশলতার ফলেই ঘটিয়াছে, তাহার সহিত খৃষ্টীয় ধর্মের বড় একটা সম্বন্ধ নাই। বরং এ কথাই সত্য যে শিক্ষার বিস্তার বা সামাজিক বিষয়ে উদারতর মতবাদ প্রচার সম্বন্ধে খৃষ্টীয় ধর্ম প্রতিপাদে বাধা দিয়াই আসিয়াছে। পুস্তকখানি স্ফুটন্তিত ও সুলিখিত।

**নাটক ও নাটকের অভিনয়**—ক্ষেত্রনাথ ভট্টাচার্য্য প্রণীত। ১০৬৩ আমহাষ্ট' ষ্ট্রিট হইতে শ্রীঅবনিনাথ ভট্টাচার্য্য কর্তৃক প্রকাশিত। মূল্য ১০ আনা। প্রাপ্তিস্থান—

পুস্তক খানি প্রধানতঃ বিছাসাগর মহাশয়ের 'ভ্রান্তি বিলাস' ও দীনবন্ধুর 'সধবার একাদশী' অবলম্বন করিয়া নাটক ও নাটকের অভিনয় সম্বন্ধে বিস্তৃত সমালোচনা। প্রবন্ধগুলি বহুপূর্বে এডুকেশন গেজেটে প্রকাশিত হইয়াছিল। তাহার পর আমাদের দেশে নাটক ও অভিনয়ের অনেক উন্নতি হইয়াছে কিন্তু অনেক গুলি কথা বর্তমান কালের অনিভয় সম্বন্ধে ও বেশ খাটে। "নাটকের রচিত পাত্রের প্রকৃতি বুঝিতে না পারিলে অথবা বুঝিবার ক্রটি থাকিলে অভিনয় না হইয়া যাত্রা হইয়া পড়ে। এক্ষণে আমাদের দেশে যে সকল অভিনয় হইতেছে তাহার মধ্যে এই ক্রটাই সর্বপেক্ষা অধিক।"

অভিনেতৃগণ পুস্তক খানি একবার পড়িয়া দেখিলে উপকৃত হইবেন।